


5

C. Chinese

Vol. V.





格致餘論序

素問載道之書也詞簡而義深去古漸遠行文繁簡仍有之故非吾儒不能讀學者以易心求之宜其茫若望洋淡如嚼蠟遂直以為古書不宜於今厭而棄之相率以為局方之學間有讀者又以濟其方技漫不之省醫道隱晦職此之由可嘆也震昌三十歲時因母之患脾疼衆工束手由是有志於醫遂取素問讀之三年似有所得又二年母氏之疾以藥而安因追念先子之內傷伯考之督陶叔考之鼻衄幼弟之腿痛室人之積痰一皆歿於藥之悞也心胆摧裂痛不可追然猶慮學之未明至四十歲復取而讀之顧以質鈍逐朝夕鑽研缺其所可疑通其所可通又四年而得羅太無諱知悌者為之師因見河間戴人東垣海藏諸書始悟濕熱相火為病甚多又知醫之為書非素問無以立論非本草無以立方有方無論無以識病有論無方何以模倣夫假說問答仲景之書也而詳於外感明著性味東垣之書也而詳於內傷醫之為書至是始備醫之道至是始明由是不能不致疑於局方也局方流行自宋迄今罔間南北翕然而成俗豈無其故哉徐而思之濕熱相火自王太僕注文已成湮沒至張李諸老始有發明人之一身陰不足而陽有餘雖語語然見於素問而諸老猶未表章是宜局方之盛行也震昌不揣蕪陋陳於編冊并述金匱之治法以證局方之未備間以己意附之於後古人以醫為吾儒格物致知一事故目其篇曰格致餘論未知其果是否耶後之君子幸改而正諸

義烏朱震亨彥修父撰

格致餘論目錄

飲食色欲咸序

飲食歲

色欲歲

陽有餘陰不足論

濇脉論

慈幼論

豆詹陳氏方論

痰瘧論

治病先觀形色然後察脉問證論

虛病痰病有似邪崇論

胎自墮論

難產胞損淋瀝論

乳硬論

人迎氣口論

醇酒宜冷飲論

治病必求其本論

養老論

夏月伏陰在內論

痛風論

病邪雖寔胃氣傷者勿使攻擊論

大病不守禁忌論

面鼻得冷則黑論

難產論

胎婦轉胞病論

受胎論

春宣論

癰疽當分經絡論

脾約丸論

鼓脹論

疝氣論

秦桂丸論

惡寒非寒病惡熱非熱病論

經水或紫或黑論

石膏論

脉大必病進論

生氣通天論病因章句辯

太僕章句 新定章句

倒倉論

相火論

左大順男右大順女論

茹淡論

吃逆論

房中補益論

天氣屬金說

張子和攻擊注論

金華 朱彥脩 撰

新安 吳中珩 校

飲食色欲箴序

傳曰飲食男女人之大欲存焉予每思之男女之欲所關甚大飲食之欲於身尤切世之淪胥陷溺於其中者蓋不少矣苟志於道必先於此究心焉因作飲食色欲二箴以示弟姪并告諸同志云

飲食箴

人身之貴父母遺體為口傷身滔滔皆是人有此身飢渴游興迺作飲食以遂其生眩彼昧者因縱口味五味之過疾病蜂起病之生也其機甚微饕餮所牽忽而不思病之成也飲食俱廢憂貽父母醫禱百計山野貧賤淡薄是諳動作不衰此身亦安均氣同體我獨多病悔悟一萌塵開鏡淨曰節飲食易之象辭養小失大孟子所譏口能致病亦敗爾德守口如瓶服之無數

色欲箴

惟人之生與天地參坤道成女乾道成男配為夫婦生有攸寄血氣方剛惟其時矣成之以禮接之以時父子之親其要在茲眩彼昧者徇情縱欲惟恐不及濟以燥毒氣陽血陰人身之神陰平陽秘我體長春血氣幾何而不自惜我之所生翻為我賊女之耽兮其欲寔多閨房之肅門庭之和士之耽兮其家自廢既喪厥德此身亦瘁遠彼帷薄放心乃收飲食甘美身安病瘳

陽有餘陰不足論

人受天地之氣以生天之陽氣為氣地之陰氣為血故氣常有餘血常不足何以言之天地為萬物父母
天大也為陽而運於地之外地居天之中為陰天之大氣舉之日寔也亦屬陽而運於月之外月缺也屬
陰稟日之光以為明者也人身之陰氣其消長視月之盈缺故人之生也男子十六歲而精通女子十四
歲而經行是有形之後猶有待於乳哺水穀以養陰氣始成而可與陽氣為配以能成人而為人之父母
古人必近三十二而後嫁娶可見陰氣之難於成而古人之善於攝養也禮記注曰惟五十然後養陰
者有以加內經曰年至四十陰氣自半而起居衰矣又曰男子六十四歲而精絕女子四十九歲而經斷
夫以陰氣之成止供給得三十年之視聽言動已先虧矣人之情欲無涯此難成易虧之陰氣若之何而
可以供給也經曰陽者天氣也主外陰者地氣也主內故陽道寔陰道虛又曰至陰虛天氣絕至陽盛地
氣不足觀虛與盛之所在非吾之過論主閉藏者腎也可疎泄者肝也二臟皆有相火而其系上屬於心
心君火也為物所感則易動心動則相火亦動動則精自走相火翕然而起雖不交會亦暗流而疎泄矣
所以聖賢只是教人收心養心其旨深矣天地以五行更迭衰旺而成四時人之五臟六腑亦應之而衰
旺四月屬巳五月屬午為火大旺火為肺金之夫火旺則金衰六月屬未為土大旺土為水之夫土旺則
水衰況腎水常藉肺金為母以補助其不足故內經諄諄於資其化源也古人於夏必獨宿而淡味兢兢
業業於愛護也保養金水二臟正嫌火土之旺爾內經曰冬不藏精者春必病溫十月屬亥十一月屬子
正火氣潜伏閉藏以養其本然之真而為來春發生升動之本若於此時恣嗜欲以戕賊至春升之際下

無根本陽氣輕浮必有溫熱之病夫夏月火土之旺冬月火氣之伏此論一年之虛耳若上弦前下弦後月廓月空亦為一月之虛大風大霧虹霓飛電暴寒暴熱日月薄蝕憂愁忿怒驚恐悲哀醉飽勞倦謀慮勤動又皆為一日之虛若病患初退瘡癢正作尤不止於一日之虛今日多有春末夏初患頭痛脚軟食少體熱仲景謂春夏劇秋冬差而脉弦大者正世俗所謂注夏病若犯此四者之虛似難免此夫當壯年便有老態仰事俯育一切墮壞興言至此深可驚懼古人謂不見所欲使心不亂夫以溫柔之盛於體聲音之盛於耳顏色之盛於目馨香之盛於鼻誰是鐵漢心不為之動也善攝生者於此五個月出居於外苟值一月之虛亦宜暫遠帷幕各自珍重保全天和期無負敬身之教幸甚

治病必求其本論

病之有本猶草之有根也去葉不去根草猶在也治病猶去草病在臟而治腑病在表而攻裡非惟戕賊胃氣抑且資助病邪醫云乎哉族叔祖年七十稟甚壯形甚瘦夏末患泄利至深秋百方不應予視之曰病雖久而神不悴小便澀少而不赤兩手脉俱澀而頗弦自言常微悶食亦減因悟曰此必多年沉積僻在胃腸詢其平生喜食何物曰我喜食鯉魚三年無一日缺予曰積痰在肺肺為大腸之臟宜大腸之本不固也當與澄其源而流自清以萊菔陳皮青葱蘆首根生薑煎濃湯和以沙糖飲一碗許自以指探喉中至半時辰吐痰半升許如膠是夜減半次早又飲又吐半升而利止又與平胃散加白朮黃連旬日而安東陽王仲延遇諸途來告曰我每日食物必屈曲自高而下且硬澀作微痛他無所苦此何病脉之右甚濡而關尤沉左却和予曰汗血在胃腕之口氣因鬱而為痰此必食物所致明以告我彼亦不自覺子

又曰汝去臘食何物為多曰我每日必早飲點剝酒兩三盞逼寒氣為製一方用韭汁半銀盞冷飲細呷之盡韭葉半斤而病安已而果然又一鄰人年三十餘性狡而躁素患下疔瘡或作或止夏初患自利膈上微悶醫與治中湯兩貼昏悶若死片時而甦予脈之兩手皆濇重取略弦似數予曰此下疔瘡之深重者與畜歸龍會丸去腐四貼而利減又與小柴胡去半夏加黃連芍藥川芎生薑煎五六貼而安彼三人者俱是濇脈或弦或不弦而治法迥別不求其本何以議藥

濇脈論

人一呼脈行三寸一吸脈行三寸呼吸定息脈行六寸一晝一夜一萬三千五百息脈行八百一十丈此平人氣血運行之定數也醫者欲知血氣之病與不病非切脈不足以得之脈之狀不一載於脈經者二十有四浮沉芤滑寔弦緊洪微緩濇遲伏濡弱數細動虛促結代革散其狀大率多兼見人之為病有四曰寒曰熱曰寔曰虛故學脈者亦必以浮沉遲數為之綱以察病情此不易之論也然濇之見固多虛寒亦有痼熱為病者醫於指下見有不足之氣象便以為虛或以為寒孟浪與藥無非熱補輕病為重重病為死者多矣何者人之所藉以為生者血與氣也或因憂鬱或因厚味或因無汗或因補劑氣騰血沸清化為濁老痰宿飲膠固雜糅脈道阻滯不能自行亦見濇狀若重取至骨來似有力且帶數以意參之於證驗之形氣但有熱證當作痼熱可也此論為初學者發圓機之士必以為贅東陽吳子方年五十九形肥味厚且多憂怒脈常沉濇自春來得痰氣病醫認為虛寒率與燥熱香竈之劑至四月間兩足弱氣土衝飲食減召我治之予曰此熱鬱而脾虛痿厥之證作矣形肥而脈沉未是死證但藥邪太盛當此火旺寔

難求生且與竹瀝下白朮膏盡二斤氣降食進一月後大汗而死書此以為諸賢覆轍戒云

養老論

人生至六七十以後精血俱耗平居無事已有熱證何者頭昏目眩肌羸弱數鼻涕牙落延多寐少足弱且積健忘眩暈腸燥面垢髮脫眼花久坐兀睡未風先寒食則易飢咲則有淚但是老境無不有此或曰局方烏附劑多與老人為宜豈非以其年老氣弱下虛理宜溫補乎皆以為熱烏附劑將不可施之老人耶余曉之曰奚止烏附劑不可妄用至於好酒膩肉濕麵油汁燒炙煨炒辛辣甜滑皆在所忌或曰子何愚之甚耶甘旨養老經訓具在為子為婦甘旨不及孝道便虧而吾子之言若是其將有說以通之乎願聞其畧子愀然應之曰正所謂道並行而不悖者請詳言之古者井田之法行鄉閭之教興人知禮讓比屋可封肉食不及幼壯五十纔方食肉強壯恣養比及五十疾已蜂起氣耗血竭筋柔骨痿腸胃壅悶涎沫克溢而況人身之陰難成易虧六七十後陰不足以配陽孤陽幾欲飛越因天生胃氣尚爾留連又藉水穀之陰故羈縻而定耳所陳前證皆是血少內經曰腎惡燥烏附劑非燥而何夫血少之人若防風半夏蒼朮香附但是燥劑且不敢多况烏附劑乎或者又曰一部局方悉是溫熱養陽吾子之言無乃繆妄乎子曰局方用燥劑為劫濕病也濕得燥則豁然而收局方用暖劑為劫虛病也補腎不如補脾脾得溫則易化而食味進下雖暫虛亦可少回內經治法亦許用劫正是此意蓋為質厚而病淺者設此亦儒者用權之意若以為經常之法豈不大悞彼老年之人質雖厚此時亦近乎薄病雖淺其本亦易以撥而可以故藥取速效乎若夫形肥者血少形瘦者氣寔間或有可用劫藥者設或失手何以

取救吾益稍遲許出萬金豈不美乎烏附丹劑其不可輕餌也明矣至於飲食尤當謹節夫老人內虛脾弱陰虧性急內虛胃熱則易飢而思食脾弱難化則食已而再飽陰虛難降則氣鬱而成痰至於視聽言動皆成廢懶百不如意怒火易熾雖有孝子順孫亦是動輒扼腕况未必孝順乎所以物性之熟者炭火製作者氣之香辣者味之甘膩者其不可食也明矣雖然腸胃堅厚高氣深壯者世俗觀之何妨奉養縱口固快一時積久必為災害由是觀之多不如少少不如絕爽口作疾厚味措毒前哲格言猶在人耳可不慎歟或曰如子之言殆將絕而不與於汝安乎子曰君子愛人以德小人愛人以姑息况施於所尊者哉惟飲與食將以養生不以致疾若以所養轉為所害恐非君子之所謂孝與敬也然則如之何則可曰好生惡死好安惡病人之常情為子為孫必先開之以義理曉之以物性旁譬曲喻陳說利害意誠辭確一切以敬慎行之又次以身先之必將有所感悟而無扞格之逆矣吾子所謂絕而不與施於有病之時尤是孝道若無病之時量酌可否以時而進某物不食某物代之又何傷於孝道乎若夫平居閑話素無開導誘掖之言及至飢腸已鳴饑涎已動飲食在前馨香撲鼻其可禁乎經曰以飲食忠養之忠之一字恐與此意合請勿易看過予事老母固有愧於古者然母年踰七十旬素多痰飲至此不作節養有道自謂有術只因大便燥結時以新牛乳猪脂和糜粥中進之雖以暫時滑利終是膩物積多次年夏時鬱為粘痰發為脇膈連日作楚寐輿隕獲為之子者置身無地因此苦思而得節養之說時進參朮等補胃補血之藥隨天令加減遂得大腑不燥面色莹潔雖覺瘦弱終是無病老境得安職此之由也因成一方用參朮為君牛膝芍藥為臣陳皮茯苓為佐春加川芎夏加五味黃芩麥門冬冬加當歸身倍生薑一日或一

貼或二貼聽其小水繞覺短少便進此藥小水之長如舊即是却病捷法後到東陽因聞老何安人性聰敏七十以後稍覺不快便却溺數日單進人參湯數貼而止後九十餘無疾而卒以其偶同故筆之以求
是正

慈幼論

人生十六歲以前血氣俱盛如日方升如月將圓惟陰長不足腸胃尚脆而窄養之道不可不謹童子不衣裘帛前哲格言具在人耳棠下體之服帛溫輒甚於布也蓋下體主陰得寒涼則陰易長得溫煖則陰暗消是以下體不與帛絹史厚溫煖之服恐妨陰氣寔為確論血氣俱盛食物易消故食無時然腸胃尚脆而窄若稠粘乾硬酸鹹甜辣一切魚肉木果濕麵燒爇煨炒但是發熱難化之物皆宜禁絕只與乾柿熟菜白粥非惟無病且不縱口可以養德此外生栗味鹹乾柿性涼可為養陰之助然粟大補柿大溢俱為難化亦宜少與婦人無知惟務姑息畏其啼哭無所不與積成痼疾雖悔何及所以富貴驕養有子多病迨至成人筋骨柔弱有疾則不能忘口以自養居喪則不能食素以盡禮小節不謹大義亦虧可不慎與至於乳子之母尤宜謹節飲食下咽乳汁便通情欲動中乳脉便應病氣到乳汁必凝滯兜得此乳疾病立至不吐則瀉不瘡則熱或為口糜或為驚搐或為夜啼或為腹痛病之初來其弱必甚少便須詢問隨證調治母安亦安可消患於未形也夫飲食之擇猶是小可乳母稟受之厚薄情性之緩急骨相之堅脆德行之善惡兒能速肖尤為關係或曰可以已矣曰未也古之胎教具在方冊愚不必贅若夫胎孕致病事起茫昧人多玩忽醫所不知兜之在胎與母同體得熱則俱熱得寒則俱寒病則俱病安則俱安

母之飲食起居尤當慎密東陽張進士次子二歲滿頭有瘡一日瘡忽自平遂患痰喘予視之曰此胎毒也慎勿與解利藥衆皆愕然予又曰乃母孕時所喜何物張曰辛辣熱物是其所喜因口授一方用人參連翹芎藭生甘草陳皮芍藥木通濃煎沸湯入竹瀝與之數日而安或曰何以知之曰見其精神皆倦病受得深決無外感非胎毒而何予之次女形瘦性急體本有熱懷孕三月適當夏暑口渴思水時發小熱遂教以四物湯加黃芩陳皮生甘草木通因懶於前者數貼而止其後此子二歲瘡痍遍身忽一日其瘡頓愈數日遂成痰瘰予曰此胎毒也瘡若再作病必自安已而果然若於孕時確守前方何病之有又陳氏女八歲時得癩病遇陰雨則作遇驚亦作口出涎沫聲如羊鳴予視之曰此胎受驚也其病深痼調治半年病亦可安仍須淡味以佐藥功與燒丹丸繼以四物湯入黃連隨時令加減半年而安

夏月伏陰在內論

天地以一元之氣化生萬物根於中者曰神機根於外者曰氣血萬物同此一氣人靈於物形與天地參而為三者以其得氣之正而通也故氣升亦升氣浮亦浮氣降亦降氣沉亦沉人與天地同一橐籥子月一陽生陽初動也寅月三陽生陽初出於地也此氣之升也已月六陽生陽盡出於上矣此氣之浮也人之腹屬地氣於此時浮於肌表散於皮毛腹中虛矣經曰夏月經滿地氣溢滿入經絡受血皮膚充是長夏氣在肌肉所以表寔表寔者裡必虛世言夏月伏陰在內此陰字有虛之義若作陰冷看其誤甚矣或曰以手捫腹明知其冷非冷而何前人治暑病有五龍丸大順散桂苓丸單煮良薑與縮脾飲用草果等皆行溫熱之劑何吾子不思之甚也予曰春夏養陽王夫僕謂春食涼夏食寒所以養陽也其意可見矣

若夫涼臺水館大扇風車陰水寒泉果冰雪涼之傷自內及外不用溫熱病何由安詳玩其意寔非為內
伏陰而用之也前哲又謂升降浮沉則順之寒熱溫涼則逆之若於夏月火令之時妄投溫熱益免寔寔
虛虛之患乎或曰巳月純陽於理或通五月一陰六月二陰非陰冷而何予曰此陰之初動於地下也四
陽浮於地上燔灼焚燎流金燉石何陰冷之有孫真人製生脉散令人夏月服之非虛而何

豆瘡陳氏方論

讀前人之書當知其立言之意苟讀其書而不知其意求過於用不可得也豆瘡之論錢氏為詳歷舉源
流經絡明分表裡虛寔開陳其施治之法而又證以論辯之言深得著書垂教之體學者讀而用之如求
方圓於規矩較平直於準繩引而伸之觸類而長之可為無窮之應用也今人不知致病之因不求立方
之意倉卒之際擬證檢方漫爾一試設有不應并具書而廢之不思之甚也近因局方之教久行素問之
學不講抱疾談醫者類皆喜溫而惡寒喜補而惡泄利忽得陳氏方論皆燥熱補劑其辭確其文簡權然
用之翕然信之遂以為錢氏不及陳氏遠矣或曰子以陳氏方為不足歟曰陳氏方誠一偏論雖然亦可
謂善求病情者其意大率歸重於太陰一經蓋以手太陰屬肺主皮毛也足太陰屬脾主肌肉肺金惡寒
而易於感脾胃土惡濕而無物不受觀其用丁香官桂所以治肺之寒也用附朮半夏所以治脾之濕也
使其肺果有寒脾果有濕而兼有虛也量而與之中病則止何傷之有今也不然徒見其瘡之出遲者身
熱者泄瀉者驚悸者氣急者渴思飲者不問寒熱虛寔率投木香散異功散間有偶中隨手獲效設或誤
投禍不旋踵何者古人用藥製方有向導有監制有反佐有因用若錢氏方固未嘗廢細辛丁香白朮參

芪等率有監制輔佐之藥不專務於溫補耳然其用涼寒者多而於輔助一法畧開端緒未曾深及癡人之前不可說夢錢氏之慮至矣亦將以候達者擴充推廣而用雖然渴者用溫藥痒塌者用補藥自陳氏發之迥出前輩然其多用桂附丁香等燥熱恐未為適中也何者桂附丁香輩當有寒而虛固是的當虛而未必寒者其為害當何如耶陳氏立方之時必有挾寒而豆瘡者其用燥熱補之固其宜也今未挾寒而用一偏之方蓋不過於熱乎予嘗會諸家之粹求其意而用之寔未敢擬其成方也試舉一二以證之從于六七歲時患豆瘡發熱微渴自利一小方脉視之用木香散每貼又增丁香十粒子切疑焉觀其出遲固因自利而氣弱察其所下皆臭滯陳積因腸胃熱蒸而下也恐非有寒而虛遂急止之已投一貼矣繼以黃連解毒湯加白朮與十貼以解丁香之熱利止瘡亦出其後肌常有微熱而手足生癰瘡與涼劑調補踰月而安又一男子年十六七歲發熱而昏目無視耳無聞兩手脉皆豁大而畧數知其為勞傷矣時里中多發豆者雖不知人與藥則飲與粥則食遂教參芪當歸白朮陳皮大料濃煎與之飲至三十餘貼豆始出又二十餘貼則成濃泡身無全膚或曰病勢可畏何不用陳氏全方治之余曰此但虛耳無寒也只守前方又數十餘貼而安後詢其病因謂先四五日恐有出豆之病遂極力樵採連日出汗甚多若用陳氏全方蓋無後悔至正甲申春陽氣早動止月間邑間豆瘡不越一家卒投陳氏方童幼死者百餘人雖由天數吾恐人事或未之盡也

痛風論

氣行脉外血行脉內晝行陽二十五度夜行陰二十五度此平人之造化也得寒則行遲而不及得熱則

行速而太過內傷於七情外傷於六氣則血氣之運或遲或速而病作矣彼痛風者大率因血受熱已自沸騰其後或涉冷水或立濕地或扇取涼或卧當風寒涼外搏熱血得寒汗濁凝澁所以作痛夜則痛甚行於陰也治法以辛熱之劑流散寒濕開發腠理其血得行與氣相和其病自安然亦有數種治法稍異謹書一二以證予言東陽傳文年踰六十性急作勞患兩腿痛甚動則甚痛予視之曰此兼虛證當補血溫血病當自安遂與四物湯加桃仁陳皮牛膝生甘草煎入生薑研潛行散熱飲三四十貼而安又朱宅閩內年近三十食味甚厚性躁急患痛風攣縮數月醫禱不應予視之曰此挾痰與氣證當和血疎氣導痰病自安遂以潛行散入生甘草牛膝炒枳殼通草陳皮桃仁薑汁煎服半年而安又鄰鮑六年二十餘因患血痢用澀藥取效後患痛風叫號撼鄰予視之曰此惡血入經絡證血受濕熱久必凝濁所下未盡留滯隧道所以作痛經久不治恐成偏枯遂與四物湯加桃仁紅花牛膝黃芩陳皮生甘草煎入生薑研潛行散入少酒飲之數十貼又與刺萎中出黑血近三合而安或曰此見鄰人用草藥研酒飲之不過數貼亦有安者如子之言類皆經久取效無乃太迂緩乎予曰此劫病草藥石上采石絲為之君過山龍等佐之皆性熱而燥者不能養陰却能燥濕病之淺者濕痰得燥則開熱血得熱則行亦可取效彼病深而血少者愈劫愈虛愈劫愈深若朱之病是也予以我為迂緩乎

痰瘧論

內經謂夏傷於暑秋傷於風必有痰瘧痰瘧老瘧也以其隔兩日一作纏綿不休故有是名前賢具有治法然皆峻劑有非稟受怯弱與居養所移者所宜用也惟許學士方有用參芪等補劑而又不曾深論後

學難於推測因見近年以來五十歲以下之人多是怯弱者况嗜欲縱恣十倍於前以弱質而得深病最難為藥始悟常山烏梅砒丹等為劫痰之劑若誤用之輕病為重重病必死何者夫三日一作陰受病也作於子午卯酉日少陰瘧也作於寅申己亥日厥陰瘧也作於辰戌丑未日太陰瘧也瘧得於暑當以汗解或涼臺水閣陰木冷地他人揮扇泉水澡浴汗不得泄鬱而成痰其初感也胃氣尚強全不自覺至於再感瞢然無知又復恣意飲食過分勞動竭力房事胃氣大傷其病乃作深根固蒂宜其難愈病者欲速愈甘辛峻劑醫者欲急利遂便將殺殊不知感風感暑皆外邪也當以汗解所感既深決非一二升汗可除亦有胃氣少回已自得汗不守禁忌又復觸冒舊邪未去新邪又感展轉沉滯其病愈深況來求治者率皆輕試速效劫病之藥胃氣重傷吾知其難免於禍矣由是甘為遲鈍範我馳驅必先以參朮陳皮芍藥等補劑輔以本經之藥惟其取汗若得汗而體虛又須重用補劑以助之俟汗出通身下過委中方是佳兆仍教以淡飲食省出入避風就溫遠去帷薄謹密調養無有不安若感病極深雖有大汗所感之邪必自臟傳出至腑其發也必亂而失期亦豈是佳兆故治此病春夏為易秋冬為難非有他也以汗之難易為優劣也或曰古方用砒丹烏梅常山得效者不為少子以為不可用乎予曰腑受病者淺一日一作間一日一作者是胃氣尚強猶可與也彼三日一作者病已在臟矣在臟者難治以其外感猶可治也而可用劫藥以求速效乎前歲憲僉詹公稟甚壯形甚強色甚蒼年近六十二月得痰瘧召我視之知其飲於醲肥者告之曰須遠色食淡調理浹月得大汗乃安公不悅一人從旁曰此易耳數日可安與劫藥三五貼病退旬日後又作又與又退綿延至久病猶未除又來求治予知其久得藥痰亦少惟胃氣未完又

天寒汗未透遂以白朮粥和丸與二斤令其過飢時且未食取一二百丸以熱湯下只與白粥調養盡此藥當天汗而安已而果然如此者甚多但藥畧有加減不必盡述

病邪雖寔胃氣傷者勿使攻擊論

凡言治國者多借醫為諭仁哉斯言也真氣民也病邪盜賊也或有盜賊勢須剪除而後已良相良將必先審度兵食之虛寔與時勢多可不然後動動涉輕安則吾民先困於盜次困於兵民困而國弱矣行險僥倖小人所為萬象森羅果報昭顯其可不完心乎請舉一二以為凡例永康呂親形瘦色黑平生喜酒多飲不困年近半百且有別館忽一日大惡寒發戰且自言渴却不飲予診其脉大而弱惟右關稍寔略數重取則瀋遂作酒熱內鬱不得外泄由表熱而不虛也黃芪一物以乾薑湯煎與之盡黃芪二兩乾薑一兩大得汗次早安矣又葉先生患滯下後甚逼迫止合承氣證予曰氣口虛形雖實而面黃稍白此必平昔食過飽而胃受傷寔忍一兩日辛苦遂與參朮陳皮芍藥等補藥十餘貼至三日後胃氣稍完與承氣兩貼而安苟不先補完胃氣之傷而遽行承氣吾恐病安之後寔免瘦儻乎又一婢色紫稍肥性沉多憂年近四十經不行三月矣小腹當中有一氣塊初起如栗漸如炊餅予脉之兩手皆瀋重取却有試令按其塊痛甚捫之高半寸遂與千金消石丸至四五次彼忽自言乳頭黑且有汁恐有娠予曰非也瀋脉無孕之理又與三五貼脉之稍覺虛豁予悟曰藥太峻矣令止前藥與四物湯倍加白朮佐以陳皮至三十貼候脉完再與消石丸至四五次忽自言塊消一暈便令莫服又半月經行痛甚下黑血半升內有如椒核數十粒乃塊消一半又來索藥以消餘塊余曉之曰勿性急塊已開矣不可又攻若次月經行當盡

消矣次月經行下少黑血塊又消一暈又來問約余曰但守禁忌至次月必消盡已而果然大凡攻擊之藥有病則病受之病邪輕而藥力重則胃氣受傷夫胃氣者清純沖和之氣也惟與穀肉菜果相宜蓋藥石皆是偏勝之氣雖參芪輩為性亦偏况攻擊之藥乎此婦胃氣自弱好血亦少若塊盡而却約胃氣之存有幾希矣議論至此醫云乎哉

治病先觀形色然後察脉問證論

經曰診脉之道觀人勇怯肌肉皮膚能知其情以為診法也凡人之形長不及短大不及小肥不及瘦人之色白不及黑嫩不及蒼薄不及厚而况肥人濕多瘦人火多白者肺氣虛黑者腎氣足形色既殊臟腑亦異外證雖同治法迥別所以肥人貴脉浮瘦人貴脉沉躁人疑脉緩緩人疑脉躁以其不可一概觀也試陳一二可以例推東陽陳凡露筋體稍長患體虛而勞頭痛甚至有決別之言余察其脉弦而大帶數以人參白朮為君川芎陳皮為佐至五六日未減眾皆訝之以藥之不對也余曰藥力有次第矣更少俟一二宿當自安忽其季來問曰何不少加黃芪予咲不答又經一宿忽自言病頓愈予脉之覺指下稍盛又半日病者言膈上滿不覺飢視其腹紋已隱矣予曰夜來藥中莫加黃芪否曰然止與三貼遂速與二陳湯加厚朴枳殼黃連以瀉其衛三貼而安又浦江義門鄭兄年二十餘秋間大發熱口渴妄言妄見病侶邪鬼七八日後召我治脉之兩手洪數而寔視其形肥面赤帶白却喜露筋脉本不寔涼藥所致此因勞倦成病與溫補藥自安曰柴胡七八貼矣以黃芪附子湯冷與之飲三貼後困倦軒睡微汗而解脉亦稍軟繼以黃芪白朮湯至十日脉漸收斂而小又與半月而安夫黃芪補氣藥也此兩人者一則氣虛一

則氣寔便有宜不宜存焉可不審乎

大病不守禁忌論

病而服藥須守禁忌係真人千金方言之詳矣但不詳言所以守禁忌之由敢陳其畧以為規戒夫胃氣者清純冲和之氣人之所賴以為生者也若謀慮神勞動作形苦嗜欲無節思想不遂飲食失宜藥餌違法皆能致傷既傷之後須用調補恬不知怪而乃恣意犯禁舊染之證尚未消退方生之證與日俱積吾見醫藥將日不暇給而傷敗之胃氣無復完全之望去死近矣予族叔形色俱寔痰癰又患痢自恃強健能食絕無忌憚一日召我曰我雖病却健而能食但苦汗出耳汝能止此汗否予曰痰癰非汗出不能愈也可慮者正在健與能食耳此非痢也胃熱善消脾病不化食積與病勢已甚矣此時節擇飲食以養胃氣省出入以避風寒候汗透而安叔曰世俗謂無飽死痢我今能食何謂可慮余曰痢而能食者知胃氣未病也故言不死非謂恣食不節擇者不從所言恣口大嚼遇渴又多啖水果如此者月餘後雖欲求治不可着手矣淹淹又月餘而死內經以驕恣不倫於理為不治之病信哉又周其姓者形色俱寔患痢善食而易飢大嚼不擇者五日矣予責之曰病中當調補自養豈可滋味戕賊遂教之只用熟蘿蔔喫粥耳少與調治半月而安

虛病痰病有似邪祟論

血氣者身之神也神既衰乏邪因而入理或有之若夫血氣兩虧痰客中焦妨礙升降不得運用以致十二官各失其職視聽言動皆有虛妄以邪治之其人必死吁哉寃乎誰執其咎憲幕之子傅凡年十七八時暑月因大勞而渴恣飲梅漿又連得大驚三四次妄言妄見病侶邪鬼診其脉兩手皆虛弦而帶沉數

予曰數為有熱虛症是大驚又梅酸之漿鬱於中腕補虛清熱導去痰滯病乃可安遂與人參白朮陳皮茯苓苓連等濃煎湯入竹瀝薑汁與旬日未效眾皆尤藥之不審余脉之知其虛之未完與痰之未導也仍與前方入荆瀝又旬日而安外弟歲一日醉飽後亂言妄語妄見詢之係伊亡兄附體言生前事甚的乃叔在邊叱之曰非邪食腥與酒太過痰所為耳灌鹽湯一大碗吐痰一二升汗因大作困睡一宵而安又金氏婦壯年暑月赴筵婦反姑詢其坐次失序遂赧然自愧因成此病言語失倫其中又多間一句曰奴奴不是脉皆數而弦余曰此非邪乃病也但與補脾清熱導痰數日當自安其家不信數數巫者噴水而呪之旬餘而死或問曰病非邪而邪治之何遽至於死余曰暑月赴宴外境蒸熱辛辣適口內境鬱熱而况舊有積痰加之愧悶其痰與熱何可勝言今乃驚以法尺是驚其神而血不益也噴以法水是審其體密其膚使汗不得泄也汗不泄則蒸熱內燔血不得益則陰消而陽不能獨立也不死何俟或曰外臺秘要有禁呪一科庸可廢乎予曰移精變氣乃小術耳可治小病若內有虛邪外有寔邪當用正大之法自有成式昭然可考然符水惟隔上熱痰一呷涼水胃熱得之豈不清快亦可取安若內傷而虛與冬嚴寒符水下咽必冰胃而致害彼鬱熱在上熱邪在表須以汗解率得清冷膚腠固密熱何由解必致內攻陰陽離散血氣乖爭去死為近

面鼻得冷則黑論

諸陽聚於頭則面為陽中之陽鼻居面中央而陽明起於額中一身之血運到面鼻到面鼻陽部皆為至清至精之血矣酒性善行而喜升大熱而有峻急之毒多酒之人酒氣熏蒸面鼻得酒血為極熱熱血得

冷為陰氣所搏汗濁凝結滯而不行宜其先為紫而後為黑色也須用融化滯血使之得流滋生新血可以運化病乃可愈予為酒製四物湯加炒片茯苓陳皮生甘草酒紅花生薑煎調五靈脂末飲之氣弱者加酒黃芪無有不應者

胎自墮論

陽施陰化胎孕乃成血氣虛損不足榮養其胎自墮或勞怒傷情內火便動亦能墮胎推原其本皆因於熱火能消物造化自然病源乃謂風冷傷於子臟而墮此未得病情者也予見賈氏婦但有孕至三個月左右必墮診其脉左手大而無力重取則澆知其少血也以其妙年只補中氣使血自榮時正初夏教以濃煎白朮湯下黃芩末末一錢服三四十貼遂得保全而生因而思之墮於內熱而虛者於理為多曰熱曰虛當分輕重好生之工幸毋輕視

難產論

世之難產者往往見於鬱悶安佚之人富貴奉養之家若貧賤辛苦者無有也方書止有瘦胎飲一論而其方為湖陽公主治也寔非極至之言何者見有此方其難自若予族妹苦於難產後遇胎孕則觸而去之余甚憫焉視其形肥而勤於針指搆思旬日忽自悟曰此正與湖陽公主相反彼奉養之人其氣必寔耗其氣使和平故易產今形肥知其氣虛久坐知其不運而其氣愈弱久坐胞胎因母氣不能自運耳當補其母之氣則兒健而易產今其有孕至五六個月遂於大立方紫蘇飲加補氣藥與十數貼因得男而甚快後遂以此方隨母之形色性稟參以時令加減與之無不應者因名其方曰大達生散

難產胞損淋瀝論

常見尿胞因收生者不謹以致破損而得淋瀝病遂為廢疾一日有徐姓婦壯年得此因思肌肉破傷在外者且可補完胞雖在腹恐亦可治遂診其脉虛甚曰難產之由多是氣虛難產之後血氣尤虛試與峻補因以參朮為君芍歸為臣桃仁陳皮黃芪茯苓為佐而煎以猪羊胞中湯極飢時飲之但劑率用一兩至一月而安蓋是氣血驟長其胞自完恐稍遲緩亦難成功

胎婦轉胞病論

轉胞病胎婦之稟受弱者憂悶多者性急躁者食味厚者大率有之古方皆用滑利疎導藥鮮有應效因思胞為胎所墮展在一邊胞系了戾不通耳胎若舉起懸在中央胞系得疎水道自行然胎之墜下必有其由一日吳宅寵人患此脉之兩手似瀉重取則弦然左手稍和余曰此得之憂患瀉為血少氣多弦為有飲血少則胞弱而不能自舉氣多有飲中焦不清而溢則胞之所避而就下故墜遂以四物湯加參朮半夏陳皮生甘草生薑空心飲隨以指探喉中吐出藥汁俟少頃氣定又與一貼次早亦然如是與八貼而安此法未為的確恐偶中耳後又歷用數人亦效未知果如何耶仲景云婦人本肥盛且舉自滿全羸瘦且舉空減胞系了戾亦致胞轉其義未詳必有能知之者

乳硬論

乳房陽明所經乳頭厥陰所屬乳子之母不知調養怒忿所逆鬱悶所遏厚味所釀以致厥陰之氣不行故竅不得通而汁不得出陽明之血沸騰故熱甚而化膿亦有所乳之子膈有滯痰口氣放熱含乳而睡

熱氣所吹遂生結核於初起時便須忍痛揉令稍軟吃令汁透自可消散失此不治必成癰癤治法疎厥陰之滯以青皮清陽明之熱細研石膏行汗濁之血以生甘草之節消腫道其母以瓜萋子或加沒藥青橘葉皂角刺金銀花當歸或湯或散或加減隨意消息然須以少酒佐之若加以艾火兩三壯於腫處其效尤捷彼庸工喜於自銜使用針刀引惹拙痛良可哀憫若夫不得於夫不得於舅姑憂怒鬱悶斯又積累脾氣消阻肝氣橫逆遂成隱核如大暴子不痛不痒數十年後方為瘡陷名曰妳岩以其瘡形嵌凹似岩穴也不可治矣若於始生之際便能消釋病根使心清神安然後施之以治法亦有可安之理予族姪婦年十八時曾得此病察其形脉稍寔但性急躁伉儷自諧所難者後姑耳遂以本草單上青皮湯間以加減四物湯行以經絡之劑兩月而安

受胎論

成胎以精血之後先分男女者褚澄之論愚切感焉後閱李東垣之方有曰經水斷後一二日血海始淨精勝其血感者成男四五日後血脉已旺精不勝血感者成女此確論也易曰乾道成男坤道成女夫乾坤陰陽之情性也左右陰陽之道路也男女陰陽之儀象也父精母血因感而會精之施也血能攝精成其子此萬物資始於乾元也血成其胞此萬物資生於坤元也陰陽交媾胎孕乃凝所藏之處名曰子宮一系在上下有兩歧一達於左一達於右精勝其血則陽為主受氣於左子宮而男形成精不勝血則陰為主受氣於右子宮而女形成或曰分男分女吾知之矣男不可為父女不可為母與男女之兼形者又若何而分之耶余曰男不可為父得陽氣之虧者也女不可為母得陰氣之塞者也兼形者由陰為

駁氣所乘而成其類不一以女凶男有二一則遇男為妻遇女為夫一則可妻而不可夫其有女具男之全者此又駁之甚者或曰駁氣所乘獨見於陰而所乘之形又若是之不同耶予曰陰體虛駁氣易於乘也駁氣所乘陰陽相混無所為主不可屬左不可屬右受氣於兩歧之間隨所得駁氣之輕重而成形故所兼之形有不可得而同也

人迎氣口論

六陽六陰脉分屬左右手心小腸肝膽腎膀胱在左主血肺大腸脾胃命門三焦在右主氣男以氣成胎故氣為之主女以血成胎故血為之主若男子久病氣口充於人迎者有胃氣也病雖重可治女子久病人迎充於氣口者有胃氣也病雖重可治反此者逆或曰人迎在左氣口在右男女所同不易之位也脉法讚曰左大順男右大順女何子言之悖耶曰脉經一部王叔和藹藹於教醫者此左右手以醫者為主而言若主於病者美止千里之謬

春宣論

春蠢也陽氣升浮草木萌芽蠢然而動前哲謂春時人氣在頭有病宜吐又曰傷寒大法春宜吐宣之為言揚也謂吐之法自上出也今之世俗往往有瘡瘍者膈滿者蟲積以為不於春時宣瀉以毒藥不可愈也醫者遂用牽牛巴豆大黃枳殼防風輩為丸名之曰春宣丸於二月三月服之得下利而止於初瀉之時臟腑得通時暫輕快不知氣升在上則在下之陰甚弱而用利藥戕賊其陰其害何可勝言况仲景用承氣湯等下藥必有大滿大寔堅有燥屎轉失氣下逼迫而無表證者方行此法可下之證未悉其猶須

遲以待之泄利之藥其可輕試乎余伯考形肥骨瘦味厚性沉五十歲輕於聽信忽於三月半贖春宣丸一貼服之下兩三行每年率以為常至五十三歲時七月初炎熱之甚無病暴死此豈非妄認春宣為春瀉而致禍耶自上召下曰宣宣之一字吐也明矣張子和先生已詳論之昔賢豈妄言哉詳之審訂無疑後之死者又有數人愚故表而出之以為後人之戒

醕酒宜冷飲論

醕酒之性大熱大毒清香美味既適於口行氣和血亦宜於體由是飲者不自覺其過於多也不思肺屬金性畏火其體脆其位高為氣之主腎之母木之夫酒下咽膈肺先受之若是醕者理宜冷飲過於肺入於胃然後漸溫肺先得溫中之寒可以補氣一益也次得寒中之溫可以養胃一益也冷酒行遲傳化以漸不可恣飲三益也古人終日百拜不過三爵既無酒病亦免酒禍今余稽之於禮經則曰飲齊瓊冬時飲齊酒也視猶比也冬時寒也參之內經則曰熱因寒用厥旨深矣今則不然不顧受傷只圖取快益熱飲有三樂存焉膈滯通快喉舌辛美五行可多不知酒性喜升氣必隨之痰鬱於上溺澀於下肺受賊邪全體必燥恣飲寒涼其熱內鬱肺氣得熱必大傷耗其始也病淺或嘔吐或自汗或瘡癩或鼻壅或自泄或心脾痛尚可發散而去之若其久也為病深矣為消為渴為內疽為肺痿為內痔為鼓脹為失明或喘咳為勞嗽為癩癩亦為難明之病倘非具眼未易處治可不謹乎或曰人言一盞冷酒須二盞血乃得行酒不可冷飲明矣余曰此齊東之語耳今參之於經證之以理發之為規戒子以為迂耶

癰疽當分經絡論

六陽經六陰經之分布周身有多氣少血者有少氣多血者有多氣多血者不可一概論也若夫要害處近虛怯薄處前哲已曾論及惟分經之言未聞也何則諸經惟少陽厥陰經之生癰疽理宜預防以其多氣少血其血本少肌肉難長瘡久未合必成死證其有不思本經少血遂用驅毒利藥以伐其陰分之血禍不旋踵矣請述一二成敗之迹以告來者余從叔父平生多慮質弱神勞年近五十忽左膊外側廉上起一小紅腫大約如粟予視之曰慎勿輕視且生與人參大料作湯得二三斤為好人未之信謾進小貼數服未解而止旬餘值大風拔木瘡上起一道紅如線繞至背脾直抵右肋予曰必大料人參少如當歸川芎陳皮白朮等補劑與之後與此方兩閱月而安又東陽李元年踰三十形瘦膚厚連得憂慮又因作勞息過於色忽左腿外側廉上一紅腫其大如粟一醫問其大腑堅寔與承氣兩貼下之不效又一醫教與大黃硃砂生粉草麒麟竭又二三貼半月後召予視之曰事去矣又一李兄年四十餘而面稍白神甚勞忽脇下生一紅腫如桃一人教用神劑眾咲且排於是流氣飲十宣散雜而進之旬餘召予視之予曰非惟不與補藥抑且多得解利血氣俱備矣已而果然或曰太陽經非多血少氣者予何腎癱之生初無甚苦往往間有不救者吾子其能治之乎予曰腎居小腹之後而又在其下此陰中之陰也其道遠其位僻雖曰多血氣運不到氣既不到血亦罕來中年之後不可生癰繞有痛腫參之脉證但見虛弱便與滋補血氣無虧可保終吉若用尋常驅熱拔毒紓氣之藥虛虛之禍如指諸掌

脾約丸論

成無已曰約者結約之約胃強脾弱約束津液不得四布但輸膀胱故小便數而大便硬故曰脾約與此

丸以下脾之結燥腸潤結化津流入胃大便利小便少而愈矣愚切有疑焉何者既曰約脾弱不能運也脾弱則土虧矣必脾氣之散脾血之耗也原其所由久病天下大汗之後陰血枯槁內火燔灼熱傷元氣又傷於脾而成此證傷元氣者肺金受火氣無所攝傷脾者肺為脾之子肺耗則液竭必竊母氣以自救金耗則木寡於畏土欲不傷不可得也脾失轉輸之令肺失傳送之官宜大便秘而難下小便數而無藏蓄也理宜滋養陰血使孤陽之火不熾而金行清化木邪有制脾土清健而運行精液乃能入胃則腸潤而通矣今以大黃為君枳寔厚朴為臣雖有芍藥之養血麻仁杏仁之溫潤為之佐使用之熱甚而氣寔者無有不安愚恐西北二方地氣高厚人稟壯寔者可用若用於東南之人與熱雖盛而血氣不寔者雖得暫通將見脾愈弱而腸愈燥矣後之欲用此方者須知在西北以開結為主在東南以潤燥為主慎勿膠柱而調瑟

鼓脹論

心肺陽也居上肝腎陰也居下脾居中亦陰也屬土經曰飲食入胃游溢精氣上輸於脾脾氣散精上歸於肺通調水道下輸膀胱水精四布五經並行是脾具坤靜之德而有乾健之運故能使心肺之陽降腎肝之陰升而成天地交之泰是為無病之人今也七情內傷六淫外侵飲食不節房勞致虛脾土之陰受傷轉輸之官失職胃雖受穀不能運化故陽自升陰自降而成天地不交之否於斯時也清濁相混隨道壅塞氣化濁血瘀鬱而為熱熱留而久氣化成濕濕熱相生遂成脹滿經曰鼓脹是也以其外雖堅滿中空無物有侶於鼓其病膠固難以治療又名曰蠱若蠱侵蝕有蠱之義驗之治法理宜補脾又須養肺金

以制水使脾無賊邪之慮滋腎水以制火使肺得清化之令却鹽味以防助邪斷妄想以保母氣無有不
安醫不察病起於虛急於作效銜能希賞病者苦於脹急喜行利藥以求一時之快不知寬得一日半日
其腫愈甚病邪甚矣真氣傷矣去死不遠古方惟禹餘糧丸又名石中黃丸又名紫金丸制肝補脾殊為
切當亦須隨證亦須順時加減用之余友俞仁叔儒而醫連得家難年五十得此疾自制禹餘糧丸服之
予診其脉弦濇而數緊此丸新製煅煉之火邪尚存濕熱之藥太多宜自加減不可執方俞笑曰今人不
及古人此方不可加減服之一月口鼻見血色骨立而死又楊兄年近五十性嗜好酒病瘥半年患脹病
自察必死來求治診其脉弦而濇重則大瘥未愈手足瘦而腹大如蜘蛛狀予教以參朮為君當歸川芎
芍藥為臣黃連陳皮茯苓厚朴為佐生甘草些少作濃湯飲之一日定三次彼亦嚴守戒忌一月後瘥因
汗而愈又半年小便長而脹愈中間稍有加減大意只是補氣行濕又陳氏年四十餘性嗜酒大便時見
血於春間意脹色黑而腹大具形如鬼診其脉數而濇重似弱予以四物湯加黃連黃芩木通白朮陳皮
厚朴生甘草作湯與之近一年而安一補氣一補血餘藥大率相出入皆獲安以保天壽或曰氣無補法
何子補氣而獲安果有說以通之子予曰氣無補法世俗之言也以氣之為病痞悶雍塞似難於補恐增
病勢不思正氣虛者不能連行邪滯所著而不出所以為病經曰壯者氣行則愈怯者著而成病苟或氣
怯不用補法氣何由行或曰子之藥審則審矣何效之遲也病者久在牀枕必將厭子之迂而求速者矣
予曰此病之起或三五年或十餘年根深矣孰篤矣欲求速效自求禍耳知王道者能治此病也或曰脹
病將終不可與藥利耶予曰灼知其不因於虛受病亦淺脾胃尚壯積滯不痼而又有可下之證亦宜略

與疏導若授張子和瀋川散禹功丸為例行迅攻之策寔所不敢

疝氣論

疝氣之甚者罌丸連小腹急痛也有痛在罌丸者有痛在五樞穴邊者皆足厥陰之經也或有形或無形或有聲或無聲有形如瓜有聲如蛙自素問以下歷代名醫皆以為寒蓋寒主收引經絡得寒故引不行所以作痛理固然也有得寒而無疝者又必有說以通之可也予嘗屢因門戶雪上有霜沒臍之水踢水徒涉不曾病此以子素無熱在內也因而思之此證始於濕熱在經鬱而至久又得寒氣外束濕熱之邪不得疎散所以作痛若只作寒論恐為未備或曰厥陰一經其道遠其位卑鬱積濕熱何由而致予曰大勞則火起於筋醉飽則火起於胃房勞則火起於腎大怒則火起於肝本經火積之久母能生子虛濕氣便盛厥陰屬木係於肝為將軍之官其性急速火性且又暴為寒所束宜其痛之大暴也愚見有用烏頭梔子等分作湯用之其效亦敏後因此方隨證與形加減用之無有不應然濕熱又須分多少而始治但濕者腫多癩病是也又有挾虛而發者當以參朮為用而以疎導藥佐之診其脉有甚沈緊而大豁無力者是也其痛亦輕惟覺重墜牽引耳

秦桂丸論

無子之因多起於婦人醫者不求其因起於何處遍閱古方惟秦桂丸其辭確且意專用藥溫熱近乎人情欣然授之銳然服之甘受播均之禍猶且惜然不悔何者陽精之施也陰血能攝之精成其子血成其胞胎孕乃成今婦人之無子者率由血少不足以攝精也血之少也固非一端然欲得子者必須補其陰

格致餘論

血使無虧欠乃可推其有餘以成胎孕何乃輕用熱劑煎熬臟腑血氣沸騰禍不旋踵矣或曰春氣溫和則萬物發生冬氣寒凜則萬物消殞非秦桂丸之溫熱何由得子腸溫煖而成胎耶予曰詩言婦人和平則樂有子和則氣血不乖平則陰陽不爭今得此藥經血轉紫黑漸成衰少或先或後始則飲食驟進久則口苦而乾陰陽不平血氣不和疾病蜂起焉能成胎縱使成胎生子亦多病而不壽以秦桂丸之耗損夫天真之陰也戒之慎之鄭廉使之子年十六求醫曰我生七箇月患淋病五日七日必一發其發也大痛捫地叫天水道方行狀如漆和粟者約一盞許然後定診其脈輕則溇重則弦視其形瘦而稍長其色青而蒼意其父必因多服下部藥遺熱在胎留於子之命門而然遂以紫雪和黃藥細末凡梧子大晒十分乾而與二百丸作一服率以熱湯下以食物壓之又經半日痛大作連腰腹水道乃行下如漆和粟者一大碗許其病減十分之八後張子忠以陳皮一兩桔梗木通各半兩作一貼與之又下漆粟者一合許遂安父得燥熱且能病子況母得之者乎余書此以證東垣紅絲瘤之事

惡寒非寒病惡熱非熱病論

經曰惡寒戰慄皆屬於熱又曰禁慄如喪神守皆屬於火惡寒者雖當炎月若遇風霜重綿在身自覺凜凜戰慄禁慄動搖之貌如喪神守惡寒之甚原病式曰病熱甚而反覺自冷此為病熱寔非寒也或曰往往見有得熱藥而少愈者何也予曰病熱之人其氣炎上鬱為痰飲遏清道陰氣不升病熱尤甚積痰得熱亦為暫退熱勢助邪其病益深或曰寒熱如此誰敢以寒涼與之非殺之而何予曰古人遇戰慄之證有以大承氣下燥查而愈者惡寒戰慄明是熱證但有虛寒之分耳經曰陰虛則發熱夫陽在外為陰

之衛陰在內為陽之守精神外馳嗜慾無節陰氣耗散陽無所附遂致浮散於肌表之間而惡熱也豈非有熱當作陰虛治之而用補養之法可也或曰惡寒非寒宜用寒藥惡熱非熱宜用補藥甚駭耳目明示我之法可乎予曰進士周本道年踰三十得惡寒病服附子數日而病甚求予治診其脈弦而促緩予以江茶入薑汁香油些少吐痰一升許減綿大半周是喜予曰未也燥熱已多血傷亦深須淡食以養胃內觀以養神則水可生而火可降彼勇於仕進一切務外不守禁忌予曰若多與補血涼熱亦可稍安內外不靜腎水不生附毒必發病安後官於婺城巡夜冒寒非附子不可療而性怕生薑只得以前腰子作片煮附子與三貼而安予曰可急歸知其附毒易發彼以為迂半年後果發背而死又司丞叔平生脚自蹠以下常覺熱冬不可加綿於上常自言曰我稟質壯不怕冷予曰此足三陰之虛宜早斷欲事以補養陰血庶乎可免咲而不答年方五十患痿半年而死觀此二人治法益可知矣或曰傷寒病惡寒惡熱者亦是虛耶予曰若病傷寒者自外入內先賢論之詳矣

經水或紫或黑論

經水者陰血也陰必從陽故其色紅稟火色也血為氣之配氣熱則熱氣寒則寒氣升則升氣降則降氣凝則凝氣滯則滯氣清則清氣濁則濁往往見有成塊者氣之凝也將行而痛者氣之滯也來後作痛者氣血俱虛也色淡者亦虛也錯經妄行者氣之亂也紫者氣之熱也黑者熱之甚也人但見其紫者黑者作痛者成塊者率指為風冷而行溫熱之劑禍不旋踵矣良田病源論月水諸病皆曰風冷乘之宜其相習而成俗也或曰黑北方水之色也紫淡於黑非冷而何予曰經曰亢則害承乃制熱甚者必兼水化所

以熱則紫甚則黑也况婦人性執而見鄙嗜欲加倍臟腑厥陽之火無日不起非熱而何若夫風冷必須外得設或有之蓋千百而一二者也

石膏論

本草藥之命名固有不可曉者中間亦多有意義學者不可以不察以色而名者大黃紅花白前青黛烏梅之類是也以形而名者人參狗脊烏頭貝母金鈴子之類是也以氣而名者木香沉香檀香麝香茴香之類是也以質而名者厚朴乾薑茯苓生地黃之類是也以味而名者甘草苦參淡竹葉皂龍胆苦酒之類是也以能而名者百合當歸升麻防風滑石之類是也以時而名者半夏茵陳冬葵寅雞夏枯草之類是也以石膏火煨細研醋調封丹爐其固密甚於脂苟非有膏焉能為用此兼質與能而得名正與石脂同意闡孝忠妄以方解石為石膏况石膏其味甘而辛本陽明經藥陽明主肌肉其甘也能緩脾益氣止渴去火其辛也能解肌出汗上行至頭又入手太陰手少陽彼方解石者止有體重質堅性寒而已求其所謂有膏而可為三經之主治者焉在哉醫欲責效不亦難乎

脉火必病進論

脉血之所為屬陰大洪之別名火之象屬陽其病得之於內傷者陰虛為陽所乘故脉大當作虛治之其病得之於外傷者邪客於經脉亦大當作邪勝治之合二者而觀之皆病證方長之勢也謂之病進不亦宜乎海藏云君侵臣之事也孰為是否幸有以教之

禮記曰一年視離經謂離析經理在乎章句之絕內經生氣通天論病因四章第一章論因於寒欲如運樞以下三句與上文意不相屬皆衍文也體若燔炭汗出而散兩句當移在此夫寒邪初客於肌表邪鬱而為熱有似燔炭得汗則解此仲景麻黃湯之類是也第二章論因於暑暑者君火為病火主動則散故自汗煩渴而多言也第三章論因於濕濕者土濁之氣首為諸陽之會其位高而氣清其體虛故聰明得而條焉濁氣重寒清道不通沉重而不爽利似乎有物以蒙冒之失而不治濕鬱為熱熱留不去大筋輒短者熱傷血不能養筋故為拘攣小筋弛長者濕傷筋不能束骨故為痿弱因於濕首如裹各三字為句濕熱不攘以下各四字為句文正而意明第四章論因於氣為腫下文不序病證蓋是脫簡四維相代二句與上文意不相屬亦衍文也王太僕曰暑熱濕氣三病皆以為發於傷寒之毒次第相仍展轉生病五段通為一章余有疑焉暑病不治伏而生熱熱久生濕濕久氣病益有之矣內經止有冬傷於寒不即病至夏有熱病之言未聞寒毒伏藏至夏發於暑病至於濕病亦蒙上文之熱謂反濕其首望濕物裹之望除其熱當以因於濕首為句如裹濕又為句則濕首之濕裹濕之濕皆人為也與上下文列言寒暑之病因文義舛乖不容於不辯或曰先賢言溫濕寒濕風濕矣未聞有所謂濕熱病者攻之內經亦無有焉吾子無乃失之迂妄耶子曰六氣之中濕熱為病十居八九內經發明濕熱此為首出至真大要論曰濕上甚而熱其間或言濕而熱在中者或曰熱而濕在中者此聖人愛人論道之極致使天下後世不知濕熱之治法者太僕啟之也君其歸取原病式熟讀而審思之幸甚

太僕章句

因於寒欲如運樞起居如驚神氣乃浮

因於暑汗煩則喘喝靜則多言體若燔炭汗出而散

因於濕首句如裹濕句熱不攘句大筋輒短小筋弛長輒短為拘弛長為痿

因於氣為腫云

新定章句

因於寒體若燔炭汗出而散

因於暑汗煩喘喝靜則多言

因於濕句首如裹句濕熱不攘句大筋輒短小筋弛長輒短為拘弛長為痿

因於氣為腫云云

倒倉論

經曰腸胃為市以其無物不有而穀為最多故謂之倉若積穀之室也倒者傾去積舊而滌濯使之潔淨也胃居中屬土喜容受而不能自運者也人之飲食過適口之物益無過量而傷積之乎七情之偏五味之厚益無傷於冲和之德乎糟粕之餘停痰瘀血互相糾纏日積月深鬱結成聚甚者如核桃之穰諸般奇形之蟲中宮不清矣土德不和矣誠於中形於外發為癱瘓為勞瘵為盡脹為癩疾為無名奇病先哲製為萬病丸溫白丸等劑攻補兼施寒熱並用期中病情非不工巧然不若倒倉之為便捷也以黃牡牛擇肥者買一二十斤長流水煮糜爛融入湯中為夜以布漚出渣滓取淨汁再入鍋中文火熬成琥珀色

則成矣每飲一種少時又飲如此者積數十鐘寒自則重湯溫而飲之病在上者欲其吐多病在下者欲其利多病在中者欲其吐下俱多全在活法而為之緩急多寡也須先置一空明快而不通者以安病人視所出之物可盡病根則止吐利後或渴不得與湯具小便必長取以飲病者名曰輪迴酒與一二碗非惟可以止渴抑且可以滌濯餘垢雖一二日覺飢甚乃與粥淡食之待三日後始與少菜羹自養半月覺精神煥發形體輕健沈疴悉安矣其後須五年忌牛肉吾師許文懿始病心痛用藥燥熱香辛如丁香桂姜輩治數十年而足攣痛甚且惡寒而多嘔甚而至於靈砂黑錫黃芽歲丹繼之以艾火十餘萬又雜治數年而痛甚自分為廢人矣眾工亦技窮矣如此者又數年因其煩渴惡食者一月以通聖散與半月餘而大腑逼迫後重肛門熱氣如燒始時下積滯如五色爛錦者如樞燭油凝者近半月而病似退又半月而畧思穀而兩足難移計無所出至次年三月遂作此法節節如應因得為全人次年再得一男又十四年以壽終其餘與樂一婦人久年腳氣吐利而安又鎮海萬戶蕭伯善公以便濁而精不禁親與試之有效又臨海林兄患久嗽吐紅發熱消瘦眾以為瘵百方不應召子視之脉兩手弦數日輕夜重計無所出亦因此而安時冬月也第二年得一子牛坤土也黃土之色也以順為德而效法乎健以為功者壯之用也肉者胃之樂也熟而為液無形之物也橫散入肉絡由腸胃而滲透肌膚毛竅爪甲無不入也積聚久則形質成依附腸胃回薄曲折處以為栖泊之巢而阻碍津液氣血熏蒸燔灼成病自非剖腸刮骨之神妙孰能去之又宜合勺銖兩之丸散所能窺犯其藩牆戶牖乎竊詳肉液之散溢腸胃受之其厚皆倍於前有似乎腫其回薄曲折處非復向時之舊肉液充滿流行有如洪水泛漲其浮莖陳朽皆推逐蕩漾順

流而下不可停留表者因吐而汗清道者自吐而涌濁道者自泄而去凡屬滯碍一洗而定牛肉全重厚和順之性盎然渙然潤澤枯槁補益虛損益無精神溢發之樂乎正似武王克商之後散財發粟以賑股民之仰望也其方出於西域之異人人於中年後亦行一二次亦却疾養壽之一助也

相火論

太極動而生陽靜而生陰陽動而變陰靜而合而生水火木金土各一具性惟火有二曰君火人火也曰相火天火也火內陰而外陽主乎動者也故凡動皆屬火以名而言形氣相生配於五行故謂之君以位於動皆相火之為也見於天者出於龍雷則木之氣出於海則水之氣也具於人者寄於肝腎二部肝屬木而腎屬水也胆者肝之腑膀胱者腎之腑心胞絡者腎之配三焦以焦言而下焦司肝腎之分皆陰而下者也天非此火不能生物人非此火不能有生天之火雖出於木而皆本乎地故雷非伏龍非蟄海非附於地則不能鳴不能飛不能波也鳴也飛也波也動而為火者也肝腎之陰悉具相火人而同乎天也或曰相火天人之所同何東垣以為元氣之賊又曰火與元氣不兩立一勝則一負然則如之何而可以使之無勝負也曰周子曰神發知矣五性感物而萬事出有知之後五者之性為物所感不能不動謂之動者即內經五火也相火易起五性厥陽之火相扇則妄動矣火起於妄變化莫測無時不有煎熬真陰陰虛則病陰絕則死君火之氣經以暑與濕言之相火之氣經以火言之蓋表其暴悍酷烈有甚於君火者也故曰相火元氣之賊周子又曰聖人定之以中正仁義而主靜朱子曰必使道心常為一身之主而

人心每聽命焉此善處乎火者人心聽命乎道心而又能主之以靜彼五火之動皆中節相火惟有裨補造化以為生生不息之運用耳何賊之有或曰內經相火注曰少陰少陽矣未嘗言及厥陰太陽而吾子言之何邪曰足太陽少陰東垣嘗言是矣治以炒蘖取其味辛能瀉水中之火是也戴人亦言胆與三焦專火治肝和胞絡都無異此厯指龍雷之火也予亦備述天人之火皆生於動如上文所云有寔推廣二公之意或曰內經言火不一往往於六氣見之言臟腑者未之見也二公豈它有所據耶予能為我言之乎經曰百病皆生於風寒暑濕燥火之動而為變者岐伯歷舉病機一十九條而屬火者五此非相火之為病之出於臟腑者乎攷諸內經少陽病為瘧疾太陽病時眩仆少陰病脅脊痠鬱冒不知人非諸熱發瘧之屬火乎少陽病惡寒鼓慄胆病振寒少陰病洒淅惡寒振慄厥陰病洒淅振寒非諸禁鼓慄如喪神瘧之屬火乎少陽病嘔逆厥氣上行膀胱病衝頭痛太陽病厥氣上衝胸小腹控暈引腰脊上衝心少陰病氣上衝胸嘔逆非諸逆衝上之屬火乎少陽病癰妄太陽病癰妄膀胱病狂顛非諸躁狂越之屬火乎少陽病胸腫善驚少陰病脅熱以酸肘腫不能久立非諸病胸腫疼酸驚駭之屬火乎又原病式曰諸風掉眩屬於肝火之動也諸氣憤鬱病痿屬於肺火之升也諸濕腫滿屬於脾火之勝也諸痛痒瘡瘍屬於心火之用也是皆火之為病出於臟腑者然也注文未之發耳以陳無擇之通敏且以暖熾論君火日用之火言相火而又不曾深及宜乎後之人不無聾瞽也悲夫

左大順男右大順女論

肺主氣其脉居右寸脾胃命門三焦各以氣為變化運用故皆附焉心主血其脉居左寸肝胆腎膀胱皆

精血之隧道完庫故亦附焉男以氣成胎則氣為之主女決血成胎則血為之主男子久病右脉充於左者有胃氣也病雖重可治女子久病左脉充於右者有胃氣也病雖重可治反此者虛之甚也或曰左心小腸肝胆腎膀胱右肺大腸脾胃命門三焦男女所同不易之位也脉法贊曰左大順男右大順女吾子之言非惟左右倒置似以大為充果有說以通之乎曰大本病脉也今以大為順蓋有充足之義故敢以充言之脉經一部諳諳於枚為醫者爾此左右當以醫者為言若主於病莫止於千里之謬或曰上文言肝心出左脾肺出右左主司官右主司府下文言左為人迎右為氣口皆以病人之左右而為言何若是之相反耶曰脉經第九篇之第五章上文大浮數動長滑沉澹弱弦短微此言形狀之陰陽下文闕前關後等語又言部位之陰陽陰附陽陽附陰皆言血氣之陰陽同為論脉之陰陽而所指不同若此上下異文何足疑乎讚曰陰病治官非治血乎陽病治府非治氣乎由此參考或恐於經意有合

如淡論

或問內經謂精不足者補之以味又曰地食人以五味古者年五十食肉子今年邁七十矣盡却鹽醢豈中道乎何子之神茂而色澤也曰味有出於天賦者有成於人為者天之所賦者若穀菽菜果自然沖和之味有食人補陰之功此內經所謂味也人之所為者皆烹飪調和偏厚之味有致疾伐命之毒此吾子所疑之味也今鹽醢之却非真如淡者大麥與粟之鹹粳米山藥之甘蔥薤之辛之類皆味也子以為淡乎安於沖和之味者心之收火之降也以偏厚之味為安者欲之縱火之勝也何疑之有內經又曰陰之所生本在五味非天賦之味乎陰之五官傷在五味非人為之味乎聖人防民之具於是為備凡人飢則

必食彼粳米甘而淡者土之德也物之屬陰而最補者也惟可與米同進經以菜為充者恐於飢時頓食或慮過多因致胃損故以菜助其充足取其疏通而易化此天地生物之仁也論語曰肉雖多不使勝食氣傳曰實主終日百拜而酒三行以避酒禍此聖人施教之意也蓋穀與肥鮮同進厚味得穀為助其積之也久虛不助陰火而致毒乎故服食家在卻穀者則可不却穀而服食未有不被其毒者內經謂久而增氣物化之常氣增而久天之由也彼安於厚味者未之思爾或又問精不足者補之以味何不言氣補曰味陰也氣陽也補精以陰求其本也故補之以味若甘草白朮地黃澤瀉五味子天門冬之類皆味之厚者也經曰虛者補之正此意也上文謂形不足者溫之以氣夫為勞倦所傷氣之虛故不足溫者養也溫存以養使氣自充氣完則形完矣故言溫不言補經曰勞者溫之正此意也彼為局方者不知出此凡諸虛損證悉以溫熱佐輔補藥名之曰溫補不能求經旨者也

吃逆論

吃病氣逆也氣自臍下直衝上出於口而作聲之名也書曰火炎上內經曰諸逆衝上皆屬於火東垣謂火與元氣不兩立又謂火氣之賊也古方悉以胃弱言之而不及火且以丁香柿蒂竹茹陳皮等劑治之未審孰為降火孰為補虛人之陰氣依胃為養胃土傷損則木氣侮之矣此土敗木賊也陰為火所乘不得內守木挾相火乘之故直衝清道而上言胃弱者陰弱也虛之甚也病人見此似為死證然亦有寔者不可不知敢陳其說趙立道年近五十質弱而多怒七月炎暑大飢索飯其家不能急具因大怒兩日後得滯下病口渴自以冷水調生蜜飲之甚快滯下亦漸緩如此者五七日召子視脉稍大不數遂令止蜜

水渴時但令人參白朮煎湯調益元散與之滯下亦漸收七八日後覺倦甚發吃予知其因下久而陰虛也令其守前藥然滯下尚未止又以煉蜜飲之如此者三日吃猶未止衆皆尤藥之未當將以薑附飲之子曰補藥無速效附子非補陰者服之必死衆曰冷水飯多得無寒乎子曰炎暑如此飲涼非寒多多疑待以日數力到當自止又四日而吃止滯下亦安又陳擇仁年近七十厚味之人也有久喘病而作止不常新秋患滯下食大減至五七日後吃作召子視脉皆大豁衆以為難予曰形瘦者尚可為以人參白朮湯下大補丸以補血至七日而安此二人者虛之為也又一女子年踰笄性躁味厚暑月因大怒而吃作每作則舉身跳動神昏不知人問之乃知暴病視其形氣俱寔遂以人參蘆煎湯飲一椀大吐頑痰數椀大汗昏睡一日而安人參入手大陰補陽中之陰者也蘆則反爾大瀉大陰之陽女子暴怒氣上肝主怒肺主氣經曰怒則氣逆氣因怒逆肝木乘火侮肺故吃大作而神昏參蘆喜吐痰盡氣降而火衰金氣復位胃氣得和而解麻黃發汗節能止汗穀屬金糠之性熱麥屬陽魁之性涼先儒謂物物具太極學者其可不觸類而長引而伸之乎

房中補益論

或問千金方有房中補益法可用否子應之曰傳曰吉凶悔吝生乎動故人之疾病亦生於動其動之極也病而死矣人之有生心為火居上腎為水居下水能升而火能降一升一降無有窮已故生意存焉水之體靜火之體動動易而靜難聖人於此未嘗忘言也儒者立教曰正心收心養心皆所以防此火之動於妄也醫者立教恬澹虛無精神內守亦所以遏此火之動於妄也蓋相火藏於肝腎陰分君火不妄動

相火惟有稟命守位而已。馬有燔灼之虐，鯨飛走之狂，勢也。哉！易兌取象於少女，兌說也。遇少男，艮為巽，成無心之感也。艮止也。房中之法，有艮止之義焉。若艮而不止，徒有成賊何補益之有。竊詳千金之意，彼壯年貪縱者，水之體非向日之靜也。故著房中之法，為補益之助。此可用於實壯心靜遇敵不動之人也。苟無聖賢之心，神仙之骨，未易為也。女法水，男法火，水能制火，一樂於與，一樂於取，此自然之理也。若以房中為補，殺人多矣。况中古以下，風俗日偷，資言百端，說夢向癡，難矣哉。

天氣屬金說


邵子曰：天依地，地依天，天也。自相依附，內經曰：大氣舉之也。夫自清濁肇分，天以氣運於外，而攝水地以形居其中，浮於水者，也是氣也。即天之謂也。自其無極者觀之，故曰：大氣至清，至剛，至健，屬乎金者也。非至剛不能攝此水，非至健不能運行無息以舉地之重，非至清其剛健不能長上古而不老。或曰：子以天氣為屬金者，固易卦取象之義。何至遂以屬金言之乎？善言天者，必有證於人。善言人者，必有證於小。願明以告我。曰：天生萬物，人為貴。人形象天，可以取譬。肺主氣，外應皮毛，內經謂陽為外衛，非皮毛乎？此天之象也。其色黑，骨肉腑臟於其中，此地之象也。血行於皮裡肉腠，晝夜周流無端，此水之象也。合三者而觀，非水浮地，天攝水，地懸於中乎？聖人作易，取金為氣之象，厥有旨哉。

張子和攻邪注論

愚聞張子和書，惟務攻邪，其意以為正氣不能自病，因為邪所客，所以為病也。邪去正氣自安，因病有在上，在中，在下，深淺之不同，立為汗吐下三法以攻之。初看其言，將謂醫之法盡於是矣。後因思內經有謂

之虛者精氣虛也謂之寔者邪氣寔也夫邪所客必因正氣之虛然後邪得而客之苟正氣寔邪無自入之理由是於子和之法不能不致疑於其間又思內經有言陰平陽秘精神乃治陰陽離決精氣乃絕又思仲景有言病當汗解診其尺脉濇當與黃芪建中湯補之然後汗之於是以子和之書非子和之筆也馳名中土其法必有過於明輩者何其書之所言與內經仲景之意若是之不同也於是決意於得名師以為之依歸發其茅塞遂游江湖但聞某處有某治醫便往拜而問之連經數郡無一人焉後到定城始得原病式東垣方藁乃大悟子和之孟浪然終未得的然之議論將謂江浙間無可為師者泰定乙丑夏始得聞羅太無并陳芝岩之言遂往拜之蒙叱罵者五七次越越三閱月始得降接因觀羅先生治一病僧黃瘦倦怠羅公診其病因乃蜀人出家時其母在堂及遊浙右經七年忽一日念母之心不可遏欲歸無腰纏徒爾朝夕西望而泣以是得病時僧二十五歲羅令其隔壁泊宿每日以牛肉猪肚甘肥等煮糜爛與之凡經半月餘且時以慰諭之言勞之又曰我與鈔十錠作路費我不望報但欲救汝之死命爾察其形稍甦與桃仁承氣一日三貼下之皆是血塊痰積方止次日只與熟菜稀粥將息又半月其人遂好故又半月餘與鈔十錠遂行因大悟攻擊之法必其人充寔稟質本壯乃可行也否則邪去而正氣傷小病必重重病必死羅每日有求醫者來必令其診視脉壯回稟羅但卧聽口授用某藥治某病以某藥益某藥以某藥為引經往來一年半並無一定之方至於一方之中自有攻補兼用者亦有先攻後補者有先補後攻者又大悟古方治今病馬能昭合隨時取中具此之謂乎是時羅又言用古方治今病正如拆舊屋接新屋其材木非一不再經匠氏之手其可用乎由是又思許學士釋微論曰予讀仲景書用仲景

之法然未嘗守仲景之方乃為得仲景之心也遂取東垣方彙手自抄錄乃悟治病入當如漢高祖蹤秦
暴周武王蹤商之後自非發財散粟與三章之法其受傷之氣倦憊之人何由而平復也於是定為陰易
之陽易凡攻擊宜詳審正氣須保護以局方為戒哉



局方發揮

金華 朱彥脩 撰

新安 吳中珩 校

和劑局方之為書也可以據證檢方即用藥不必求醫不必修制尋贖見成丸散病痛便可安痊仁民之意可謂至矣自宋迄今官府守之以為法醫門傳之以為業病者恃之以立命世人習之以成俗然子竊有疑焉何者古人以神聖工巧言醫又曰醫者意也以其傳授雖的造詣雖深臨機應變如對敵之將操舟之工自非盡君子隨時反中之妙益無愧於醫乎今乃集前人已效之方應今人無限之病何異刻舟求劍按圖索驥莫其偶然中難矣

或曰仲景治傷寒者三百一十三方治雜病者金匱要略曰二十有三門歷代名方汗牛充棟流傳至今明效大驗顯然耳目今吾子致疑於局方無乃失之謬妄乎

予曰醫之視病問證已得病之情矣然病者一身血氣有淺深體段有上下臟腑有內外時月有久近形志有苦樂肌膚有厚薄能毒有可否標本有先後年有老弱治有五方令有四時某藥治某病某經用某藥孰為正治反治孰為君臣佐使合是數者計較分毫議方治療貴乎適中今觀局方別無病源議論止於各方條述證候繼以藥石之分兩修製藥餌之法度而又勉其多服常服久服殊不知一方通治諸病似乎立法簡便廣絡原野冀獲一二盜免許學士之謂乎仲景諸方是萬世醫門之規矩準繩也後之欲為方圓平直者必於是而取則焉然猶設為問難藥作何應處以何法許學士亦曰我善讀仲景書而知局方發揮

其意然未嘗全用其方局方制作將擬仲景耶故不揣荒陋敢陳管見倘蒙改而正諸寔為醫道之幸今世所謂風病大率與諸痿證滾同論治良由局方多以治風之藥通治諸痿也古聖論風論痿各有篇目源流不同治法亦異不得不辨按風論風者百病之長至其變化乃為他病又曰善行數變曰因於露風曰先受邪曰在腠理曰客曰入曰傷曰中歷陳五臟與胃之傷皆多汗而惡風其發明風邪係外感之病有臟腑內外虛寒寒熱之不同若是之明且盡也別無癱瘓痿弱卒中不省僵仆喎斜攣縮眩運語澁不語之文新舊所錄治風之方凡十道且即至寶丹靈寶丹論之曰治中風不語治中風語澁夫不語與語澁其可一例看乎有失音不語有舌強不語有神昏不語有口禁不語有舌縱語澁有舌麻語澁治大腸風祕祕有風熱有風虛曾謂一方可通治乎又曰治口鼻血出夫口鼻出血皆是陽盛陰虛有升無降血隨氣上越出上竅法當補陰抑陽氣降則血歸經豈可以輕揚飛竄之腦麝佐之以燥悍之金石乎又曰治皮膚燥痒經曰諸痒為虛血不榮肌腠所以痒也當與滋補藥以養陰血血和肌潤痒自不作豈可以一十七兩重之金石佐以五兩重之腦麝香桂而欲以一兩重之當歸和血一升之童便活血一升之生地黃汁生血夫枯槁之血果能和而生乎果能潤澤肌肉之乾瘦乎又曰治難產死胎血脈不行此血氣滯病也又曰治神昏恍惚久在床枕此血氣虛弱也夫治血以血藥治虛以補藥彼燥悍香竄之劑固可以劫滯氣果可以治血而補虛乎潤體丸等三十餘方皆曰治諸風治一切風治一應風治男子三十六種風其為主治甚為浩博且寒熱虛寔判然迥別一方通治果合經意乎果能去病乎龍虎丹排風湯俱係治五臟風而排風又曰風發又似有內出之意夫病既在五臟道遠而所感深一則用麻黃三兩以發

其表一則用腦麝六兩以瀉其衛而謂可以治臟病乎借曰在龍虎則有寒水石一斤以為鎮墜在排風則有白朮當歸以為補養此殆與古人輔佐因用之意合吁臟病屬裡而用發表瀉衛之藥益不犯誅伐無過之戒乎寧不助病邪而伐根本乎骨碎補丸治肝腎風虛乳香宣經丸治體虛換腿丸治足三陰經虛或因感風而虛或因虛而感風既曰體虛肝腎虛足三陰經虛病非輕小理宜補養而自然銅半夏葳靈仙荆芥地龍川練烏藜防風牽牛靈脂草烏羌活石南天麻南星檳榔等疏通燥疾之藥居補劑之大半果可以補虛乎七聖散之治風濕流注活血應痛丸之治風濕客腎經衛汗以散風導水以行濕仲景法也觀其用藥何者為散風何者謂行濕吾不得而知也三生飲之治外感風寒內傷喜怒或六脉沉伏或指下浮盛及痰厥氣虛大有神效治外感以發散仲景法也治內傷以補養東垣法也誰能易之脉之沉伏浮盛其寒熱表裡虛實之相遠若水火然似難同藥痰厥因於寒或能成功血氣虛者何以收效已上諸疑特舉其顯者耳若毫分縷析更僕未可盡也姑用真之妄言

或曰吾子謂內經風論主於外感其用麻黃桂枝烏附輩將以解風寒也其用腦麝葳靈仙黑牽牛輩將以行凝滯也子之言過矣

予應之曰風邪外感善行數變其病多寡少虛發表行滯有何不可治風之外何為又歷述神魂恍惚起便須人手足不隨神志昏憤癱瘓痲痺手足筋衰眩運倒仆半身不遂腳膝緩弱四肢無力顫掉拘攣不語語澁諸痿等證悉皆治之攷諸痿論肺熱葉焦五臟因而受之發為痿躄心氣熱生脉痿故脛縱不任地肝氣熱生筋痿故宗筋弛縱脾氣熱生肉痿故痺而不仁腎氣熱生骨痿故足不任身又曰諸痿皆屬

以內傷熱證滾同出治其為害也似非細故

或曰風分內外痿病因熱既得聞命矣手陽明大腸經肺之腑也足陽明胃經脾之腑也治痿之法取陽明一經此引而未發之言願明以告我

予曰諸痿生於肺熱只此一句便見治法大意經曰東方實西方虛瀉南方補北方此固是就生尅言補瀉而大經大法不外於此東方木肝也西方金肺也南方火心也北方水腎也五行之中惟火有二腎雖有二水居其一陽常有餘陰常不足故經曰一水不勝二火理之必然肺全體燥而居上主氣畏火者也脾土性濕而居中主四肢畏木者也火性炎上若嗜慾無節則水失所養火寡於畏而侮所勝肺得火邪而熱矣木性剛急肺受熱則金失所養木寡於畏而侮所勝脾得木邪而傷矣肺熱則不能管攝一身脾傷則四肢不能為用而諸痿之病作瀉南方則肺金清而東方不實何脾傷之有補北方則心火降而西方不虛何肺熱之有故陽明是則宗筋潤能束骨而利機關矣治痿之法無出於此駱隆吉亦曰風火既熾當滋腎水東垣先生取黃蘗為君黃芪等補藥之輔佐以治諸痿而無一定之方有兼痰積者有濕多者有熱多者有濕熱相半者有挾氣者臨病製方其善於治痿者乎雖然約中肯綮矣若將理失宜聖醫固不治也天產作陽厚味發熱先哲格言但是患痿之人若不淡薄食味吾知其必不能安全也

或曰小續命湯與要略相表裡非外感之藥乎地仙丹治勞傷賢慮非內傷之藥乎其將何以議之

予曰小續命湯比要畧少當歸石膏多附子防風防已果與仲景意合否也仲景謂汗出則止藥局方則曰久服差又曰久病風陰晦時更宜與又曰治諸風似皆非仲景意然麻黃防已可久服乎諸風可通治

乎地仙丹既曰補腎而滋補之藥與僭燥走竄之藥相半用之腎惡燥而謂可以補腎乎借曰足少陰經非附子輩不能自達八味丸仲景腎經藥也八兩地黃以一兩附子佐之觀此則是非可得而定矣非吾之過論也

又觀治氣一門有曰治一切氣冷氣滯氣逆氣上氣用安息香丸丁沉丸大沉香丸蘇子丸勻氣散如神丸集香丸白沉香丸煨姜丸鹽煎散七氣湯丸痛溫白丸生薑湯具治嘔吐膈噎也用五膈丸五膈寬中散膈氣散酒癥丸草豆蔻丸撞氣丸人參丁香散其治吞酸也用丁沉煎丸小理中丸其治痰飲也用倍末丸消飲丸溫中化痰丸五套丸且於各方條下或曰口苦失味曰噎酸曰舌澀曰吐清水曰痞滿曰氣急曰脇下急痛曰五心中熱口爛生瘡皆是明者執證何為率用執藥夫周流於人之一身以為生者氣也陽往則陰來陰往則陽來一升一降無有窮已苟內不傷於七情外不感於六淫其為氣也何病之有今日冷氣滯氣逆氣上氣皆是肺受火邪氣得炎上之化有升無降熏蒸清道甚而至於上焦不納中焦不化下焦不滲展轉傳變為嘔為吐為膈為噎為痰為飲為翻胃為吞酸夫治寒以熱治熱以寒此正治之法也治熱用熱治寒用寒此反佐之法也詳味前方既非正治又非反佐此愚之所以不能無疑也謹按原病式曰諸嘔吐酸皆屬於熱諸積飲痞膈中滿皆屬於濕諸氣逆衝上嘔涌溢食不下皆屬於火諸堅痞腹滿急痛吐腥穢皆屬於寒深契仲景之意金匱要略曰胸痺病胸背痛括萹薤白湯主之胸痺心痛徹背括萹薤白半夏湯主之心中痞氣氣結在胸脇下之逆搶心者枳實薤白括萹桂枝湯主之嘔而心下痞者半夏瀉心湯主之乾嘔而利者黃芩加半夏生薑湯主之諸嘔吐穀不得入者小半夏湯主之

嘔吐病在膈上者猪苓湯主之胃反嘔吐者半夏參蜜湯主之食已即吐者大黃甘草湯主之胃反吐而渴者茯苓澤瀉湯主之吐後欲飲者文蛤湯主之病似嘔不嘔似噦不噦心中無柰者姜汁半夏湯主之乾嘔手足冷者陳皮湯主之噦逆者陳皮竹茹湯主之乾嘔下利者黃芩湯主之氣衝上者皂莢丸主之上氣脈浮者厚朴麻黃湯主之上氣脈沉者澤漆湯主之大逆上氣者麥門冬湯主之心下有痰飲胸脇支滿目眩茯苓桂枝湯主之短氣有微飲當從小便出之宜茯苓桂朮甘草湯腎氣丸亦主之病者脈伏其人欲自利者反快雖利心下續堅滿者此為流飲欲去故立甘遂半夏湯主之病懸飲者十棗湯主之病溢飲者當發其汗宜大青龍湯又宜用小青龍湯心下有支飲其人若冒眩澤瀉湯主之支飲胸滿者厚朴大黃湯主之支飲不得息葶藶大棗瀉肺湯主之嘔家本渴今反不渴心中有支飲故也小半夏湯主之卒嘔吐心下痞膈間有水眩悸者小半夏加茯苓湯主之假令瘦人臍下有悸者吐涎沫而頭眩水也五苓散主之心胸有停痰宿水自吐水後心胸間虛氣滿不能食消痰氣令能食茯苓飲主之先渴後嘔為水停心下此屬飲家半夏加茯苓湯主之觀其微意可表者汗之可下者利之滯者導之鬱者揚之熱者清之寒者溫之偏寒偏熱者反佐而行之挾濕者淡以滲之挾虛者補而養之何嘗例用辛香燥熱之劑以火濟之火寔寔虛虛各將誰執

或曰脈訣謂熱則生風冷生氣寒主收引今冷氣上衝矣氣逆矣氣滯矣非冷而何吾子引仲景之言而斤其非然則諸氣諸飲嘔吐反胃吞酸等病將無寒證耶

予曰五臟各有火五志激之其火隨起若諸寒為病必須身犯寒氣口得寒物乃為病寒非若諸火病自

內作所以氣之病寒者十無一二

或曰其餘痰氣嘔吐吞酸噎膈反胃作熱作火論治於理可通若病人自言冷氣從下而上者非冷而何

予曰上升之氣自肝而肺中挾相火自下而出其熱為甚自覺其冷非真冷也火極似水積熱之甚陽亢陰微故見此證冷生氣者出高陽生之謬言也若病果因感寒當以去寒之劑治之何至釀用辛香燥熱為方不知權變盍不悞人

或曰氣上升者皆用黑錫丹養正丹養氣丹等藥以為鎮墜然服之者隨手得效吾子以為熱甚之病亦將有悞耶

予曰相火之外又有臟腑厥陽之火五志之動各有火起相火者此經所謂一水不勝二火之火出於天造厥陽者此經所謂一水不勝五火之火出於人欲氣之升也隨火炎上升而不降孰能禦之今人欲借丹劑之重墜而降之氣斝為濕痰丹性熱燥濕痰被劫亦為暫開所以清快丹藥之法偏助狂火陰血愈耗其升愈甚俗人喜溫迷而不返被此禍者溢溢皆是

或曰丹藥之墜欲降而升然則如之何則可

予曰投以辛涼行以辛溫制伏肝邪治以鹹寒佐以甘溫收以苦甘和以甘淡補養陰血陽自相附陰陽比和何升之有先哲格言其則不遠吾不教負及

或曰吐酸素問以為熱東垣又言為寒何也

予曰吐酸與吞酸不同吐酸是吐出酸水如醋平時津液隨上升之氣斝積而成斝積之久濕中生熱故

從火化遂作酸味非熱而何其有積之於久不能自瀉而出伏於脾胃之間咯不得上嘔不得下肌表得風寒則內熱愈鬱而酸味刺心肌表溫暖腠理開發或得香熱湯丸津液得行亦得暫解非寒而何素問言熱者言其本也東垣言寒者言其末也但東垣不言外得風寒而作收氣立說欲瀉肺金之是又謂寒藥不可治酸而用安胃湯加減二陳湯俱犯丁香且無治熱濕鬱積之法為未合經意予嘗治吞酸用黃連茶葉各製妙隨時令送為佐使蒼朮茯苓為主病湯浸炊餅為小丸吞之仍教以粗食蔬菜自養則病易安

或曰蘇合香丸雖是類聚香藥其治骨蒸瘧疾月閉狐理等病吾子以為然乎

子曰古人製方用藥群隊者必是攻補兼施彼此相制氣味相次孰為主病孰為引經或用止治或用反佐各有意義今方中用藥一十五味除白朮朱砂訶子共六兩其餘一十二味共二十一兩皆是性急輕靈之劑往往用之於氣病與暴仆昏昧之人其衝突經絡滯蕩氣血枯摧枯拉朽然不特此也至如草豆蔻散教人於夏月濃煎以代熱水夫草豆蔻性大熱去寒邪夏月有何寒氣而欲多服縮脾飲用草果亦是此意且夏食寒所以養陽也草豆蔻草果其食寒之意乎不特此也抑又有甚者馬按氣丹曰陽氣暴絕當是陰先虧陰先虧則陽氣無所依附遂致飛越而暴絕也上文乃曰陰氣獨盛陰氣若盛陽氣焉有暴絕之理假令陽氣暴絕宜以滋補之劑保養而鎮靜之庶乎其有合夏食寒以為養陽之本何至又服辛香燥熱之劑乎且此丹下咽暴絕之陽果能接乎孰為是否君其詳之

或曰局方言陰勝陰邪盛也陰邪既盛陽有暴絕之理予之所言與陽氣相對待之陰也果有陰虧而

陽絕者吾子其能救之乎

子曰陰陽二字固以對待而言所指無定在或言寒熱或言血氣或言臟腑或言表裡或言動靜或言虛實或言清濁或言奇偶或言上下或言正邪或言生殺或言左右求其立言之意當是陰鬼之邪耳陰鬼為邪自當作邪鬼治之若陰先虧而陽暴絕者嘗治一人矣滿江鄭兄年近六十奉養受用之人也仲夏久患滯下而又犯房勞忽一晚正走廁問兩手舒撒兩眼開而無光尿自出汗如雨喉如拽鋸呼吸甚微其脉大而無倫次無部位可畏之甚余適在彼急令煎人參膏且與灸氣海穴炷如小指大至十八壯右手能動又三壯唇微動參膏亦成遂與一盞至半夜後盡三盞眼能動盡二斤方能言而索粥盡五斤而利止十斤而安

或曰諸氣諸飲與嘔吐吞酸膈噎反胃等證局方未中肯綮我知之矣然則要畧之方果足用乎抑猶有未發者乎

予曰天地氣化無窮人身之病亦變化無窮仲景之書載道者也醫之良者引例推類可謂無窮之應用借令畧有加減修合終難踰越矩度夫氣之初病也其端甚微或因此少飲食不謹或外冒風雨或內感七情或食味過厚偏助陽氣積成膈熱或實累元是表密無汗或性急怒火炎上以致津液不行清濁相十氣為之病或痞或痛不思食或噫腐氣或吞酸或嘈雜或膨滿不求原本便認為寒遽以辛香燥熱之劑投之數貼時暫得快以為神方厚味仍前不節七情反復相仍舊病被劫暫開濁液易於撥聚或半月或一月前證復作如此延蔓自氣成積自積成痰此為痰為飲為吞酸之由也良工未過膠藥又行又

挾瘀血遂成果囊此為痞為痛嘔吐為噎膈反胃之次第也飲食湯液滯沈不行滲道塞滯大便或秘或溇下失傳化中焦愈停醫者不察猶執為冷翻思前藥隨手得快至此賓主皆恨藥久燥熱顯伺久服可以溫脾壯胃消積行氣以冀一旦豁然之效不思胃為水穀之海多血多氣清和則能受脾為消化之氣清和則能運令反得香熱之偏助氣血沸騰其始也胃夜凝聚無所容受其久也脾氣耗散傳化漸遲具有胃熱易饑急於得食脾傷不磨鬱積成痛醫者猶曰虛而積寒非尋常草木可療徑以烏附助佐丹劑專意服餌積而久也血液俱耗胃脘乾槁其槁在上近咽之下水飲可行食物難入間或可入亦不多名之曰噎其槁在下與胃為近食雖可入難盡入胃良久復出名之曰膈亦曰反胃大便秘少若羊矢然名雖不同病出一體要略論飲有六曰痰飲懸飲溢飲支飲留飲伏飲分別五臟諸證治法至矣盡矣第根醫者不善處治病者不守禁忌遂使樂助病邪展轉深痼去生漸遠深可痛哉

或曰千金諸方治噎膈反胃未嘗廢姜桂等劑何吾子之多言也

予曰氣之鬱滯久留清道非借香熱不足以行然悉有大黃石膏竹茹芒硝澤瀉前胡朴硝茯苓黃芩蘆根括蕞等藥為之佐使其始則同其終則異病邪易伏其病自安

或曰胃脘枯槁者古方果可治乎將他有要捷之法者或可補前人之未發者乎

予曰古方用人參以補肺御米以解毒竹瀝以消痰乾薑以養血粟米以寔胃蜜水以潤燥姜以去穢正是此意張雞峰亦曰噎當是神思間病惟內觀自養可以治之此言深中病情而施治之法亦為近理夫噎病生於血乾夫血陰氣也陰主靜內外兩靜則臟腑之火不起而金水二氣有養陰血自生腸胃津潤

傅化合宜何噎之有因觸類而長曾製一方治中年婦人以四物湯加和白陳皮留尖桃仁甘草酒紅
花濃煎入驢尿飲以防其或生蟲也與數十貼而安又台州治一匠者年近三十勤於工作而有夫妻且
喜酒其面白其脉濇重則大而無力令其謝去工作卧於牛家取新温牛乳細飲之每頓進一杯一晝夜
可飲五七次盡却食物以漸而至八九次半月大腸閉月餘而安然或口乾益酒毒未解間飲甘蔗汁少許
或者又曰古方之治噎膈反胃未有不言寒者予何不思之甚

予曰古人著方必為當時抱病者設也其人寔因於寒故用之而得效後人遂錄以為今式不比局方泛
編成書使天下後世之人凡有此證者率遵守以為之定法而專以香熱為用也雖然挾寒者亦或有之
但今人之染此病率因痰氣久得醫藥傳變而成其為無寒也明矣

或曰治脾胃以温補藥豈非局方之良法耶吾子其將何以議之

予曰衆言淆亂必折諸聖竊恐脾胃有病未必皆寒觀其養脾丸治脾胃虛冷體倦不食嘉禾散治脾胃
不和不能多食消食丸治脾胃俱虛飲食不下小獨聖丸治脾胃不和不思飲食大七香丸治脾冷胃虛
不思飲食連翹丸治脾胃不和飲食不下分氣紫蘇飲治脾胃不和木香餅子治脾胃虛寒温中良姜丸
曰温脾胃奪命抽刀散曰脾胃冷燒脾散曰脾胃虛進食散曰脾胃虛冷不思飲食丁香煮散曰脾冷胃
寒二姜丸曰養脾温胃姜合丸曰脾胃久虛蓬煎丸曰脾胃虛弱守金丸曰脾胃虛冷集香丸曰脾胃不
和蟠葱散曰脾胃虛冷壯脾丸曰脾胃虛弱人參丁香散曰脾胃虛弱人參煮散曰脾胃不和丁香透膈
湯曰脾胃不和丁香五奪丸曰脾胃虛弱温胸臍丸之壯氣暖腎兔絲子丸之治腎虛金釵石斛丸之治

氣不足茵香丸之治臟虛冷玉霜丸之治氣虛安腎丸之治腎積寒麝香鹿茸丸之益氣養正丹之治諸
虛朴時丸之治脾胃虛弱接氣丹之治真氣虛四神丹之治五臟沉香鹿茸丸之治氣不足甚者類聚丹劑悉曰補
五臟旋卷大補丸之治五臟元氣虛鍾乳白澤丸之治諸虛三建湯之治氣不足甚者類聚丹劑悉曰補
脾胃溫脾胃補腎補五臟補真氣而各方條下曰舌苦曰面黃曰舌苦無味曰中酒吐酒曰酒積曰酒癖
曰飲酒多曰酒過傷曰氣促喘急曰口淡曰舌澀曰噫醋曰舌乾曰溺數曰水道澀痛曰小便出血曰口
苦曰咽乾曰氣促曰盜汗曰失精曰津液內燥曰氣上衝曰外腎痒曰枯槁失血曰口唇乾燥曰喘滿曰
肢體煩疼曰衄血曰小便淋瀝悉是明具熱證如何類聚燥熱而謂可以健脾溫胃而滋腎補氣乎經曰
熱傷脾常服燥熱益不傷脾乎又曰腎惡燥多服燥熱益不傷腎乎又曰熱傷元氣久服燥熱益不傷氣
乎又曰用熱速熱又曰有熱者寒而行之此教人用熱藥之法蓋以熱藥治寒病苟無寒藥為之響導位
使則病拒藥而扞格不入謂之速熱者行之有寒也兩句同一意思後人不識此理故重言以明之今局
方辛香燥熱以類而聚之未嘗見其所謂速熱也用熱而不速熱非惟不能中病抑且正氣先傷醫云乎
哉夫良醫之治病也必先求其得病之因其虛邪也當治其母寔邪也當治其子微邪也當治其所勝賊
邪也當治其所不勝正邪也當治其本經索矩又謂雜合受邪病者所受非止一端又須察具有無雜合
之邪輕重較量視標本之緩急以為施治之先後今乃一切認為寒冷吾不知脾胃與腎一向只是寒冷
為病耶論方至此難至愚昧不能不致疑也吾又攻之要略矣諸嘔吐設不得入者小半夏湯主之疸病
寒熱不食食則頭眩心胸不安者茵陳湯主之身腫而冷胸室不能食病在骨節發汗則安心胸停痰吐

水虛滿不能食者茯苓湯主之中風手足拘急惡寒不欲飲食者三黃湯主之下利不欲飲食者大承氣湯主之五勞虛極羸瘦不能食者大黃廬虫丸主之虛勞不足汗出而悶脉結心悸者炙甘草湯主之虛勞腰痛小腹拘急者八味丸主之虛勞不足者大薯蕷丸主之虛勞虛煩不得眠者酸棗仁湯主之夫嘔者胸滿者吐水者下利者惡寒者腫而冷者不能飲食者虛勞羸瘦者虛勞汗而悸者虛勞而腰痛者虛勞不足者虛勞煩而不眠者自局方之法觀之益不認為寒冷而以熱藥行之乎仲景施治則不然也痰者導之熱者清之積者化之濕者滲之中氣清和自然安裕虛者補之血凝者散之躁者益之熱者和之陰氣清益何虛勞之有也

或曰傷寒一門雖取雜方仲景之法亦摘取之矣吾子其忘言乎

予曰傷寒之法仲景而下發明殆盡局方是吾愚不必贅雖然仲景論傷寒矣而未及乎中寒先哲治胃大寒而昏中者用附子理中湯而安其議藥則得之矣曰傷曰中未聞有議其意同之者予俛而思之傷寒有即病有不即病必大發熱病邪循經而入以漸而深中寒則倉卒感受其病即發而暴傷寒之人因其舊有鬱熱風寒外邪肌腠自密鬱發為熱其初也用麻黃桂枝輩微表而安以病體不甚虛也中寒之人乘其腠理疎豁一身受邪難分經絡無熱可發溫補自解此謂氣之大虛也傷寒熱雖甚不死中寒若不急治去生甚遠其虛寒蓋可見矣

或曰脾胃一門予以局方用藥太熱未合經意若平胃散之溫和可以補養胃氣吾子以為何如

予曰蒼朮性燥氣烈行溫解表甚為有力厚朴性溫散氣非脹滿寔急者不用承氣用之可見矣雖有陳

皮甘草之甘緩甘辛亦是決裂耗散之劑寔無補土之和經謂土氣太過曰穀阜亦能為病况胃為水穀之海多氣多血故因其病也用之以瀉有餘之氣使之平爾又雖察其揆寔得寒物者投之胃氣和平使須却藥謂之平者非補之之謂其可常服乎

或曰調胃承氣亦治胃病謂之調者似與平胃散之平意義相近何用藥之相遠也

子曰調胃承氣治熱中下二焦藥也經曰熱淫於內治以鹹寒佐以苦甘功在乎導利而行之以緩平胃散止治濕上焦之藥也經曰濕上甚而熱治以苦溫佐以甘辛以汗為效而止

或曰治濕不利小便非治也非仲景法耶何子言是悖也

子曰淡滲治濕以其濕在中下二焦令濕在上宜以微汗而解不欲汗多故不用麻黃乾葛輩

或曰局方用藥多是溫補或以為未合中道積熱痼冷二門其制作其取用吾子其無以議之矣

子曰張仲景言一百八病五勞六極七傷與婦人共三十六病孫真人言四百四病凡遇一病須分寒熱果寒耶則熱之果熱耶則寒之寒熱甚耶則反佐而制之今列病之目僅十有餘而分積熱痼冷兩門何不思之甚也要略中風脈緊為寒浮為虛肺痿吐涎不能飲不渴必遺溺此為肺中冷甘草乾姜湯溫之腹滿痛時減如故此為寒宜溫之下利欲噎不能此腹中寒也脇下偏痛脈弦緊此寒也宜大黃附子細辛湯溫之痰飲脈雙弦者寒也黃疸發熱煩喘胸滿口燥又被火劫其汗病從濕得身盡熱而黃此熱在內宜下之下利脈數而渴設不差則清膿血以其有熱也婦人能食病七八日而更發熱者此為胃寔氣熱宜大承氣下之產後七八日若太陽證小便堅滿此惡露不盡不大便四五日發熱晡時煩燥食則妄

言此熱在裡結在膀胱宜大承氣利之安婦人或中風或傷寒經水適來適斷有寒熱皆為熱入血室今局方不曾言病而所謂寒與熱者其因何在其病何名果然雜合所受邪果無時令資稟之當擇耶據外證之寒熱而遂用之果無認假為真耶果以是為非也

或曰以寒熱為篇目固未合經意若其諸方果有合乎

予曰有積熱為篇目固有可議若諸方之制作取用儘有妙理吾其為子發明前人之意思恐可為用者涓埃之助夫紫雪者心脾肝腎胃經之藥也通中散洗心散表裡血氣之藥也涼膈散心脾脾胃之藥也龍腦飲子勝冰丹真珠散靈液丹上中二焦之藥也碧雷雞蘇丸三黃丸八正散三焦藥也甘露丸心脾肝之藥也涼膈丸心脾胃之藥也抱龍丸麥門冬散心脾肝之藥也妙香丸疏快腸胃制伏木火藥也甘露飲心脾胃藥也五淋散血而裡藥也消毒飲氣而表藥也麻仁丸氣而裡藥也導赤丸氣與血而裡藥也導赤散心小腸藥也有升有降有散有補有滲導有驅逐有因用有引經或緩之以甘或收之以酸或行之以香或因之以蠟或燥之以苦觀其立方各有所主用方之人宜求其意若夫痼冷門尤有可議者冷即寒也內經以寒為殺厲之氣今加痼於冷之上豈非指身惡寒而且喜熱之病耶若以此外證便認為痼冷宜乎夏英公之常餌烏附常御綿帳不知濕痰積中抑遏陽氣不得外泄身必惡寒經曰亢則害承乃制又劉河間曰火極似水故見此證當治以醎寒佐以甘溫視標之先後正邪之虛實孰緩孰急為之正法何至類用烏附丹劑偕燥之藥祀新救火屠割何異古人治戰慄有以大承氣湯下之而愈者惡寒戰慄明是熱證亦是因久服熱藥而得之者但有虛寒之分耳進士周本道年近四十得惡寒證服附子

數日而病甚求余治診其脉弦而似緩遂以江茶入薑汁香油些少吐痰一升許減綿大半又與通聖散去麻黃大黃芒硝加當歸地黃百餘貼而安又一色目婦人年近六十六月內常覺惡寒戰慄喜暖熱御綿多汗如雨其形肥臃厚已得附子二十餘但渾身痒甚兩手脉沉濇重取稍大知其熱甚而血虛也以四物湯去川芎倍地黃加白朮黃芪炒藥生甘草人參每貼二兩重方與一貼腹大泄目無視口無言予知其病熱深而藥無反佐之過也仍取前藥熟炒與之蓋借火力為嚮導一貼利止四貼精神回十貼病全安又蔣氏婦年五十餘形瘦面黑六月喜熱惡寒兩手脉沉而濇重取似數以三黃丸下以姜汁每三十粒三十貼微汗而安彼以積熱痼冷為敘方之篇目其得失可知矣

泄痢一門其用鍾乳健脾丸朝真丸駐車丸呵梨勒丸大溫脾丸黃連阿膠丸胡粉丸桃花丸訶梨勒散木香散七葉湯赤石脂散養臟湯御米湯金粟湯狗頭骨丸豆蔻丸肉豆蔻散三神丸丁香豆蔻散止瀉丸皆用熱藥為主治以滋藥為佐使當為腸虛感寒而成滑痢者設也彼瀉痢者將無熱證耶將無積滯耶內經曰春傷於風夏為膿血多屬滯下夫瀉痢證其類尤多先賢曰濕多成瀉此確論也曰風曰濕固不可得而通治矣况風與濕之外人有雜合受邪似難例用滋熱之劑今方中書證有兼治裡急者有兼治後重者有兼治裡急後重者此豈非滯下之病乎今瀉痢與滯下滾同論治寔寔虛虛之患將不俟終日矣或曰然則瀉痢與滯下為病不同治法亦別吾子其能通之乎

予曰經曰暴注下迫皆屬於熱又曰暴注屬於火又下痢清白屬於寒熱君火之氣火相火之氣寒寒水之氣屬火熱者二屬水寒者一瀉痢一證似乎屬熱者多屬寒者少詳玩局方專以熱滋為用若用之於

水痢清白而屬於寒者斯可矣經所謂下迫者即裡急後重之謂也其病屬火相火所為其毒甚於熱也投以溢熱非殺之而何謹按仲景之法謂下痢脉滑而數者有宿食當下之下痢脉遲而滑者是也痢為未止急下之下痢脉反滑當有所去下之安下痢不欲食有宿食者當下之痢腹滿痛為寒為寔當下之下痢腹堅寔當下之下痢譫語有燥矢當下之下痢二部皆平按之心下堅急下之下痢已差至其時復發者此為下未盡更下之安下痢脉大浮弦下之當自愈風寒下者不可下下後心下堅痛脉遲此為寒宜溫之脉浮大此為虛強下之故也設脉浮革者因而腸鳴當溫之下痢脉遲緊痛未欲止當溫之下痢心痛急當救重可與理中四逆附子輩下痢大孔痛宜溫之觀仲景可下者十法可溫者五法謂之下痢率用承氣如減何嘗以砒丹巴硃決烈燥熱重毒之劑謂之溫者率用姜附為主何嘗用鍾乳龍骨石脂粟殼緊溢燥毒之劑

或曰可下者豈非腸胃有積滯乎不用砒丹巴硃恐積滯未易行也吾子以為未然幸發明承氣之意可乎予曰大黃之寒其性善走佐以厚朴之溫善行滯氣緩以甘草之甘飲以湯液灌脘腸胃滋潤輕快無所留滯積行即止砒丹巴硃毒熱類聚劑成凡藥其氣凶暴其體重滯積垢雖行毒氣未過譬如強暴貪賊手持兵刃其可使之徘徊顧瞻於堂奧間乎借使有愈病之功其腸胃清淳之氣能免旁損暗傷之患乎仲景治痢可溫者溫可下者下或解表或利小便或待其自己區別易治難治不治之證至為詳密然猶與滯下滾同立方命論其後劉河間分別在表在裡挾風挾濕挾熱挾寒挾虛明者經絡提防傳變大概發明滯下證治尤為切要和血則便濃自愈調氣則後重自除此寔盲者之日月聾者之雷霆也

或曰局方治法將終不能彷彿仲景之方耶

予曰圓機活法內經具舉與經意合者仲景之書也仲景因病以製方局方製方以俟病若之何其能彷彿也宋命近臣讎校方書彼近臣者術業素異居養不同焉知為醫之事故雖然知尊仲景矣亦未嘗不欲效之也徒以捧心效西施爾觀桃花丸一方可見矣即要略桃花湯也仲景以治便膿血用赤石脂完者乾薑粳米同煮作湯一飲病安便止後樂意謂病屬下焦血虛且寒非乾薑之溫石脂之澁且重不能止血粳米味甘引入腸胃不使重澁之體少有凝滯故煮成湯液藥行易散餘毒亦無局方不知深意不造妙理但取易於應用喜其性味溫補借為止瀉良方改為丸藥劑以麪糊日與三服其果能與仲景之意合也

或曰河間之言滯下似無挾虛挾寒者然乎否乎幸明以告我

予曰泄痢之病水穀或化或不化並無芻蕘惟覺困倦若滯下則不然或膿或血或膿血相雜或腸垢或無糟粕或糟粕相混雖有痛不痛大痛之異然皆裡急後重逼迫惱人攻之於經察之於證似乎皆熱證寔證也余近年涉滯亦有大虛大寒者不可不知敢筆其略以備采覽余從叔年踰五十夏間患滯下病腹微痛所下褐色後重頻併穀食大減時有微熱察其脈皆弦而濇似數而稍長却喜不甚浮大雨手相等視其神氣大減余曰此非滯下憂慮所致心血虧脾氣弱耳遂與參朮為君當歸身陳皮為臣川芎炒白芍藥茯苓為佐使時暄熱甚加少黃連與兩日而安梅長官年三十餘奉養厚者夏秋間患滯下腹大痛有人教服單煮乾薑與一貼痛定少頃又作又與又定由是服乾姜至三斤八日後予視之左脈弦而

稍大似數右脉弦而稍大減亦似數重取之似緊余曰此必醉飽後喫寒冷太過當作虛寒治之因其多服乾姜遂教四物湯去地黃加人參白朮陳皮酒紅茯苓杏仁煎入生姜汁飲之至一月而安金氏婦年近四十秋初尚熱患滯下腹但隱痛夜重於晝全不得睡食亦稍減口乾不飲已得治痢靈砂二貼矣余視之兩手脉皆濇且不勻神思倦甚飲食全減因與四物湯倍加白朮為君以陳皮佐之與十數貼而安此三病者若因其逼迫而用峻劑豈不悞人

或曰局方諸湯可以清痰可以消積可以快氣可以化食口鼻既宜胸膈亦舒平居無事思患預防非方之良者乎

予曰清香美味誠足快意揆之造化思未必然經曰陰平陽秘精神乃治氣為陽宜降血為陰宜升一升一降無有偏勝是謂平人今觀諸湯非豆蔻縮砂乾姜良姜之辛宜於口非丁香沉香檀蘇桂之香宜於鼻和以酸鹹甘淡其將何以悅人奉養之家閑佚之際主者以此為禮賓朋以此取快不思香辛升氣漸至於散積溫成熱漸至鬱火甘味戀膈漸成中滿脾主中州本經自病傳化失職清濁不分陽亢於上陰微於下謂之陰平可乎謂之陽秘可乎將求無病適足生病將求取藥反成受苦經曰久而增氣物化之常氣增而久天之由也其病可勝言哉

或曰舍利利非諸湯之類乎且香辛甘酸殆有甚焉何言論弗之及也

予曰謂之舍利利者皆取時果之液煎熬如錫而飲之稠之甚者調以沸湯南人因名之曰煎味雖甘美性非中和且如金櫻煎之縮小便杏煎楊梅煎蒲桃煎櫻桃煎之發胃火積而至久濕熱之禍有不可勝

言者僅有桑椹煎無毒可以解渴其餘味之美者正是嬉笑作罪然乎否乎

或曰婦人一門無非經候胎產帶下用藥溫暖於經頗通吾子其無志此乎

予曰婦人以血為主血屬陰易於虧欠非善調攝者不能保全也餘方是否姑用置之若神仙聚寶丹則有不能忘言者其方治血海虛寒虛熱盜汗理宜補養琥珀之燥麝香之散可以用乎面色痿黃肢體浮腫理宜導濕乳香沒藥固可治血可以用乎胎前產後虛寒不同逐敗養新攻補難並積塊堅癥赤白崩漏宜於彼者必防於此而欲以一方通治乎世人以其貴細溫平又喜其常服可以安神去邪令人有子殊不知積溫成熱香竅散氣服者無不被禍自非五臟能言醫者終不知覺及至變生他病何曾歸咎此丹余姪女形色俱寔以得子之遲服此藥背上發癰證候甚危余診其脉散大而濇急以加減四物湯百餘貼補其陰血辛其質厚易於收救質之薄者悔將何及若五積散之治產後餘血作痛則又有不能忘言者以蒼朮為君麻黃為臣厚朴枳殼為佐雖有芍藥當歸之補血僅及蒼朮三分之一且其方中言婦人血氣不調心腹撮痛閉而不行並宜服之何不思產後之婦有何寒邪血氣未充寔難發汗借曰推陳致新藥性溫和豈可借用麻黃之散附以蒼朮枳朴虛而又虛禍不旋踵率爾用藥不思之甚

或曰初產之婦好血已虧瘀血尚留黑神散非要藥歟

予曰至哉坤元萬物資生理之常也初產之婦好血未必虧汚血未必積臟腑未必寒何以藥為飲食起居勤加調護何病之有誠有汚血體怯而寒與之數貼亦有簡便或有他病當求病起何因病在何經氣病治氣血病治血寒者溫之熱者清之凝者行之虛者補之血多者止之何用海製此方不恤無病生病

彼黑神散者用乾姜當歸之溫熱黑豆之甘熟地黃之微寒以補血之虛佐以炒蒲黃之甘以防出血之
多芍藥之酸寒有收有散以為四藥之助官桂之大辛熱以行滯氣推凝血和以甘草之緩其為取用似
乎精密然驅逐與補益似難同方施治設有性急者形瘦者本有怒火者夏月坐簷者時有火令姜桂皆
為禁藥論語本達之戒不知誰執其咎至於將護之法尤為悖理肉汁發陰經之火易成內傷之病先哲
具有訓戒胡為以羊雞濃汁作糜而又常服當歸丸當歸建中湯四順理中丸雖是滋補悉犯桂附乾薑
僭熱之劑臟腑無異何處消受若夫免之初生母腹頃寬便啖雞子且喫火鹽不思雞子難化火鹽發熱
展轉為病醫者不識每指他證率爾用藥益不悞人余每見產婦之無疾者必教以却去黑神散與夫雞
子火鹽諸般肉食且與白粥將理間以此少石首養令甘淡食之至半月以後方與少肉若雞子亦須
豁開淡煮大能養胃却疾彼富貴之家驕恣之婦卒有白帶頭風氣痛膈滿痰逆口乾經水不調髮脫體
熱皆是陽勝陰虛之病天生血氣本自和平曰勝曰虛又焉知非此等繆妄有以故之耶

外科精義目錄

卷上

論瘡腫診候八式法

論榮衛色脈參應之法

論持手訣消息法

論三部所主臟腑病證

論脈證名狀二十六種所主病證

論三部脈所主證候

論三部脈所主雜病法訣

論診候肺疽肺痿法

論將護忌慎法

論瘡疽腫虛實法

辨瘡腫淺深法

辨膿法

辨瘡疽疔腫證候法

辨瘡疽善惡法

砭錄法

貼增法

漏漬瘡腫法

針烙瘡腫法

灸瘡瘡腫法

內消法

追蝕瘡疽腫法

托裏法

止痛法

用藥增減法

瘡瘡腫權變通類法

論五發疽

論癰疽

論附骨疽

論陰瘡

論時毒

論諸瘡

論疔瘡腫

辯疔腫十三種形色禁忌

論瘰癧治法

論痔瘻

卷下

漏蘆湯

化毒丹

內消丸

五利大黃湯

內消升麻湯

五香連翹湯

牡礪大黃湯

和血通氣丸

地黃煎丸

槐角煎丸

皂角煎丸

苦參散

苦參丸

蒺風丸

連翹散

竹葉黃芪湯

枳殼丸

五香湯

托裏黃芪湯

托裏茯苓湯

托裏當歸湯

托裏散

托裏玄麥散

內托散

內補散

內塞散

香粉散

止痛當歸湯

黃芪茯苓湯

內補防風散

伏梁丸

溫經丸

木香瀉腫湯

升麻瀉腫湯

瀉腫升麻湯

豬蹄湯

甘草大豆湯

瀉腫湯

洗毒湯

浴毒湯

何首烏散

八儂散

消毒湯

射風散

應痛丸

黃芪丸

梔子仁湯

葛根牛蒡子湯

通氣散

白丁香散

金銀花散

定拾散

十香膏

犀角膏

乳香膏

白龍膏

消毒膏

磨風膏

天麻膏

善應膏

靈應膏

翠玉膏

追毒散

迴瘡錠子

射膿丸

替鍼丸

治瘰癧

并馬老鼠瘡

翠霞散

搜膿散

引膿散

乳香散

釣苓散

截疔散

抵聖散

青金錠子

白龍散

桃紅散

檳榔散

金黃散

生肌散

水澄膏

拔毒散

金露散

消毒散

天檳榔散

天麻散

決効散

水銀膏

平肌散

神黃散

博金散

金傷散

完肌散

定血散

碧雲錠子

漏蘆湯

玉粉散

香礬散

紫金散

通耳丹

善蒲錠子

寸金錠子

董痔散

通靈丸

三神丸

玉芝飲子

平和飲子

玄參丸

犀角散

防風散

烏金散

劉子真瘡論

沒藥膏

必効散

烏金散

抵聖散

應効散

白金散

如聖散

天蛾散

必効散

蛤粉散

治小兒丹瘤

治小兒疳口瘡

治破傷風并洗頭風藥

烏龍丸

紫參丸

萬靈丸

治眼

治吹妳

治痔瘡

洗痔

寸金丹

牙疳藥

迴瘡蟾酥錠子

乳香托裏散

四聖旋疔散

天疔散

萬應膏

治小兒面湮瘡

治赤白口瘡

治乾濕疥癬

治湯火燒燙瘡

治破傷風

治破傷

治風狗咬破傷風

論炮製諸藥及單方主療瘡腫法

外科精義目錄

醫學博士選充御藥院外科太醫齊德之纂集

明 新安 後學 吳勉學校正

論瘡腫診候八式法

夫醫者人之司命也脈者醫之大業也蓋醫家苟不明脈則如冥行索途動致顛覆矣夫大方脈婦人小兒風科必先診脈後對證處藥獨瘡科之流多有不診其脈候專攻治外或有證候疑難別名方脈診察於瘡科之輩甘當淺陋之名噴其小哉知是原夫瘡腫之生皆由陰陽不和氣血凝滯若不診候何以知陰陽勇法血氣聚散耶由是觀之則須信瘡腫於診候之道不可闕也歷觀古今治療瘡腫方書甚多其間診候之法畧而未詳比夫諸科甚有滅裂患雖不才輒取黃帝素問難經靈樞甲乙及叔和仲景扁鵲華佗千金外臺聖惠總錄古今名醫諸家方論之中診候瘡腫之說簡編類次貫成篇帙首載診候八式之法次論血氣色脈參應之源後明脈之名狀所主證候及瘡腫逆從之方庶使為瘡腫科者覽此則判然可曉了無疑滯於曾次一朝臨疾診候至此則察逆從決成敗若黑白之易分耳

論榮衛色脈參應之法

夫天地之道曰陰與陽陰陽在人口血與氣蓋血者榮也氣者衛也榮者榮於中衛者衛於外所以榮行脈中衛行脈外脈者血氣之先也血非脈則馬能榮於中氣非脈則馬能衛於外二者相資而行內則通於五臟六腑十二經絡外則濡於九竅四肢百節萬毛晝夜循行如環無端以成其度會於寸口變見於

脈故曰氣血者人之神也脈者氣血之神也所以治病之始五法為紀蓋五法者五臟之色脈也脈應於內色應於外其色之與脈當相應故曰能合色脈可以萬全也凡為醫先須調明色脈况為瘡科若於此不精雖聰慧辯博亦不足委也

論持手訣消息法

夫診候之脈法常以平旦為紀陰氣未散陽氣未動飲食未進血氣未亂經脈未隆絡脈調勻故乃可診有疾之脈若遇羸羸病患不拘此論內經所謂持脈有道以虛靜為保但可澄思靜慮調息凝心視精明察五色聽音聲問所苦方始按寸尺別浮沈以此參照決死生之分矣復觀患人身形長短肥瘦老少男女性情緩急例各不同故曰形氣相得者生三五不調者病謂如室女尼冠脈當濡而弱嬰兒孺子之脈細而疾三四歲者呼吸之間脈當七八至為平比夫當人持不同耳大抵男子先診左手女子先診右手男子左脈大則順女子右脈大則順凡診脈先以中指揣按掌後高骨骨下為關得其關位然後齊下兩左右二指若臂長八寸棘其指若臂短人密排其指三指停穩先診上指曰寸口浮按消息之中按消息之重按消息之土竟消息之下竟消息之推而外之消息之推而內之消息之然後先關後尺消息之一類此若診得三部之中浮沈滑澀遲疾不調何病所主外觀形色內察脈候參詳處治以忠告之不可輕言談笑亂說是非左右瞻望舉止忽畧此庸醫也

論三部所主臟腑病論

夫診候之道醫者之難精也若非燈下苦辛勤於記誦參師訪友晝夜不違造次顛沛寤寐俯仰存心於

此安能知神聖之妙哉古人曰按其脈知其疾命曰神以悟其探顯素隱之妙也又曰切其脈治其病謂之巧以明其指別之功也蓋三指相去毫釐之近主病若千里之遠觀夫指別之功世人固以為難命曰神豈容易可至哉常考於經脈有三部寸關尺也從魚際至高骨却行一寸曰寸從寸上一分曰魚際從寸至尺曰尺澤寸後尺前為關關前為陽即寸口也關後為陰即尺脈也陽出陰入以關為界寸主上焦頭手皮毛關主中焦腹及腰尺主下焦小腹及足此三部所主大畧也又有左右兩手三部為之六脈也又有人迎氣口神門所主又各不同蓋左手關前曰人迎右手關前曰氣口兩關之後一分即曰神門故脈法讚曰肝心出左肺脾出右腎為命門俱出尺部魂魄穀神皆見寸口所謂左手關前心之部也其經手少陰與手太陽為表裏小腸合為府左手關上肝之部也其經足厥陰與足少陽為表裏膽合為府左手關後腎之部也其經足少陰與足太陽為表裏膀胱合為府右手關前肺之部也其經手太陽與手陽明為表裏大腸合為府右手關上脾之部也其經足太陰與足陽明為表裏胃合為府右手關後命門之部也其經手厥陰與手少陽為表裏三焦合為府此謂六部所主臟腑十二經之義也又脈要精微論曰尺內兩旁則季脇也尺外以候腎尺裏以候腹中附上左外以候肝內以候膈右外以候胃內以候脾上附上右外以候肺內以候胃中左外以候心內以候臍中前以候前後以候後上竟上者胃喉中事也下竟下者小腹腰股膝脛足中事也麗大者陰不足陽有餘為熱中也來疾去徐上實下虛為厥顛疾來徐去疾上虛下實為惡風也鼓中風者陽氣受也者脈俱沈細數者少陰厥也沈細數散者寒熱也浮而數者為恂仆諸浮而數者皆在陽為熱其有躁者在手及諸細而沈者皆在陰則為骨痛其有靜者在足數

動一代之病在陽之脈也洩及便膿血諸過者切之清者陽氣有餘也滑者陰氣有餘也陽氣有餘為身熱無汗陰氣有餘為多汗身寒陰陽有餘則無汗身寒推而外之內而不外者有心腹積也推而內之外而不內者身有熱也推而上之上而不下者腰足清也推而下之下而不上者頭項痛也按之至骨脈氣少者腰脊痛而身有痺也已上諸疾若非指明心了為可得而妙也又平人氣象論曰一呼脈再動一吸脈亦再動呼吸定息脈行五動為以太息不大不小不長不短不滑不澀不浮不沈不遲不數命曰平人平人者不病也蓋平人之常氣稟乎胃胃氣者平人之常氣也所以人常稟氣於胃故脈以胃氣為本也正理論曰穀入於胃脈道乃行合靈樞經云胃為水穀之海也又曰脈應四時曰平信夫四時之脈皆以胃氣為本謂春弦夏洪秋毛冬石春之胃脈微弦曰平餘皆倣此逆四時則病矣若診婦人之脈妊身則慎勿亂投湯藥其婦人之脈診得少陰脈動甚則有子也又曰陰搏陽動則有子也又曰身汗而無脈者即有妊也蓋重身者問其月事觀其體貌然後主治不可忽也又經曰察色按脈先別陰陽蓋陰陽者天地之道也是以治病者必求其本本於陰陽寒暑四時五臟之根也以脈言之則浮沈也以部言之則尺寸也故經云脈者陰陽之法以應五臟是謂呼出心與肺吸入腎與肝呼吸之間脾胃受穀味其脈在中也以浮沈論之則曰浮者陽也沈者陰也應在臟腑則浮而大散者心也浮而短澹者肺也所以心肺俱浮也牢而長者肝也按之而大舉指來實者腎也所以肝腎俱沈也遲緩而長者脾也脾為中州所以脈在中也仲景曰大浮數動滑皆陽也沈澹弱弦微皆陰也陽者熱也陰者寒也所以寒則脈來沈而遲熱則脈來浮而數故曰諸數為熱諸遲為寒無如此驗也脈經曰諸浮為風諸緊為痛諸伏為聚諸弦為飲諸者

失血長則氣治短則氣病濇則煩心大則病進浮為在表沈為在裏遲為在臟數為在腑又形壯脈細少氣不足以息者危形瘦脈大胃中氣多者變形氣相得者生三五不調者病三部九候皆相失者死此先聖診脈之大法也故曰凡治病則察其形氣色澤治之無候其時也所以形氣相得者生色澤以浮者病易已脈從四時者可治脈弱似滑者是有胃氣此皆易治也若形氣相失或色夭不澤及脈逆四時或脈實益堅甘不可治經所謂必察四難而明告之又若病熱脈靜泄而脈大脫血脈實汗後脈躁此皆難治也若瘡疽之人膿血大泄脈滑數者難治也凡瘰癧多或如清泔脈滑大散寒熱發渴者治之無功也若患肺瘡者咳嗽膿血脈見洪滑治之難痊矣大凡診脈見浮數應身發熱而反惡寒雖頭項拘急四肢煩痛或復戰慄瀉甚者但有痛處欲發瘡腫也

論脈證名狀二十六種所主病證

夫脈之大體二十六種此診脈之紀綱也細而論之毫釐小差舉治必遠總而言之華從虛實陰陽而已兩者議之以要其中謹於諸家脈法中撮其機要翦去繁蕪載其精義

浮脈之診浮於指下按之不足舉之有餘再再尋之狀如大過擊擊然見於皮毛間其主表證或為風或為虛浮而大散者心也浮而短濇者肺也浮而數者熱也浮數之脈應發熱其不發熱而反惡寒者瘡疽之謂也

洪脈之診似浮而大按舉之則泛泛然滿三部其狀如水之洪流波之湧起其主血實積熱瘡腫論曰脈洪大者瘡疽之病進也如瘡疽結膿未成者宜下之膿潰之後脈見洪大則難治若自利者不可殺治

也

滑脈之診實大相兼往來流利如珠按之則累累然滑也其主或為熱或為虛此陽脈也瘡疽之病膿未清者宜內消也膿潰之後宜托裏也所謂始為熱而為虛也

數脈之診按之則呼吸之間動及六至其狀似滑而數也若浮而數則表熱也沈而數則裏熱也又曰諸數為數仲景曰脈數不時見則生惡瘡也又曰肺脈洪數則生瘡也診諸瘡洪數者裏欲有膿結也散脈之診似浮而散按之則散而欲去舉之則大而無力其主氣實而血虛有表無裏瘡腫膿潰之後而煩痛尚未痊退者診其脈洪滑屬散難治也以其正氣虛而邪氣實也又曰肢體沈重肺脈大則驚謂浮散者也

芤脈之診似浮而軟按之中央空而兩邊實其主血虛或為失血瘡腫之病診得芤脈膿潰後易治以其脈病相應也

長脈之診按之則洪大而長出於本位其主陽氣有餘也傷寒得之欲汗出自解也長而緩者胃脈也百病皆愈謂之長則氣治也

牢脈之診按之則實大而弦且沈且浮而有牢堅之意若癰疽結腫診得牢脈者不可內消也

實脈之診按舉有力而類結曰實經曰邪氣勝則實久病則虛人得此最忌瘡疽之人得此宜急下之以其邪氣與臟腑俱實故也

弦脈之診按之則緊而弦其似緊者為弦如按弦而不移緊如內繩而轉動以此為異春脈浮弦而平不

時見則為飲為痛主寒主虛瘡疽論曰弦洪相搏外緊內熱欲發瘡疽也

緊脈之診似弦而緊按之如切繩而轉動其主切痛積癖也瘡腫得之氣血沈滯也亦主痛也

澹脈之診按之則散而復來舉之則細而不足脈澹則氣澹也亦主血虛瘡腫潰者得之無妨也

短脈之診按舉則不及本位內經曰短則氣病以其無胃氣也諸病脈短皆難治也瘡腫脈短真氣短也

細脈之診按之則蒼蒼如蜘蛛之絲而欲絕舉之如無而似有細而微其主亡陽衰也瘡腫之病脈來細

而沈時直者裏虛而欲變證也

微脈之診按之則軟小而極微其主虛也真氣復者生邪氣勝者危瘡腫之病潰後脈微而寸舉自差也

遲脈之診按舉來遲呼吸定息方得二至其狀似緩而稍遲瘡疾得之則善新疾得之則正氣虛備瘡腫

得之潰後自痊

緩脈之診按舉似遲而稍駛於遲仲景曰陽脈浮大而濡陰脈浮大而澹陰陽同等謂之緩脈見長緩百

疾自瘳凡諸瘡腫潰後其脈澹遲緩者皆易愈以其脈候相應是有胃氣也

沈脈之診舉之不足按之方見如爛綿其主邪氣在臟也水氣得之則逆此陰脈也瘡腫得之邪氣深也

伏脈之診比沈而伏舉之則無按之至骨方得與沈相類而邪氣益深矣

虛脈之診按之不足遲大而軟輕舉指下豁然而空經曰脈虛則血虛血虛生寒陽氣不足也瘡腫脈虛

宜托裏和氣養血也

軟脈之診按之則如帛在水中極軟而沈細亦謂之濡其主胃氣弱瘡腫得之補虛排膿托裏

弱脈之診似軟而極微來遲而似有仲景曰微弱之脈綿綿如瀉漆之絕其主血氣俱虛形精不足大抵
瘡來沈遲濡弱皆宜托裏

促脈之診按之則去數來時一止而復來仲景曰陽盛則促主熱畜於裏也下之則和瘡腫脈促亦急下
之

結脈之診按之則往來遲緩時一止而復來仲景曰陰盛則結經曰促結則生代則死

代脈之診按之則往來動則中止不能自還因而復動者曰代脈也代者氣衰也諸病見之不祥大凡瘡
腫之病脈促結者難治而况見代脈乎

動脈之診見於關上無頭尾如豆大厥厥然而動搖者是也脈經曰陰陽相搏故謂之動動於陽則陽氣
虛而發厥動於陰則陰氣虛而發熱是陽生於尺而動於寸陰生於寸而動於尺不可不辯也

論三部脈所主證候

夫寸關尺者脈之位也浮沈滑澁者脈之體也莫位分體指文語證者診脈之要道也脈經曰大凡診候
兩手三部脈滑而遲不浮不沈不長不短去來齊等者無病也

寸口脈浮者傷風也緊者傷寒也弦者傷食也浮而緩者中風也浮而數者頭痛也浮而緊者膈上寒脇
下冷飲也沈而緊者心下寒而積痛沈而弱者虛損也緩而遲者虛寒也微弱者血氣俱虛也弦者頭
痛心下有水也雙弦者兩脇下痛也偏絕者不遂也俱絕者不治也澀澀如羹上肥者陽氣微也連連
如蜘蛛絲者陽氣衰也

關主中焦胃腹中事去來徐而緩者無病也浮者腹滿而不欲食胃虛脹也滑者客熱在胃也數者熱結中焦也沈伏者中焦水氣或嘔逆而吞酸也弱者胃氣虛也雖有虛熱不可大攻須防熱去則生寒也牢而實者腹滿嚮嚙噎塞而不通或腹大痛澀者氣逆也乳則瀉血滯堅大實按之不減而有力者中焦實有結伏在胃也微浮者積熱不消竈動心悸也

尺主下焦腰腎膝脛足中事也尺脈浮者風熱小便難也沈者腰背痛而腎氣不足數者臍下熱痛小便赤色而惡寒也遲者下焦寒而陰虛也緊者臍下小腹急痛也緩者腳弱下腫而痿痺也弱者下冷而腎氣衰也頓者脚不收而風痺小便難也伏者小腹痛而疝瘕殺不化也細者溇泄而下冷也芤者小便澀血而下虛也牢而小者足膝寒瘦脚下隱隱疼痛也細而急者筋急不能行也來而斷絕者男子小腹有滯氣也婦人月水不利也

論三部脈所主雜病法訣

夫三部之中俱見一脈所主雜病畧而言之脈經曰陽邪來見浮洪陰邪來見微細水穀之邪來見實堅寒癖之邪來見弦小又曰浮而滑者宿食也短而滑者酒病也遲而滑者脹滿也洪而大者傷寒也浮而數者傷風也浮而急者飲食不消脾不磨也沈而弦者寒氣結而陰痛也浮而緩者皮膚不仁也滑而散者癰瘻也遲而緩者寒癰也浮而濡者霍亂也弱而濡者虛胃也緊而滑者吐逆也短而數者心痛也弦而數者為瘧也緊而急者尸遁也實小而堅者病在內而冷也浮滑而緊者病在外而熱也短而急者病在上也長而緩者病在下也長而弦者病在肝也滑而洪者病在心也微而頓者病在脾也浮而濡者病

在肺也沈而緊者病在腎也又訣曰諸浮為風或為虛也諸緊為痛或為積也諸澹為瘧諸弦為飲諸數為熱諸數為寒乳則為失血軟則為虛若脈沈沈澤澤四肢不仁者亡榮也或大而溺溺者社崇也若脈來乍大乍小乍短乍長者鬼崇也

論診候肺疽肺痿法

夫肺者五臟之華蓋也處於官中主於氣候於皮毛勞傷血氣痿理虛而風邪乘之內感於肺也則汗出惡風咳嗽短氣鼻羨項強骨脇脹滿久久不瘥已成肺痿也風中於衛呼氣不入熱至於榮則吸而不出所以風傷皮毛熱傷血脈風熱相搏氣血稽留纏結於肺變成瘡疽診其脈候寸口脈數而虛者肺痿也數而實者肺疽也肺痿之候久嗽不已汗出過度重亡津液便如爛瓜下如豕脂小便數而不渴渴者自愈欲飲者欲瘥此由肺多唾涎沫而無膿者肺痿也其肺瘡之候口乾喘滿咽燥而渴甚則四肢微腫咳嗽唾膿血或腥臭濁沫骨中隱隱微痛者肺疽也又聖惠曰中府隱隱而微痛者肺疽也上肉微起者肺瘡也中府者穴也在雲門下一寸六分乳肋間動脈應手陷中也是以候始萌則可投膿成則多死若欲知有膿者但診其脈若微緊而數者未有膿也緊甚而數者已有膿也又內經曰血熱則肉敗榮衛不行必將為膿大凡肺瘡當咳嗽短氣骨滿時唾膿血久又如糲米狀者難治若嘔膿而不止者亦不可治也其嘔膿而自止者自愈其脈短而澹者自痊淳大者難治其面黃白而反面赤者此火之剋金骨不可治

論將護忌慎法

大凡有瘡疽生皆只如黍粟粒許大其狀至微人多不以為急此蘊大患宜速辨之不可自忽若能防之

於未形理之於未成或朝覺而夕治求治於良醫則必無危困矣若因循慢忽詢於庸醫致令膿血結聚
委之於命束手待斃不以去道遠乎以致筋骨敗遺穿通臟腑死者十有八九矣可不慎歟蓋瘡疽之
人托命庸醫任意措置危殆立至若用良醫則可保痊愈用醫之際不可不擇辭之何難若能飽讀經書
久諳證候湯藥孰嫻洞明色脈性情仁善孝義忠信臨事不惑處治有決方為良醫委用勿疑然後要在
病人自免不可恚怒悲憂叫忬怨恨驕恣清性信任口腹馳騁勞役惟宜清靜恬澹耐煩為宜於患人左
右止息煩雜切忌打觸器物諸惡聲音爭辯是非叱罵鬪毆及產婦淫男體氣不潔帶酒腥羶雞犬乳兒
孽畜禽獸並須遠離設或親友意問疾者可以預囑徐行低聲致曲伺候禮畢躬退勿令嗟呀驚怪話
舊引其遠嘗莫樂遠別親戚堂巷清懷但恐病人心緒凄涼尤不可亂舉方藥徒論虛實惑亂患人疑滯
不決祇合方便省問不可久坐多言勞倦病人深不長使夫侍患者宜須壽近中年情性沈厚勤謹耐煩
仁慈智慧全在調以粥藥無失時節勿令於患人左右彈指嗟搔投繯言感激病人甚不利便飲食之
間忌慎非細不可不戴畜中勿食驢馬駝騾猪狗牛羖羊等并雜魚龜蠶蝦蟹及淹泥臭陳自死病倒之
類慎勿嘗啖飛禽之中忌食鴉鴨鷹雀鷦鷯鴛鴦鴿鴉雞雉及能學人言者慎勿食之野獸之中
忌食獐鹿狐兔虎豹熊豺及爪牙害人有毒蟲獸并父母自本命生屬忌慎勿嘗啖菜蔬之中忌食黃瓜
茄子蘭香芸薹胡荽生菜葵芥茵陳菲苳葱薤慎勿食之果木之中忌食桃李杏棗栗梅櫻桃棗紅柿
櫻桃胡桃榛松林檎及諸蟲蛇木藪之果慎勿食之若其瘡疽膿潰消氣血虛弱則可食羊肉鴿鷄蔓
菁蓋醫瓜薤蘿蔔及黃白糧米細米稀粥軟飯若至肌肉漸生思想滋味則宜食白熟酥餅齋粥羹湯熟

軟溫和稀稠得中製造如法勿令太飽此時猶忌饅頭蒸餅餛飩肉角煎餅及炙煨燠炒醃酸
油膩脂肥魚肉若至肌膚欲平惡肉去盡瘡口收斂之際尚忌起立行步揖待賓客房酒宴會噴怒沐浴
登陸臺榭運動肢體寒暑勞倦正宜調節飲食保攝以待瘡癒平復精神如故氣力完全萬無所忌百日
內慎勿觸犯之

論瘡疽腫虛實法

夫瘡疽膿潰腫毒漫展證候危急者須辨虛實况夫虛者難補實者易瀉補瀉之法不可輕用若或少差
利害甚大然而虛實證多端不可不辯有瘡之虛實者臟腑氣血上下真邪各有虛實故不同也分而言
之則腫起堅硬膿稠者瘡疽之實也腫下軟慢膿稀者瘡疽之虛也瀉痢腸鳴飲食不入嘔吐無時手足
並冷脈弱皮寒小便自利或小便時難大便滑利聲音不出精神不爽者悉臟腑之虛也大便秘硬小便澀
飲食如故腹滿膨脹曾膈痞悶肢節痠痛口苦咽乾煩躁多渴身熱脈大精神昏塞者悉臟腑之實也凡
諸瘡瘡膿水清稀瘡口不合聚腫不赤肌寒肉冷自汗色脫者氣血之虛也腫起色赤寒熱痠痛皮膚瘡壯
熱膿水稠粘頭目昏重者氣血之實也頭疫鼻塞目赤心驚咽喉不利口舌生瘡煩渴飲冷睡語咬牙者
上實也精滑不滯大便自利腰脚沉重睡臥而不寧者下虛也肩項不便四肢沉重目視不正睛不了了
食不知味音嘶色敗四肢浮腫者真氣之虛也腫厥尤甚痛不可近積日不消寒熱往來大便秘澀小便
如淋心神煩悶恍惚不寧者邪氣之實也又曰真氣奪則虛邪氣勝則實又曰諸痛為實痒為虛也又曰
診其脈洪大而數者實也微細而軟者虛也虛則補之和其氣托裏也實則瀉之疎利而自導其氣內經

謂血實則決之氣虛則掣引之

辯瘡腫淺深法

夫瘡候多端欲辯淺深直須得法若不素知方論而妄生牙鑿者如大匠捨其繩墨以意度量安能中於規矩哉嘗聞古人有言曰多則惑少則得簡而論之則瘡疽瘰癧有三種高而軟者發於血脈腫下而堅者發於筋骨肉皮色不相辯者發於骨髓又曰凡瘡瘡疽以手按搖瘡腫根牢而大者深也根小而浮者淺也又驗其人初生瘡之時便覺壯熱惡寒拘急頭痛精神不寧煩躁飲冷者其患瘡疽必深也若人雖患瘡疽起居平和飲食如故其疾浮淺也惡瘡初生其頭如米粟微似有痛痒誤觸破之即掀展覺有深意速服犀角湯及漏蘆湯通氣丸等取通利疎暢兼用浴毒湯漏漬之類若浮淺者經貼膏求差以此推之淺深之辯始終之次者也

辯膿法

夫瘡腫之疾毒氣已結者不可論內消之法即當辯膿生熟淺深不可妄開視其可否不至於危殆矣凡瘡疽腫大按之乃痛者膿深也小按之便痛者膿淺也按之不甚痛者未成膿也若按之即復者有膿也不復者無膿也非也必是水也若發腫都軟而不痛者血瘤也發腫日漸增長而不大熱時時牽痛者氣瘤也氣結微腫久而不消後亦成膿此是寒熱所為也留積經久極陰生陽寒化為熱以此潰必多成癰宜早服內寒散以排之諸瘰癧疣贅等至年衰皆自內潰理於年壯可無後憂也又凡瘡癰疽以手掩其上大熱者膿成自軟也若其上薄皮剝起者膿淺也且腫不甚熱者膿未成也若患瘡癰結核寒熱發渴

經久不消者其人面色痿黃被熱上蒸已成膿也至於臟腑腸胃內瘡內疽其疾隱而不見目既不見手不能近所為至難可以診其脈而辯之亦可知矣有患胃脘癰者當候胃脈人迎者胃脈也其脈沈細者氣逆則甚甚則熱聚胃口而不行胃脘而為癰也若其脈洪數者膿已成也設脈遲緊雖膿未就已有瘀血也宜急治之不爾則邪毒內攻腐爛腸胃不可救也又肺癰論曰始萌則可救膿成即死不可不慎也久久咳膿如粳米粥者不治嘔膿而上者自愈也又腸癰論曰或遠臍生瘡膿從瘡出者有出臍中者惟大便下膿血者自愈也

疔瘡疽癰腫證候法

夫瘡疽癰腫其名甚多載之紛紜方書百緒及至臨疾治之無據不知所以內經曰知其要者一言而終不知其要者流散無窮愚雖不才姑揣其要而言之熱發於皮膚之間是以浮腫根小至大不過二三寸者癰也六腑積熱騰出於外肌肉之間其發暴甚腫皮光軟侵展廣大者癰也五臟風積熱攻於肌膚風毒猛暴初生一頭如瘡癩白焦枯觸之應心者疽也夫瘡疽發於六腑若燎原之火外潰膚肉疽生五臟沈澀難瘳若陶室之燧內消骨髓癰則易瘳惟難將息而遲瘳疽則難瘳易得瘳復夫瘡與瘡初生並宜灸之謂其氣本浮達以導其熱令速暢也疽則烙不宜灸謂其氣本深沈須達其原也凡瘡疽生於外皆由熱毒蘊於內明乎三者腫毒丹癰可以類推矣蓋皮膚微高起而肌厚或痛或痒移走無常者謂之腫有因風而得之者有因風熱相搏而得之者腫硬色白因熱而得之者腫嫩色赤因風熱相搏而得之者久久而不消熱勝於風若不即治血不流通與氣乘之以成膿也又曰風多則痒熱多則痛此為驗也

又有丹毒者謂人身忽然變赤如塗丹之狀故謂之丹毒世俗有云赤癩或因有瘡誤而相觸四畔亦謂之瘡癩凡丹毒之疾皆遊走不定狀如雲氣者是也小兒得之最忌百日之內謂之胎癩以其氣血嫩弱臟腑柔脆難任鍼針所以忌也又頸腋之間而生細核初如豆粒或如梅李核累累相連歷歷三五枚久久不消以漸長大或發寒熱者謂之瘰癧有風毒者得於風熱毒者得之於熱氣毒者得之於氣恙由風熱邪氣蘊經所成證候不同治之者亦各異矣

辯瘡疽善惡法

夫瘡疽證候善惡逆從不可不辯從來醫瘡家論五善七惡殊不知此特謂腸胃之內臟腑瘡疽所論之證也發背腦疽別有善惡之證載之于後蓋七惡者煩躁時嗽腹痛渴甚或泄痢無度或小便如淋者一惡也膿血既濃腫焮尤甚膿色敗臭痛不可近二惡也目視不在黑睛緊小白睛青赤瞳子上看三惡也喘粗短氣恍惚嗜臥四惡也肩背不便四肢沉重五惡也不能下食服藥而嘔食不知味六惡也聲嘶色敗唇鼻青赤面目四肢浮腫者七惡也動息自寧飲食知味一善也便利調勻二善也膿潰腫消水鮮不臭三善也神彩精明語聲清亮四善也體氣平和五善也病有證合七惡皮急緊而如善者病有證合五善而皮緩虛如惡者夫如是者宜淺識之所知哉只知五善併至則善無以加矣七惡併至見惡之極矣惡意裁之凡患瘡疽之時五善之中乍見一二善證瘡亦回也七惡之內忽見一二惡證宜深懼之大抵證候瘡疽之發虛中見惡證者不可殺也實證無惡候者自愈大凡膿潰之後而煩癢高木痊者診其脈洪滑麤散者難瘳微濇遲緩者易痊此善惡之證於診候之中亦可知也發背腦疽及諸惡瘡別有五逆

之證者白睛青黑而眼小服藥而嘔傳痛渴甚腫項中不便音嘶色敗者是謂五逆其餘熱渴痢嘔蓋毒氣入裏臟腑之傷也當隨證以治之

砭鍼法

夫上古制砭石大小者隨病所宜也內經謂針石砭石鑱針其實一也今時用鑱者從聖濟總錄丹毒論曰法用鑱割出血明不可緩也合扁鵲云病在血脈者治之以砭石此舉素問血實宜決之文氣血形志論曰形擊志擊病生於內治之砭石蓋砭石者亦東方來為其東方之民其病多瘡瘍其法宜砭石砭石之用自有證候非止丹瘤也但見腫起色赤遊走不定宜急鑱之先以生油塗赤上以鑱鍼之要在決洩其毒然而此法不可輕用忌其太深內經所謂刺皮無傷肉以其九鍼之用而各有所宜也砭鍼之法雖治瘡疽不可輕用也

貼燔法

夫瘡腫之生於外者由熱毒之氣纏結于內也蓋見於外有生頭者有漫腫者有皮厚者有皮薄者有毒氣深者有毒氣淺者有宜用溫藥貼增者有宜用涼藥貼增者有可以乾換其藥者有可以濕換其藥者深淺不同用藥亦異是以不可不辨也若瘡腫初生似有頭者即當貼溫熱藥引出其熱毒火就燥之義也於四畔赤嫩處搗生寒藥貼增之折伏其熱勢驅逐其邪惡撲火之義也夫生寒藥斂氣力精全性味雄健或有瘡者不本物理皆通用藥豈膏之類有勢力微欲使危瘡者敵其勇夫不亦難乎又有粗工不審逆從便用寒藥敷貼趁逐邪毒復入于內歸于肝心十死八九矣尤抵敷貼之法欲消散腫毒血脈疎

通寒熱逆從斷其去就焉慎不可執方無權安能散于鬱結不成膿乎其腫皮厚者以故輒布或以紙花
子塗藥貼增之待其藥乾換腫皮薄者即用繻紗或薄紙塗藥貼增之其藥未乾即當換之若至膿潰之
後即貼溫肌生肉膏藥要在逐真腐排惡汁取死肌生良肉全藉溫熱膏劑之力也切勿用寒涼之藥水
調貼之夫血脈喜溫而惡寒若著冷氣過理即血滯難痊矣

濕潰瘡腫法

夫濕潰瘡腫之法宜通行表發散邪氣使瘡內消也蓋湯水有滲滌之功古人有論瘡腫初生經一二日
不退即須用湯水淋射之其在四肢者漏潰之其在腰腹背者淋射之其在下部委曲者浴潰之此謂疎
導腠理通調血脈使無凝滯也且如藥二兩用水二升為煎取一升半以淨帛或新綿蘸藥水稍熱濕
其患處漸漸喜漏淋浴之稍涼則急令再換慎勿冷用夫血氣得寒則凝滯得熱則涼潔日用五七次病
其著日夜不住或十數次腫消痛止為驗此治瘡腫神良之法也

鍼烙瘡腫法

夫瘡疽之疾證候不一鍼烙之法實非小端蓋有深淺有遲有速宜與不宜不可不辯蓋瘡腫皮厚口
小腫多膿水出不決者宜用鍼烙瘡癰皮薄惟用鍼以決其膿血不可烙也如有未成膿以前不可以諸藥
貼增濕潰殺瘡以待自消久久不消內潰成膿即當棄藥從其針烙當用火針如以火筋磨令頭尖如棗
核樣圓滿用燈焰燒須臾作炬數搥油燒令赤於瘡頭近下烙之一烙不透即須再烙令透要在膿水易
出不假按抑近代良醫書在之際但以金銀鐵銼其樣如鍼者可通用之實在洩其毒也或以木炭熟

火猛燒通赤蘸油烙之尤妙烙後實者披髮為絛虛者以紙為絛於絛上蘸藥絛之上以帛攤溫熱輭粘膏藥貼之當令滋潤勿令燥也夫瘡疽既作毒熱聚攻蝕其膏膜肌肉腐爛若不鍼烙毒氣無從而解膿於無從而泄過時不烙反攻其內內既消敗欲望其生豈可得乎嗟乎此疾針烙取差實為當理然忌太早亦忌稍遲嘗見處工不善其證淺深妄施針烙之法或瘡深針淺烙毒氣不得泄以致內潰或瘡淺烙深誤傷良肉筋骨腐爛或抑擦掀動加益煩痛或針之不當別處作頭或即時無膿經久方潰遂使痛中加痛真氣轉傷詳其所由不遇良醫也以此推之凡用醫者不可不擇縱當醫瘡之得痊者幸矣

灸療瘡腫法

夫疽則宜灸不宜烙癰則宜烙不宜灸丹瘤腫毒宜漏漬之腫皮光輒則鍼開之以洩其毒治瘡之手法迥不過此而各有所宜故聖惠方論曰認是瘡瘡便宜灸之一二百壯如菜豆許大灸後覺似嫩痛經一宿乃是火氣下徹腫內熱氣被火導之隨火而出所以然也若其瘡痒宜隔鼓餅子灸之其餅須以椒薑鹽豉相和爛搗捏作餅子厚薄如折三錢以來當瘡頭鼓餅子上灸之若覺大熱即擡起又安其上餅子若乾更換新者尤佳若其瘡痛即須急灸壯數多為妙若其膿已成者慎不可灸即使針開之即得瘡也若諸瘡經久不瘳變成癰者宜用硫黃灸法灸之其法硫黃一塊可瘡口大小安之別取少許硫黃於火上燒用釵尖挑起點硫黃令著三五遍取膿水乾差為度若其發背初生即宜上餅灸法灸之初覺背上瘡瘻痒頗異認是發背即取淨土水和捻作餅子徑一寸厚二分貼着瘡上以艾作炷灸之一炷一易餅子其瘡粟米大時可灸七七炷其瘡如錢許大日夜不住灸以瘻為度已上數法並依本方一一親驗

所以載之愚謂瘡醫自幼至老凡所經驗必須寫之嘗記疔癰惡瘡諸醫不驗者取蟻螞剪去兩頭安瘡口上以艾灸之七壯一易不過七枚無不効者又法用之艾葉炙之同前法累驗之神効人皆秘之往往父子不傳又法赤皮絲搗爛煇作餅子一如豆豉餅子灸法災之彌佳

內消法

夫瘡疽疔腫之生皆由陰陽不調榮衛凝澀氣血不流之所生也古人有言曰陽滯於陰則生瘡陰滯於陽則生疽瘡疽之生有內有外內生於臟腑官腹之中外則生於膚肉筋骨之表發於定處夫鬱滯之本則因氣血不流榮氣不能外達留滯而成內熱瘡疽所生焉若初覺氣血鬱滯皮內結聚腫而未潰時可疏滌風熱通利臟腑一二行徐次諸湯瀉漬即得內消矣不然則治之稍慢毒熱不散反攻其肉致令膿血之聚也內經謂治病必先求於本蓋瘡疽本乎中熱之鬱結不通也其風邪寒氣所聚也治之宜溫熱之劑和血令內消也辯之有法須認風寒則腫硬色白熱毒則焮腫色赤以為異也如有氣已結聚不可論內消之法宜用排膿托裏之藥此皆先後之次也

追蝕瘡疽腫法

夫瘡瘍生於外皆由積熱蘊於內內經謂血熱肉敗榮衛不行必將為膿留於節膝必將為敗蓋瘡疽膿潰爛之時頭小未破瘡口未開或毒不出疼痛難任者所以立追蝕膿之方使毒外洩而不內攻則惡肉易去好肉易生也若其瘡經其血出不止者則未可經於瘡上核追蝕之藥待其熱可經方經若其瘡經之痛應心根者亦不可以強經之畏觸其瘡其焮痛必倍變證不無不可不慎也若瘡痛膿成未破於

上薄皮剝起者即當用破頭代鍼之劑安其上以膏貼之膿出之後用搜膿化毒之藥取効如神矣若膿血未盡便用生肌斂瘡之劑務其早愈殊不知惡肉不盡其瘡早合後必再發不可不慎也

托裏法

夫瘡疽丹腫結核癰癧初覺有之即用內消之法經久不除氣血漸衰肌肉冷膿汁清稀毒不出瘡口不合成敗腫不赤結核無膿外證不明者並宜托裏膿未成者使膿早成膿已潰者使新肉早生血氣虛者托裏補之陰陽不和托裏調之大抵托裏之法使瘡無變壞之證凡為瘡醫不可一日無托裏之藥然而寒熱溫涼煩渴利嘔臨證宜審其緩急耳

止痛法

夫瘡疽之證候不同寒熱虛實皆能為痛止痛之法殊非一端世人皆謂乳沒珍貴之藥可住疼痛殊不知臨病制宜自有方法蓋熱毒之痛者以寒涼之劑折其熱則痛自止也寒邪之痛以溫熱之藥慰其寒則痛自除矣因風而有痛者除其風因濕而痛者導其濕燥而痛者潤之寒而痛者通之虛而痛者補之實而痛者瀉之因膿鬱而閉者開之惡肉侵潰者引之陰陽不和者調之經絡秘澀者利之臨機應變方為上醫不可執方而無權也

用藥增損法

古人用藥因病制宜治不執方隨病增損瘡積聚補益可用丸藥以從舊不改方增損蓋瘡疽危要之際證候多種安有執方之論固可臨時加減以從其法只如發背疔腫膿潰前後虛而頭痛者於托

良藥內加五味子洗惚不靈加人參茯苓虛不發熱者加地黃栝蒌根往來寒熱者并潮熱者加柴胡地
骨皮渴不止者加知母赤小豆大便不通者加大黃芒硝小便不通者加木通燈草虛煩者加枸杞子天
門冬自利者加厚朴四肢厥逆者加附子生薑嘔逆者加丁香藿香多痰者加半夏并陳皮腫多者加當
歸川芎痛甚者加芍藥乳香肌肉遲生者加白斂官桂有風邪者加獨活防風心驚法者加丹砂口目瞤
動者加羌活細辛蔥雖不才自幼及老凡治瘡疽常依此法加減用藥取效如神後之學者宜細詳焉

瘡癤腫權變通類法

夫瘡疽之病治瘡多方總而論之各有所宜補瀉淋瀝及敷搽貼增鐵鏃火烙用之不同蓋知其道也舉
治必效昧於理者利害不無嘗見以寒瘡熱以熱瘡寒古今之通論也又以檢方瘡病妄製加減以意裁
之自以為可殊不知病有逆從治有緩急法有正權方有奇偶用有輕重夫醫者意也得其意然後能變
通也達其變通者治其道而省其理也則左右逢其源矣愚雖不才畧陳第一嘗見治寒以熱而寒癰甚
治熱以寒而熱癰熾者何也蓋不知五臟有陰陽之性其可因其類而取之也假如心實生熱者當益其
腎腎水滋熱將自除腎水虛生寒當補心心火既降寒將自除此所謂寒之而熱者取之陰熱之而寒者
取之陽也又寒因熱用熱因寒用要在通其理類而已又聞微者逆之甚者從之何謂也蓋治寒以熱必
涼而行之治熱以寒必溫而行之此亦欲其調和也其間有正有權者何也蓋病有微有甚微者逆治理
之正也甚者從治理之權也然為瘡科於補瀉汗下標本逆從正權之理焉可闕而不知也大凡治瘡瘡
疽之要法曰初覺熱毒熱熱鬱結而作瘡疽一二日且先服五利湯蕩滌邪氣疎通臟腑令內消也古今

湯法謂切對咬咀如麻豆大以猛火急煎無令過熟欲其速利也次有丸散宜導血脈漸次消磨令緩散也助以淋瀝調和榮衛行經絡也更宜膏潤溫養兼磨傳四畔貼燭之藥順其陰陽也追蝕托裏汗下調補臨時製宜淺深緩急自有等差男女貴賤亦當別論晉高書褚澄曰妻婦尼僧異於妻妾雖無房室之勞而有憂思之苦此深達其情者也又仲景云物性剛柔餐居亦異治亦不同也所以黃帝與四方之問岐伯舉四治之能況病之新舊形志寒苦豈可執方無權以求其愈疾哉亦有瘡疽腫痛初生一二日便覺脈沈細而煩悶臟腑弱而皮寒邪毒極暴恍惚不寧外證深沈者亦宜即當用托裏散或增損茯苓湯及溫熱之劑以從治之

論五發疽

夫五發者謂癰疽生於腦背眉鬢鬢是也大槩論之分為三等一者疽也二者癰也三者瘡也夫疽初生如黍米大痒痛有異濕觸破之即焮展四畔赤腫沈悶牽引脇肋痠痛數日之後漸覺肌膚壯熱惡寒煩渴腫量侵展焮漿汗出積日不潰抑之則流血者謂之發背疽也其發於腦者為腦疽也其發於鬢眉者以類呼也又有初生其狀無頭腫闊三四寸始覺注悶皮痛因循數日皮光微輟者甚則亦令人發熱惡寒頭痛煩渴者謂之發背癰也又有初生一頭色浮赤而無根腫見於皮膚之間大小一二十者瘡也三者之候惟疽最重此疾初生皆曰滋味與厚衣衣服厚暖則表易括寒咳味過多則五臟生熱臟腑積熱則血脈不流而毒氣凝滯邪氣伏留熱搏於血血聚則肉潰成瘡淺則為瘡實則為癰深則為疽矣亦有因服金石發動而患此疾者亦有更生不服金石藥而亦患此疾者蓋由上祖曾服餌者甚毒氣流傳

子孫此病初生認是疽則且速瘡之若氣實之人急服五香連翹湯漏蘆湯若年幾未五十壯實者可服五利大黃湯化毒丸取通利臟腑一二行瘡頭上用追毒散之類貼溫熱膏劑更漏腫潰潰毒湯淋濁之如此調治以待膿成已前不可以諸藥救療以安患人之心慎勿慳顧著至膿成敗潰宜服五香湯及內托裏散茯苓湯當歸托裏散之類渴不止者服竹葉黃芩湯乳香散勿為大熱服大黃補硝苦寒之藥若因服利藥而利不止者死矣若瘡中惡肉未退膿水不快者即用追蝕之藥或錐子銜之上用鹿角散以醋熬為糊貼之惡肉退去好肉漸生即用搜膿散翠霞散之類銜之若瘡中毒氣未盡慎勿早飲忌早上生肌之藥縱得平復必再發其間調理次第臨時制宜將護忌慎之法耳

論癰疽

夫瘡腫之患莫大乎癰疽然而癰疽何以別之經所謂榮衛稽留於經脈之中則澀不行血脈不行則陽氣鬱遏而不通故生寒熱穢毒之氣騰出於外蓄結為癰久而不散熱氣乘之腐化為膿然而骨髓不焦枯臟腑不傷敗可治而愈也何為疽五臟風毒積熱毒熱熾甚下陷肌膚骨髓枯血氣涸竭其腫色天堅如牛領之皮故命曰疽癰者其腫皮薄以澤此其候也癰疽之生有內有外內生胃腹臟腑之中外生膚肉筋骨之表凡此二毒發無之處而有常名夫鬱滯之本始於喜怒憂樂不時飲食居處不節或金石草藥之發動更著燥濕之不調使陰陽之不平而溢結外使榮衛凝澀而膚潰輕者起於六腑浮連而為癰氣行經絡而浮也重者發於五臟沈澀而為疽氣行經絡而沈也明乎二者腫毒丹疹可以類推矣

論附骨疽

夫附骨疽者以其毒氣深沈附着於骨也此疾與賊風相類而不同人不能辯治之誤矣蓋附骨疽者由秋夏露臥為冷折之風熱伏結附骨成疽賊風之候由風邪之氣搏於骨節故其痛深徹骨髓遇寒則痛甚附骨疽痛而不能轉初按之應骨及肉微急洪洪如肥狀者是也其賊風皮膚不其熱而索索惡寒時復汗出常欲熱熨痛處即得少寬其附骨疽初時但痛無時乍寒乍熱而無汗者經久不消極陰生陽寒化為熱而潰也賊風不治久而變為彎曲偏枯所以不同也認是賊風則服引越脾治風之劑即得差矣認是附骨疽急宜服漏蘆湯或五香連翹散疎下之次用內消升麻湯及漏瀆膏貼之類縱不能消亦得浮淺及有緩疽石疽與附骨疽亦相類矣異者蓋緩疽石疽皆寒氣所作深伏於骨髓之間有腫與皮肉相似若疼而堅硬如石故謂之石疽緩疽其熱緩慢積日不潰久乃亦紫黯色皮肉俱爛故名曰緩疽此二者其治初覺便宜補虛托裏溫熱之劑以取消矣其次調治臨疾制宜故不復具載矣

論陰瘡

夫陰瘡者大槩有三等一者濕陰瘡二者妬精瘡三者陰蝕瘡又曰下疳瘡蓋濕瘡者由腎經虛弱風濕相搏邪氣乘之癢痒成瘡浸淫汗出狀如疥癬者是也妬精者由壯年精氣盈滿久曠房室陰下生瘡赤腫作害妨悶痒痛者是也陰蝕瘡者由腎臟虛邪熱結下焦經絡痞澀氣血不行或房勞洗浴不潔以致生瘡隱忍不醫放腫尤甚由瘡在裏措手無及及痛注悶或小使如淋陰丸腫痛是也或經年數日潰爛血膿肌肉侵蝕或血出不止以成下疳若身體壯熱煩渴惡寒宜急治之以大豆甘草湯清之清毒湯者洗浴之服五香連翹湯漏蘆湯等疎之更以截疳抵聖散乾糝之四畔用壁風膏溫潤之後以將謹忌慎

之渴不止者服竹葉黃芩湯大便艱者宜服托裏茯苓調治之夫如是則無不差矣

論時毒

夫時毒者為四時邪毒之氣而感之於人也其候發於鼻面耳項咽喉赤腫無頭或結核有根令人增寒發熱頭痛肢體痛甚者恍惚不寧咽喉閉塞人不識者將為傷寒便服解藥一二日腫氣增益方悟始名瘡醫原夫此疾古無方論世俗通為丹瘤病家惡言時毒切恐傳染考之於經曰人身忽經變赤狀如塗丹謂之丹毒此風熱惡毒所為謂之丹瘤與夫時毒持不同耳蓋時毒者感四時不正之氣初發狀如傷寒五七日之間乃能殺人治之宜精辯之先診其脈滑數浮洪沈緊弦濇皆其候也蓋浮數者邪氣在表也沈濇者邪氣深也認是時毒氣實之人急服化毒丹以攻之熱實以五利大黃湯下之其有表證者解毒升麻湯以發之或年高氣軟者五香連翹湯主之又以鼻內噴通氣散取十餘嚏作効若嚏藥不嚏者不可治之如嚏出膿血者治之必愈如左右看病之人日日用嚏藥嚏之必不傳染切須忌之其病人每日用嚏藥三五次以泄熱毒此治時毒之良法也經三四日不解者不可大下猶宜和解之服犀角散連翹散之類至七八日大小便通利頭面腫起高赤者可服托裏散黃耆散宜針鑷破割出血泄其毒氣十日外不治自愈也此病若五日已前精神昏亂咽喉閉塞語聲不出頭面不腫食不知味者必死之候治之無功矣然而此疾有陰有陽有可汗有可下嘗見麤工但云熱毒口有寒藥治不知病有微甚治有逆從不可不審矣

論諸瘡

夫諸瘡之生其類甚多種大小方畫載之紛紛以要而論繁舉四等一者因於氣血稽留而結於內者謂腸胃之中癰疽是也二者因於氣血稽留而結於外者謂十疔九癰五痔之類是也三者不因氣血而為瘡謂墮疔并金刀湯火炎絡而傷皮肉之類是也四者不因氣血而骨肉損傷者謂蟲獸爪牙所害之類是也然而四等皆不難損於肌膚害於筋骨不必見載今於隨方條下該說治證以法附之為治之者臨疾制宜醫書為設耳

論疔瘡腫

夫疔瘡者以其瘡形如釘蓋之狀者是也古方論之凡有十種華元化載五色丁千金方說之丁瘡有十三種以至外臺秘要神巧萬全其論頗同然皆不離於氣客於經絡五臟內蘊毒熱初生一頭凹腫痛青黃赤黑無復定色便令煩躁悶亂或增寒頭痛或嘔吐心逆以針刺瘡不痛無血是其候也其候本因甘肥過度不慎房酒以致邪毒嗜結遂生疔瘡內經曰膏梁之膏足生疔瘡此之謂也其治之法急於艾炷灸之若不覺痛者針丁四邊令血出以迴瘡銳子從針孔經之上用膏藥貼之仍服五香連翹湯漏蘆湯等疎下之為効若或針之不痛無血者以猛火燒錢針通赤於瘡上烙之令如焦炭取痛為効亦經前銳子用膏藥貼之經一二日膿潰根出服托裏湯散依常療之以取平復如針不痛其人眼黑或見火光者不可治也此邪毒之氣入臟腑故也養生方云人汗入食肉食之則生疔瘡不可不慎也

癰疔腫十三種形色禁忌

凡瘡疔腫皆刺瘡心至痛處又刺四邊十餘下令血出去血傳藥藥力得入針孔中則佳若不達裏藥力

不到又看口中頰邊舌上有赤黑如珠子者是也瘡上按之疼痛應心者是秋冬寒毒久結皮膚中變作此瘡不急瘡之日夜根長流入諸脈數道如箭入身顛掉不已若不慎口味房室死不旋踵經五六日不差眼中見火光心神昏昧口乾心煩嘔吐不定宜速治之

一曰麻子丁其狀肉起頭如黍米色稍黑四邊微赤多痒忌食麻子油衣布衣并入麻田中行

二曰石丁其狀皮肉相連色如黑豆甚硬刺之不入肉微痛忌食礫埤石之屬

三曰雄丁其狀飽頭黑靨四畔仰飽癢起有水出色黃大如錢孔形高者忌房室

四曰雌丁其狀瘡稍黃向裏靨亦似灸瘡四面飽癢起心凹色赤如錢孔者忌房室

五曰火丁其狀如湯火燒灼瘡頭黑靨四邊有煙癢又如赤粟米者忌火燒烙

六曰爛丁其狀色稍黑有白斑瘡中潰有膿水流出血形大小如匙面者忌沸熱食爛物

七曰三十六丁其狀頭黑浮起形如黑豆四畔起赤色今日生一明日生二乃至十若滿三十六藥所不能治未滿三十六可治忌嗔怒畜積惡恨

八曰蛇眼丁其狀瘡頭黑皮浮生形如小豆狀似蛇眼大體硬忌惡服人看并嫉妬人見忌毒藥

九曰鹽層丁其狀大如匙面四邊皆赤有黑粟粒起食鹽大忌

十曰水洗丁其狀大如錢形如錢孔瘡頭白裏黑靨汁出中硬忌飲熱水水洗渡

十一曰刀鑷丁其狀濶狹如蓮葉大長一寸左側肉黑如燒烙忌刺及刀鑷切割鐵刀所傷可以藥治不

可亂攻

十二曰浮濕丁其瘡狀體曲圓少許不合長而狹如薤葉大內黃外黑黑處刺之不痛黃處刺之痛
十三曰牛拘丁其狀肉色起搯不破

右十三種丁瘡初起瘡心先痒後痛先寒後熱熱定則寒多四肢沉重心驚眼花若大重者則嘔逆嘔逆者難治其麻子丁一種始末惟痒初錄忌者不得觸犯觸犯者發作難治瘡其浮濕丁牛拘丁兩種無所禁忌縱不療亦不能殺人其狀寒熱與諸丁不同皆宜將護依法治療禁忌勿得觸犯若或觸犯脊強瘡痛極甚不可忍者是也又云丁腫初發時突起如丁蓋故謂之丁令人惡心惡寒四肢強痛一二日瘡變為焦黑色腫大光起根硬刺之不覺痛皆其候也在手足頭面骨節間最急其餘處則可毒入腹則煩悶恍惚似醉如此者三二日死矣皆不可不速治也


論瘰癧治法

夫瘰癧之病其名甚多巢氏病源載之三十六種千金聖惠所論瘰癧九漏總論說有風毒熱毒氣毒之異瘰癧結核寒熱之殊其本皆出恚怒氣逆憂思過甚風熱邪氣囚搏於肝蓋怒傷肝肝主筋故令筋畜結而腫其候多生於頸腋之間結聚成核初如豆粒後若梅李核累累相連大小無定初覺增寒壯熱咽項強痛腫結不消者當便服五香連翹湯或牡蠣大黃湯疏下三兩行於上貼丁香膏烏犀膏及用淋瀝腫湯潰毒湯時復淋瀝如此救療即得消散若未消散可服內消丸或皂角丸之類漸以求差若腫結深硬往年月日不能內消者久必成膿若腫高而稍輟其人面色痿黃皮膚壯熱上蒸膿已成也可以針決核中令其潰散則易愈也治法如瘡法于瘡口中用追毒蝕肉銚子銚之於上用烏犀丁香膏等貼之及

托裏之劑和之經久不差或愈而復發或別處自六膿水透出流津不止肌體羸瘦者變成九癰內經曰
陷脈為瘻留連內腠即此病也可用蒜餅子炙之然後瘡口上用紫金散芫散散等於上經貼膏藥求差
其將護忌慎治療用法無造次焉

論痔瘻

夫痔瘻之候其名有五一日北痔二曰牡痔三曰氣痔四曰血痔五曰酒痔又曰腸風痔脈痔腫痔昏
五痔之別名也其狀初生悉在肛邊或如鼠乳或結小核疼痛注悶甚者身熱惡寒諸論之皆由房酒
過度久嗜甘肥不慎醉飽以合陰陽勞擾血脈腸癖滲漏衝注下部肛邊生瘡癰為痔疾治法始覺痔作
便服通氣丸槐角丸熱實者服諸利湯疎利臟腑及浴洗薰熨以取內消切忌酒麪辛辣房室肥膩稍縱
嗜欲腐潰膿血或逗流淫汁歲月已深穿竅六即變痔漏即須用寸金錠子三五次痊愈若能味無味
之味正味足矣事無事之事百事備矣其次服餌調即謹慎合宜未有不差者也



外科精義卷下

醫學博士選克御藥院外科太醫齊德之纂集

明 新安 後學 吳勉學校正

漏蘆湯 治一切惡瘡毒腫丹瘤癩癧丁腫魚睛五發癰疽初覺一二日便如傷寒頭痛渴拘急惡寒

肢體疼痛四肢沉重恍惚悶亂坐臥不寧皮膚壯熱大便祕瀝小便赤黃並宜服之姪身莫服

漏蘆 白欬 黃芩去黑心 麻黃去節 枳實麵炒 升麻 芍藥 甘草炙 研硝以上俱大

黃二兩 右除硝外餘吹咀與硝同和勻每服三錢氣實八五錢水一盞半文武火煎七沸去粗空

心熱服

化毒丹 治百種惡瘡毒腫初覺一二日咳逆煩悶或咽喉閉塞發熱惡寒

沒藥 乳香以上各五錢 烏頭醋浸 浮石以上各一兩 燒赤醋巴豆四十九箇去皮生用另研 右五味為細

末用浮石烏頭餘醋打麵糊為丸如豌豆大每服五七丸食後冷酒送下忌熱飲取快利三二行或

吐出惡為効

內消丸 治瘡腫初生及癰癧結核熱毒鬱滯服之則內消矣大効

青皮 陳皮以上各二兩 牽牛八兩取頭末二兩 薄荷葉 皂角以上各八兩不利者去粗皮搥碎二味水一斗煮令極軟揉汁去粗用熬成膏

右將青皮陳皮末并牽牛末和勻用前膏子和丸如菜豆大每服三十九丸食後用荊芥茶清溫水皆

可以下之

五利大黃湯 治人年四十已前氣血盛多若患瘡疽大小便秘

大黃根 黃芩去腐 升麻以上各二兩 芒硝 梔子以上各一兩二錢 右吹咀每服五錢水一盞半煎五七

沸去粗空心稍熱服

內消升麻湯 治證同前

大黃 升麻 當歸 黃芩去腐 枳實炒去穢 芍藥以上各二兩五錢 甘草炙一兩五錢 右吹咀每服

五錢水一盞半煎至七分去粗食前稍熱服

五香連翹湯如不用五香用七味連翹湯 治證同前

沉香 藿香葉 木香 丁香以上各一兩 麝香一字五味為粗末另研 連翹 射干 獨活 升

麻 甘草炙 寄生草以上各一兩五錢 大黃一兩五錢 右七味吹咀與前五味和勻每服五錢水一盞半煎

至一盞去粗溫服取利為効若未利則再服食前

牡礪大黃湯 治證同前

牡礪 木香 大黃煨以上各等分 右吹咀每服五錢水一盞半煎至七分春夏露瀉一宿於雞鳴

時空心服之冬月於暖處放一宿婦人重身者勿服此藥快利三兩行便勿服以上五方對證選用

和血通氣丸 治證同前

人參一兩 麥門冬去心二兩 大黃 黃芩去核 黃蘗以上各四兩 牽牛一斤炒香取頭末四兩 右六味為細末煉蜜

為丸如豌豆大每服二三十丸食後溫水送下尋常積熱之人隔三二日服此藥微利潤動永不生

瘡腫如早已覺者服之亦得內消矣

地黃煎丸 治臟腑有熱胸膈痰實血氣不和經絡秘滯多生瘡腫已患惡瘡毒腫大小便結滯

生地黃新者十兩洗水浸研如泥黃連五兩黃芩去腐三兩枳殼炒去穢大黃以上各二兩人參二兩右除地黃煎外並

為細末再和地黃煎和搗入煉蜜丸如豌豆大每服五七十九食後用溫水送下若素有積熱之人

日服百餘丸不發瘡瘍年高氣弱之人亦宜常服清利胸膈明目

槐角煎丸 治瘡瘍瘰癧疥癬赤腫等瘡

天麻 川芎 甘草炙 黃藥子 甘菊花 人參以上各一兩 何首烏 苦參以上各一兩 右除皂

荆芥穗 防風以上各二兩 槐角并仁另放 皂角不蛀者以上各四兩水一斗煮軟揉汁去粗取仁熬成膏子其皂角取肉研成膏子為用者 右除皂

角膏外槐仁與諸藥為細末入膏內澆和煉蜜為丸如豌豆大每服五十九食後用竹葉湯送下

皂角煎丸 治風毒瘰癧 皂角不蛀者三十錠內十錠炮黑十錠酥炙十錠用水一斗煮軟揉汁用度 何首烏 玄參 薄荷葉以上各四兩 右為細末與前

膏子同煉蜜為丸如豌豆大每服三四十九食後用溫水送下

苦參散出野夫多効方 治遍身瘡疥經年不効

苦參 蔓荊子 何首烏 荆芥穗 葳靈仙以上各等分 右為細末每服二錢食前用酒

調下日進二服忌發風等物

苦參丸 治證同前

山梔子仁

苦參

防風

玄參

獨活

枳實

甘菊花

黃連

去鬚黃芩

大黃以上各等分

右為細末煉蜜為丸如豌豆大每服五十九茶酒任下食後服

肺風丸全體治世方

治面鼻風瘡及皴皵

細辛

旋覆花

羌活以上各一兩

晚蠶蛾去翅足

苦參以上各二兩

右為細末軟飯和丸如梧桐子大

每服五十九茶酒任下不拘時刻

連翹散

治瘡瘍癰腫一切惡瘡疼痛煩渴大便溇泄虛熱不寧

連翹

山梔子

甘草

防風以上各等分

右為粗末每服三錢水一盞煎至七分去粗溫服

不拘時候

竹葉黃芪湯出總錄一百二十

治諸癰疽發背煩渴及一切惡瘡發大渴者

淡竹葉二兩

黃芪

當歸

川芎

甘草

黃芩去心

芍藥

人參

麥門冬去心

半夏湯洗

石膏以上各三兩

生地黃八兩

右為粗末每服五錢水一盞半竹葉五片生薑五片煎至一

盞去粗溫服

枳殼丸出總錄

治瘡疽熱癰腫瘰癧

枳殼麵炒

牽牛燬取頭末

木香

青皮以上各一兩

甘草

大黃

右為細末用皂角長一尺許者三錠

約三兩炮焦搥碎以好酒者軟搗取汁熬膏稠粘和前藥末為丸如梧桐子大每服三五十九食後

用葱茶送下日進二服

五香湯出總 治諸瘡毒氣入腹托裏

丁香 木香 沉香 乳香以上各一兩 麝香三錢嘔者加 藿香去麝香加 人參以上各一兩 右為細末每

服三錢水一盞煎至六分去粗空心稍熱服總錄聖惠千金外臺治諸瘡腫方中皆載此方大同小

異大抵專治毒氣入腹煩悶氣不通者其餘熱渴昏眩口燥咽乾大便硬小便濕者未可與服

托裏黃芪湯出總 治諸瘡潰後膿多內虛

茯苓去皮 人參 官桂去肉 遠志去心 麥門冬去心 五味子炮 黃芪 當歸以上各等分 右為

粗末每服五錢水一盞半煎至一盞去粗溫服食前

托裏茯苓湯

防風 桔梗 芍藥 五味子 川芎 甘草 麥門冬去心 桂去皮 熟地黃以上

兩一當歸 黃芪 茯苓以上各一兩五錢 右為末每服五錢水一盞半煎至一盞去粗溫服

托裏當歸湯 太醫瘡科何君王方

當歸 黃芪 人參 熟地黃 川芎 芍藥 甘草炙 柴胡以上各等分 右為粗

末每服五錢水一盞煎至六分去粗食前溫服

托裏散 出太醫瘡科成子王方

川烏頭炮 茯苓以上各三兩 乾薑炮 麻黃去節 甘草炙 杏仁炒去皮 五味子 桂心以上各一兩

右為粗末每服五六錢水一盞半煎至一盞去粗食前溫服

托裏玄參散出總錄 主托裏止渴解熱煩渴

玄參 人參 甘草炙 甘菊花以上各等分 右為細末每服二錢菜豆湯調下亦名內托散

內托散洪氏方有芍藥細錢無芍藥亦名生肉芍藥散 治癰疽潰後內虛者或氣弱人初覺生瘡瘍亦可服內消宜詳細用之

當歸 芍藥以上各一兩 芎藭 黃芪 厚朴去皮 桔梗 防風 甘草炒 官桂 人參 白芷

內補散聖惠六十一總錄一百二十八無川芎 右為細末每服三錢用溫酒調下或用水香湯亦可

黃芪 麥門冬去心 川芎 當歸 茯苓去皮 人參 五味子以上各一兩 遠志去心 甘草炙

桂心以上各五錢 右咬咀每服五錢水一盞半生薑三片棗三枚煎八分溫服無時

內塞散總惠一百二十三萬全方中去附子用天雄 治疝瘻不差諸瘡

附子二箇炮 官桂去皮 赤小豆 甘草炙 黃芪 當歸 茯苓 防風 白芷 桔梗

川芎 人參 遠志去心 厚朴以上各一兩 右為末每服二錢溫酒調下空心日進一服

香粉散 主托裏止痛解煩渴退虛熱

真茅豆粉三兩 南乳香一兩 右為細末每服三錢新水調下

止痛當歸湯出總錄一百三十 治腦疽發背穿潰疼痛

當歸 黃芪 人參 官桂 芍藥 甘草炙 生地黃以上各一兩 右為粗末每服五

錢水一盞半煎至一盞去粗溫服日進三服

黃芪茯苓湯

出總錄一百二十

治諸瘡潰後托裏除虛熱

黃芪

白茯苓

官桂去皮 麥門冬

五味子

川芎

以上各一兩

右為粗末每服五錢生

薑三片棗一枚水一盞半煎至一盞去粗溫服食前日進三服

內補防風散

附子

二箇炮裂去皮臍 防風

茯苓

白芷

桔梗

川芎

當歸

人參

甘草炙

遠志

官桂去皮 黃芪以上各一兩

厚朴二兩生薑汁製

赤小豆

半升酒浸一宿

右為細末每服三錢溫酒調服

伏梁丸

出養生必用方

治環臍腫痛腸胃瘡疽

厚朴

生薑汁製 茯苓

枳殼麩炒去穰 白朮

荆三稜炮

半夏湯洗七次 人參

以上各一兩

右為細末麵糊為

丸如小豆大每服三十九食前米飲湯送下

溫經丸

出前方 治臨脉瘻

厚朴

官桂去皮 白朮

甘草

乾薑炮

木香以上各一兩

附子

二兩醋浸炮淬七次去皮臍

右為細末

煉蜜和丸如梧桐子大每服三十九食後飲湯送下

木香漏腫湯

治諸瘡疽始發腫焮增長熱痛

木香

犀角

大黃

梔子仁

升麻

黃芩

黃連

射干

黃蘗

白

欽

甘草炙

硃硝

紫檀

羚羊角以上各一兩

右咬咀入生地黃汁五合如無只用生乾

地黃五兩剉碎和勻每用藥五兩水一斗煎至七升入麝香五錢後用淨帛蘸藥熱漏腫上一日兩

三度冷即再換

升麻瀉腫湯

升麻 黃芪

防風

川芎

生地黃

細辛以上各等分

右咬咀用藥二兩水二升煎

十沸稍熱淋瀝內消如神

瀉腫升麻湯

出總錄淋瀝條下

升麻

芒硝

黃芩

漏蘆

梔子仁

蒴藿

右咬咀每用藥二兩水三升煎十沸

用帛蘸藥瀉潰腫處

猪蹄湯出聖惠方

升麻

甘草

芍藥

蒴藿

以上各等分

右咬咀每用藥四兩水一斗猪蹄一對煮蹄軟取出

次下藥再煎十沸帛蘸淋瀝之

甘草大豆湯

出聖惠方

治外陰蝕下疳瘡瘡腫痛

甘草

三兩

赤皮葱

三莖

大豆

一合

右用水三升煮豆熟為度用槐條一握同煮取清汁熱則淋浴

冷即再溫浸三三時為度大効

瀉腫湯

芍藥

丹參

黃芩

去黑心

白欬

以上各等分

右咬咀用藥五錢水一斗煎十沸用帛蘸頻瀉之

洗毒湯

苦參 防風 甘草炙 露蜂房以上各等分 白芷 右咬咀水煎濃汁洗瘡腫

浴毒湯由拾遺衛生方 治小腸風陰瘡痒痛

木通 藁本 枳殼 管仲 白芷 荆芥 甘松 薄荷以上各等分 右咬咀用

藥二兩水五升入芒硝半兩煎至三升熱淋疥瘡

何首烏散出秘寶生方 治遍身瘡腫痒痛

防風 苦參 何首烏 薄荷以上各等分 右為粗末每用藥半兩水酒各用一半共用一斗

六升煎十沸熱洗便於避風處睡一覺其痛甚者三日痊愈

八仙散出衛生方 治遊風腫痒疥癬瘡或因洗頭遊風瘙痒生瘡

細辛 荆芥 白芷 川芎 黃芩 防風 甘草 地骨皮以上各等分 右為粗

末每用藥二兩水二碗煎十沸去粗熱淋漏患處

消毒湯 治百雜瘡腫悉能內消

獨活 防風 細辛 藁本 川芎 枸杞子 荆芥 漏蘆 大黃 黃芩

去腐 官桂 苦參 葳靈仙 丹參 黃芪 當歸 芍藥 茯苓 黃連

無心草 黃蘗 麻黃 葛根 蒴藋 菊花 杜仲 地骨皮 秦皮

茵草 甘草 甘松 藿香 白芷 露蜂房 升麻 零陵香以上各等分 蒼朮三

兩研硝五兩菖蒲八兩 右為粗末每用藥半兩水二升葱三莖槐柳枝各一握同煎十餘沸去粗

熱淋洗浴此藥用之如神

熨風散

出王子中箱集

羌活

防風

白芷

當歸

芍藥

細辛

芫花

吳茱萸

官桂

等社各

右為粗末作二劑赤皮葱連鬚細切半斤同醖醋拌勻炒令極熱帛裹於瘡上熨之稍冷即換藥熨之上下痛止而已

應痛丸

治走注疼痛疑是附骨疽者

蒼朮

去皮

當歸

草烏頭炮

黑牽牛

以上各一兩

右為細末用醋糊為丸如小豆大每服二十九

空心時用醋湯送下

黃芪丸

治腎臟風虛攻注手足頭面麻痺痛痒或生疥癬腫癩

黃芪

烏藥

茴香炒

地龍去土

川椒去目

防風

川練子炒

赤小豆

白蒺藜去刺

海桐皮

葳靈仙

陳皮以社各等分

右為細末酒糊為丸如梧桐子大每服三十九空心温酒送下

梔子仁湯

出普濟生靈方

治時氣頭面赤腫

鬱金

枳殼去穢升麻

梔子仁

牛蒡子

大黃以上各一兩

右為細末每服三錢蜜水調下

葛根牛蒡子湯

治時毒大頭病是也

葛根

管仲

甘草

鹽豉

牛蒡子

以上各一兩

右為細末每服三錢用水調下此疾近

代患者傳染多致天枉治之者少得方法只云太熱必然殊不知亦有虛實表裏治之者詳其汗下

吐不同大抵與傷寒煩類其中亦有可針鍊砭射出血者亦有久而敗爛出膿者其間變異百端不可不慎所宜時疾也

通氣

治時氣頭面赤腫或咽喉閉塞不通用之取嚏噴七八遍洩出其毒則差若看病之人用此藥

必不傳染

玄胡一兩猪牙皂角

川芎以上各一兩藜蘆五錢躑躅花二錢五分

右為細末每用紙捲子蘸一米許

經於鼻中取嚏為効

白丁香散 治婦人吹妳初覺身熱頭痛寒熱及胸乳腫硬是其候也服之能令下其乳汁通其血脉立

能自消矣

白丁香 直者 右為細末每服二錢用酒調服腫硬立消甚者不過三服

金銀花散 治發背惡瘡托裏止痛排膿

金銀花四兩無花用苗葉嫩並代之甘草一兩 右為粗末分為三服酒水各一盞同煎至一盞去粗溫服無時

皂蛤散 治婦人因露風邪氣外客於乳內始為吹妳積久不消以為妳癰此藥導其汁散其風邪汗出其病自然痊愈矣

其病自然痊愈矣

皂角不蛀者燒存性真蛤粉以上各等分 右為細末每服二錢溫酒調下不拘時候

十香膏 治五發惡瘡結核癰癤疔瘻疽痔

沉香 麝香以上各一錢 木香 丁香 乳香 甘松 白芷 安息香 藿香

零陵香各五錢同當歸 川芎 黃芪 木通 芍藥 細辛 升麻 白欵

獨活 川椒 藁本 菖蒲 厚朴 木鱉子 官桂 高陸根各二兩 桃仁

杏仁 栝子仁 松子仁各五錢 槐枝 桑枝 柳枝 松枝各二兩 沒藥 輕粉 椎

黃 硃砂 雲母石 生犀角 亂髮灰 白礬灰各二兩 真酥 猪脂 羊腎脂各

兩黃丹一斤 清芝麻油三斤 右先於木炭火煉油香熟下一十六味對碎藥并四枝四仁熬至紫

黑色出火濾去粗入脂酥煎十餘沸再以新綿濾過油澄清拭鑪令淨再入火上煎油沸下丹用濕

柳枝作筆子不住攪熬一日滴在水中成珠不散則成也離火入十味藥末攪勻再上火入雲母等

粉八味輕煎令沸出火不住攪一食時於磁盒內密封收每用量瘡口大小緋帛上攤貼之腸胃癰

疽可作丸如梧桐子大每服七丸空心時用溫酒送下

犀角膏

當歸 川芎 黃芪 白芷 白欵 杏仁 木鱉子 官桂 乳香 沒藥

以上各 亂髮灰五錢 黃丹 清油五斤 右前八味細對於油內先浸一宿於木炭火上熬至白

芷杏仁焦濾去粗澄清再煎油沸下丹以濕柳木板子不住攪旋滴藥在水中如珠不散出火候一

時辰下乳香沒藥并髮灰攪勻於磁盒內收依常法攤用之

乳香膏 治一切惡瘡打撲走注疼痛

乳香 研 珠子 瀝青 白蠟以上各 白膠香 二兩 杏仁油一斤 右將瀝青於木炭火上先容開

下白膠香黃蠟化開入油攪勻以綿濾去粗於井花水中持拔白色如銀再溶入乳香在內拔白色收磁盒內依常法攤用之

白龍膏 治頭面五發惡瘡及燒湯凍破潰爛止痛生肌清血脈消毒敗腫通氣脈如神至可無癩痕

輕粉五錢 白芷 白欵 黃芪 商陸根 柳白皮 桑白皮以上各 乳香二兩

定粉另研 黃蠟以上各 杏子油一斤如無 右七味對油內揉浸三日於木炭火上煎令白芷黃色

濾去粗於油中下黃蠟乳香後溶開出火再濾候微冷下輕粉定粉急攪至冷磁盒內收貯每用緋

絹上攤用之

消毒膏

當歸 黃芪 川芎 杏仁 白芷 白欵 零陵香 槐白皮 柳枝嫩者

木鱉子用仁甘松以上各 沒藥以上各 輕粉一錢 硃砂 朱紅以上各 麝香一分 黃丹

炒紫 黃蠟以上各 芝麻油一斤 右將對藥油浸七日於木炭火上煎杏仁焦色濾去粗下黃蠟候

溶開出火下丹急攪百十轉下乳香麝香硃砂等六味不佳手攪至凝磁盒內收貯白絹上攤之

治證如白龍膏之類貼面目毛髮最宜用之

磨風膏 治頭面五發瘡腫疥癬等疾及湯火破傷磨風止痛滅癩痕

白附子 白芍藥 白伏苓 零陵香 白芨 白欵 白芷 白檀 藿香 甘麻

細辛 黃芪 甘草 杏仁去皮尖以 腦子一分 括萎根一兩 大括萎二兩 黃蠟六兩 芝麻

油一斤 右先藥十四味到油內浸百日於臘日慢木炭火上銀石器內煎至白芷微黃色離火入括婁二味著內煮百沸重綿濾去粗再慢火上煉油香下削淨黃蠟溶開為度傾在磁器內收貯上糝腦子密封旋用磨風塗之

天麻膏 治疥癬赤禿手足癩皮剝起癩疼疔瘡侵蝕痛膿汁浸淫滋蔓經久不差者

草烏頭 釣苓根 木鱉子 天麻 藜蘆 川芎 狼毒以上各五錢 輕粉 粉霜以上各二分另

研臘猪脂二兩 黃蠟六兩 油一斤 右前七味細剉如麻巨大於油內煎至焦紫色令冷濾去粗上

火入黃蠟猪脂溶開再用重綿濾過入輕粉粉霜攪凝於磁盒內收貯用以塗摩之大効

善應膏 出南京寶梵院明昌六年聞進方

當歸 白芨 官桂 白欵 白芷 杏仁去皮 木鱉子仁以上各一兩對碎 乳香 沒藥

以上各五錢 研黃丹二斤 芝麻油五斤 右先將油煎藥令白芷焦黃濾去粗再煎油沸下丹用濕柳絮

子不住手攪滴在水中成珠子住火後入乳香沒藥攪勻以磁盒內收貯依常法用之

靈應膏錄 治五發惡瘡癩癧結核乳癰

白麥飯石燒醋淬七次 白欵以上各五兩 鹿角十兩燒存性 右為細末每用醋中熬如膏厚塗於上中心留一

竅以出其毒以故舊軟布攤之貼未成膿者貼即自消已成膿者便潰惡肉疾出新肉早生効不必

具陳用之如神

翠玉膏 治軟瘡膿水迫流愈後復發

明憑青 四兩 銅碌 二兩 芝麻油 三錢 猓猪膽 三箇 右先於炭火上溶開憑青入油令沸下膽汁攪

勻入水中用手搏搗磁盒內收貯用於緋光絹上量瘡大小攤貼之不須再換一上便痊可自落為度

追毒散 太醫成子五方 治一切惡瘡膿水不快者

五靈脂 川烏頭炮 白乾薑 炮以上各一兩 全蠍 五錢 右為細末用少許糝瘡口中深者紙捲藥

於瘡口內以膏貼之或浸蒸餅令浸透搗去水和藥合勻搽作錠子每用紙入瘡口中亦名追毒子錠

廻瘡錠子 治疔瘡大効

草烏頭 一兩 蟾酥 七錢 巴豆 七枚 麝香 一字 右為細末麵糊和搽作錠子如有惡瘡透丁不痛無

血者用針深刺到痛處有血用此錠子紙之上周膏貼之丁瘡四畔紙之其丁在三二日自然拔出

此藥最當緊用也

射膿丸 治諸瘡癰膿水已成即當針開決出陳臭惡痰則其活也若其惡痰不出欲鍼口須當開發用

此藥以射出其膿也

白礬灰 一錢 砒霜 五分 黃丹 一字 右為末麵糊為丸搽作錠子每用粘瘡頭欲出處以膏貼之自潰

替鍼丸 出保生信効方 治證同前

陳壞米末 一錢 硃砂 五分 雄雀糞 真者二粒 右為細末粳米粥丸如粳米一樣每用一丸粘在瘡頭

上以膏貼之

治瘰癧并馬老鼠瘡

銅碌

班猫

砒霜以上各五分

右為細末醋糊為丸如鼠糞大每用時一錠子作三丸納於瘡

口上以膏貼之如無瘡口乾糝之亦妙

翠霞散 治百雜惡瘡去毒生肌

滑石 一兩 銅碌 五錢 輕粉 二錢 片腦

麝香以上各三分 粉霜 一字

右為細末每藥藥紙於瘡口上

以膏貼之或滑石二兩名二聖散量其淺深輕重用之

搜膿散 治年深不効惡瘡

白芷 一兩 芎藭 二兩 白芍藥 三兩 輕粉 三錢

右為細末每用乾糝瘡口上瘡口深者紙之

引膿散 治證同前

狼毒 釣苓根

無心草根

白丁香以上各五錢

麝香 一字

右為細末如前法用治之

乳香散 治證同前

白乾薑

苦丁香

草烏頭以上各五錢

釣苓根

狼毒

乳香以上各一兩

右為細末每用乾

糝之或唾調作錠子紙入瘡口

釣苓散

陳宮賢方

治證同前

井鹽 一兩 無心草

乾薑以上各二兩

釣苓根 三兩

右為細末每用乾糝之或唾調少許塗在膏上

就貼之

截瘡散 治年深瘡癩瘡大効

蜜陀僧

白欬

白芨

黃丹

以上各一兩

黃連

五錢

輕粉

一錢

腦子

麝香

以上各五分

右前

四味為細末後四味另研極細和勻為散每用或糝或絳瘡口中以膏貼之

抵聖散

治耳中膿經年不愈及驢涎馬汗攻焮瘡瘍骨疽疔癩等瘡

白礬灰

一兩

烏魚骨

三錢

乳香

二錢

乾胭脂

輕粉

以上各一錢

麝香

五分

右為細末或糝或絳以

膏貼之如有耳膿者用一字絳耳中

青金錠子

治諸惡瘡膿出不快者及多年疔癩瘡愈而復發

白丁香

銅青

硃砂

粉霜

輕粉

以上各五分

麝香

龍腦

以上各一字

右為細末麵糊

為丸搥作錠子每用絳入瘡口中膿水出快

白龍散

主生肌止痛及耳中卒然大痛

寒水石

四兩燒半白研

烏賊魚骨

研

滑石

以上各一兩研

鵬砂

三錢

輕粉

一錢

右為細末每用乾糝耳中痛者

油調如糊滴絳於耳中痛立止

桃紅散

主欬瘡生肌肉定血僻風邪

滑石

四兩寒水石燒二兩

小豆粉

一兩

乳香

輕粉

以上各一錢

右為細末每用乾糝血不止者和燈

草貼瘡口上以帛封之

檳榔散

治久患惡瘡肌肉遲生

木香

黃連

檳榔

以上各等分

右為細末每用乾糝之

外科積義

卷下

九

金黃散出和齋衛生方 主消腫散毒生肌止痛

黃連 大黃 黃芪 黃芩 黃蘗 鬱金以上各一兩 甘草五錢 龍腦五分另研 右為細末

入龍腦研勻若治漏毒丹腫新水調掃赤上或蜜水調如稀糊用小紙花子貼之或小油調掃如久

不差熱瘡毒赤乾糝或用水調塗亦佳

生肌散 主斂瘡大効

寒水石燒 滑石以上各二兩 龍骨 烏魚骨以上各一兩 蜜陀僧 枯白礬 乾胭脂 定粉以

錢各五 右為細末用藥乾糝於瘡口上

水澄膏 治熱毒腫痛大効

大黃 黃蘗 鬱金 天南星 白芨 硃硝 黃蜀葵花以上各一兩 右為細末每

用新水一盞半藥末二錢攪調勻候澄底者去浮水以紙花子攤於腫焮處貼之如急燥津唾潤之

此藥治熱毒赤腫神効如皮膚白色者勿用之

拔毒散 治熱毒赤腫遊走不定

寒水石生用 石膏生用以上各四兩 黃蘗 甘草以上各一兩 右為細末每用新水調掃之或油調塗之或

紙花子小貼亦妙以涼水潤之

金露散出普降生靈方 治時氣熱毒

寒水石生用一兩五錢 黃蘗 一兩 白芨 白斂 雄黃以上各二錢五分 右為細末無根水調以紙花子貼

或掃亦妙

消毒散 治諸惡瘡生肌止痛消毒散腫

滑石一斤 黃蘗二兩 黃丹一兩 乳香五錢 輕粉三錢 右為細末 每用乾糝或燒湯及下注膿瘡風

濕疥癬等瘡以油調塗之

大檀榔散成方 治乾濕疥癬

硫黃 黑狗脊以上各五錢 輕粉一錢 紅娘子 大檀榔以上各一箇 右為細末 每用藥末半錢於手

掌中臨卧時油調如糊兩手搓摩極熱鼻內聞之及摩擦疥上隔一日再用甚者不過三上必驗

天麻散 治白禿疔瘡及風毒疥癬

藜蘆 天麻 狼毒 白芷 茵草 釣苓根 草烏頭 管仲細辛以上各五錢

雄黃二錢 輕粉一錢 右為細末 每用藥半兩紙一重綿裹油三兩浸三日外蘸指擦患處如稍乾

添油一兩 添至三兩 換藥其効如神

決効散 治風痒頭瘡

管仲三兩 白芷一兩 右為細末 油調塗之

水銀膏 治癩瘡疥癬無名惡瘡但是手足瘡疥浸淫多汁久而蟲生塗之神効

簡姑剉 黃蠟以上各一兩 黃連剉 蛇牀微炒 白礬枯 水銀以上各二兩 右用臘猪脂七兩熬開下

三件對藥煮至焦紫色去担再入黃蠟溶開出火稍凝下水銀礬石攪至勻每用塗摩

平肌散 治諸瘡久不斂者

密陀僧

花並石

二味同 齋赤色

白龍骨

以上各一兩

黃丹

乳香

黃連

以上各二錢五分

輕粉

一錢

右為

細末入乳香輕粉黃丹同研令勻每用乾糝

神黃散

治一切熱腫攻喉疼痛

黃蘗末

一斤

黃丹

二兩此紫色

雄黃

一兩

右同研勻

每用新水調如糊敷掃

以小紙花貼稍乾再

以蜜

水潤之

博金散

治下疳蝕臭爛腫痛

白礬

與蜜陀僧同為末相和於沙鍋內火上炮汁盡

密陀僧

以上各五錢

白堊

二錢

黃丹

輕粉

以上各一錢

乳香

五分

麝香

右為細末先須另用槐枝葱白鹽甘草熬湯淋濁洗一二時淹乾糝上項藥每用藥先須洗浴然後

糝藥甚者三五次差

金傷散

治刀鎌斧傷僻風止痛生肌

白芨

三兩

陳石灰

風化

桑白皮

黃丹

以上各二兩

白附子

天南星

龍骨

以上各一兩

末每用乾貼之

完肌散

治證同前

蜜陀僧

桑白皮

新者

龍骨

以上各四兩

陳石灰

二兩

黃丹

五錢

麝香

一錢

右為細末乾糝之

定血散

治證同前

黃丹一兩 烏魚骨 白礬灰 龍骨以上各 蜜陀僧半斤 桑白皮一斤 右為細末每用乾糝

定血如神

碧霞錠子太醫賈陳宮寶方 治惡瘡透不覺疼痛

銅碌一兩 硃砂二錢 蟾酥一錢 右為細末 粳米飯一處擦勻 搥作錠子如粳米樣 每用針刺之不

覺痛者但有血出 緋一錠子在內以膏貼之 或作散以紙熬蘸之亦可 臨證須看如何宜合用度

漏蘆湯 治婦人吹妳初覺

漏蘆 練實 大黃 黃芩 芍藥 甘草以上各五錢 右為粗末每用三錢水一盞半

燈草三十莖同煎至一盞去粗溫服無時

玉粉散出蘇沈疔方 治陰瘡浸淫不止

白礬灰 定粉以上各等分 右研細末先洗浴淨淹乾敷之

香礬散 治小兒斷臍之後不乾及膿出耳中

枯礬五錢 龍骨 黃丹以上各一錢 麝香少許 右為細末每用乾糝之

紫金散 治瘰癧久不差者

枯礬五錢 砒霜一錢 石膽五分 右為細末入黃丹二錢每用緋入瘡口內以膏貼之如未破者灸

一兩炷用津唾旋調一豆許安瘡上以膏貼之去根自平復

通耳丹盧全寶傳 治耳聾

桑螵蛸

安息香

阿魏以上各一錢五分

硃砂五分

草麻子仁

大蒜

芭豆仁以上各七箇

右

為細末入二仁與大蒜同研爛為丸如棗核樣每用一丸綿裹內耳中如覺微痛即取出親驗方

菖浦錠子一名菖蒲散

治耳中卒痛

菖浦

附子炮去皮及臍以上各二兩

右為細末每用油調滴耳內立効

寸金錠子大醫陳子寶方

治療痔疾

藤黃 雄黃

雌黃

硫黃

輕粉

粉霜

麝香

砒霜

黃丹以上各一錢

牡礪粉

紅藤根

乾漆以上各五錢

右為細末研勻燒陳米飯和搗為丸如棗核大每用一丸

內肛門中深二寸許放令定用新磚毬子二箇炭火燒赤醞醋中醃過綿裹一箇於肛門上熨之冷

即換上下次之來日大便下臭敗惡物除根也

薰痔散

葎靈仙三兩

右用水一斗半煎至七八沸去火就盆上坐令氣薰之候通手淋漏冷即再暖

通靈丸 治耳聾

松脂五錢

巴豆二十四粒去皮研

右先將松脂溶開後入巴豆末熬成膏丸如白豆大用綿裹一丸塞耳

中覺痛取出有赤水為効

三神丸 治僧道痔疾因讀養生必効方見乾義傳僧覺海少年患痔疾其行業比水霜緣此飽食久坐

知有痔疾者不必酒色過度矣故素問云因而飽食筋脉橫解腸澀為痔治之者故不同也

枳殼炒去穢 梔子性燒存 五倍子以上各等分 右為細末煉蜜為丸如梧桐子大每服三二十九溫水食前

服養生必効方中三味皆單方一味為方今增為一方其効如神

玉芝飲子 治膈熱口舌生瘡咽喉腫痛

甘草炙二兩 藿香葉 石膏 水飛山梔子仁以上各一兩 右為細末每用一錢新水調下

平和飲子出顯顯 治小兒瘡疹

人參 白朮 茯苓 甘草 升麻以上各等分 右為細末每服一二錢水煎去滓溫細細

飲之量歲大小虛實以意詳之此藥治諸瘡疹煩渴不寧者皆可以服之惟小兒瘡疹尤佳

玄參丸出僧居泰傳 治口瘡連年不愈者 右為細末煉蜜為丸如彈子大每服一丸嚙化

天門冬去心 麥門冬去心 玄參以上各等分

犀角散 治口舌生瘡咽喉腫痛熱毒時氣

升麻 桔梗 甘草炙以上一兩 牛蒡子炒四兩 右為細末每服三錢水一盞入竹葉五七片煎至

七分去粗細細熱嗽溫即嚙之其粗熱掃項腫上

防風散 治破傷瘡瘍風邪或身體疼痛風邪攻注掣急及皮膚瘙痒麻木不仁頭昏悶牙關緊欲成破

傷風

防風 一兩 藁本 羌活 地骨皮 荆芥穗以上各五錢 右為細末每服三錢溫酒調下

烏金散 治疔瘻惡瘡

外科精義

卷下

十二

麝香

蟾酥以上各一字粉霜

硃砂

輕粉以上各一錢銅碌

砒霜

白乾薑

草烏頭

天南星

船上硫黃以上各五錢

右為細末紙摺絰之或湯浸蒸餅和為錠子絰瘡口內上以膏貼之

劉守真瘡論

素問云痛痒瘡瘍癰腫疽疔瘡氣結核拂鬱甚者皆熱五臟不和九竅不通六腑不和留結為癰近於火氣微熱則痒熱甚則痛附近則灼而為瘡皆火之用也人之瘡腫因內熱外虛所生也為風濕之所乘則生瘡腫然肺主氣候於皮毛脾主肌肉氣虛則膚腠開為風濕所乘脾氣濕而內熱即生瘡也腫者由寒熱毒氣客於經絡使血濕而不通壅結成腫風邪不作即無頭無根寒血相搏作者即有頭有根壅盛則為膿赤根腫則風氣流潰也瘡以痛痒痛則為實痒則為虛非虛為寒也正謂熱之微甚也痒則美疾也故火旺於夏而萬物蕃鮮榮美也灸之以火漬之以湯而其痒轉甚者微熱之所使也痒去者謂熱令皮膚縱緩腠理開通陽氣得泄熱散而去或夏熱皮膚痒而以冷水沃之其痒不去謂寒能收斂腠理閉密陽氣鬱結不能散越拂熱內作故也瘡瘍皆為火熱而反腐出膿水者猶穀肉果菜熱極則腐爛而潰為污水也潰而腐爛者水之化也癰淺而大疽深而惡熱勝血則為癰膿也瘍有頭小瘡也疹浮而小癰疹也瘤氣赤瘤丹燦熱勝氣火之色也

沒藥膏 治一切癰疽發背瘡癰傷折蹊跌壞膿生肌止痛又貼灸瘡極妙

麒麟竭

明乳香

沒藥以上各一分研當歸去蘆木鱉子仁

杏仁以上各五錢

油頭髮

黃丹六

兩

右先用油一斤石器內或沙鍋內露天底鍊油令熟先下木鱉子當歸杏仁頭髮慢火熬黃焦

油耗五分離火用綿濾粗不用再入鍋下黃丹以新柳篋子十條旋換攪不佳手候黑色滴在水中成珠子硬輒得所取下火入三味研藥再攪勻磁盒內盛放地上以盆合一宿出火毒用時或帛上或紙上攤用一日一換

必効散 治久患瘰癧不効服此藥取効如神

南鵬砂二錢輕粉一錢麝香五分 班猫四十箇去頭翅 巴豆五粒去皮心膜 白檳榔一箇 右同研極細取雞子清

二箇去黃調藥勻却傾在雞子殼內濕紙數重糊定勿令透氣坐飯甑內與飯一處蒸飯熟取藥曝乾研極細末用時相度人之虛實虛人每服五分實人每服一錢並用炒生薑酒下五更初服藥至平明取下惡物如爛肉老鼠兒及新成卵內雀兒是藥之効也若婦人有胎者切不可用

烏金散 治癰癤腫硬無頭不變色者

米粉四兩 葱白一兩細切 右同炒黑色杵為細末每用看多少醋調攤在紙上貼病處一伏時換一次

以消為度

抵聖丸 治男子婦人頭面手足虛腫

苦葶藶不以多火於火上隔紙炒過 右杵為細末棗肉為丸如小豆大每服十九煎麻子湯下食前日進三服

五七日小便多腫消為効如喘嗽煎桑白皮湯下忌生冷醋滑物及鹽須另丸一等小丸與小兒服看大小加減與服煎棗肉湯下

應効散 治氣癭疔瘡多年不効者

地骨皮 不以多少冬月自取只要皮陰乾

無時日進三服又名托裏散

右杵為細末每用紙摺蘸紅瘡口內頻用自然生肉更用米飲調二錢

白金散

治風攻注毒遍身及手足生熱瘡疼痛有黃水出

桂府滑石

右為細末先用虎杖甘草豌豆各等分約半兩許二碗水煎上項三味至一碗去粗微

如聖散

治渾身瘙痒抓之成瘡及癩疹之類

蠶沙一升

右用水二斗煎至一斗濾去粗夜卧避風處淋洗水冷即拭乾便睡

大蠟散

治刀斧傷止血定痛生肌

晚蠶蛾 不以多少

右為細末每用藥貼於瘡口上用綿裹不宜再動一上便可

必効散

治蜘蛛咬著疼痛

鹽豉 炒乾

右為細末每用油調塗之必効

蛤粉散

治湯火燒燙瘡

蛤礪 燒赤放冷

右研如粉每用油調塗之一日三次

治小兒丹瘤

木蟹子 新者去殼

右研如泥淡醋調傳之一日三五次便効

治小兒疳口瘡

天南星一箇 去皮

右為末好醋調攤在紙上男左女右貼在脚心底以帛繫定三日外取了以溫水洗

盡脚下藥

治破傷風并洗頭風藥

麻黃一錢 去節

蝎稍二錢 五分 蠶薑

草烏頭

黑附子炮去皮

白附子

天麻

烏梢蛇好酒浸二

夜去骨火

上炙川芎五錢 以上各

但邪氣入臟則難治治有四死證不可治一頭面青黑色二額上有汗珠不流三眼小目瞪四人身

上有汗出如油

烏龍丸 治遍身風瘡癢痒疥癬等疾服之則消風散熱利膈化痰唾治肺氣不和此藥推陳致新去

盡腸垢治證甚多要能用度

皂角肥者不以多少炙刮去皮弦梃碎甜水揉取濃汁去粗銀石器內熬成膏另放之

黑牽牛不以多少微炒令香熟淨取頭末

右將藥末與皂角膏和

丸如梧桐子大每服三五十九氣虛者一二十九食後溫水送下無病氣實人一兩箇月頓一服取

利三五行不傷正氣身體輕健肌膚光澤永無風痰疥癬之疾

紫參丸 治熱毒瘰癧腫毒未成者內消已潰者行膿止痛散腫毒

麝香另研 膩粉 以上各三錢

紫參

苦參炒以上各一兩

丹參一兩

連翹二兩

滑石二兩

右為末別用玄參

一斤搗碎以酒三碗浸三日揉取汁去粗用皂角子三百箇煨熟為末用玄參酒熬皂角子未成膏

和前藥丸如梧桐子大每服一丸以黃芪湯下一日加一九至患人歲數即住如四十則二十每日減一九其瘡自乾已結者內消也服此藥大有神效

萬靈丸 治腦背疽并一切惡瘡初覺一二日

硃砂 血竭 蓮藥以上各等分 麝香少許 右為細末酒糊為丸如黃米大每服七丸溫酒送下

若瘡在上食後服丸在下食前服丸不過二服即効

治眼 治昏濕退翳膜

椒四兩去子 甘菊花二兩 熟乾地黄二兩酒浸 右為細末煉蜜為丸如梧桐子大每服三十九食

後細嚼新折米十餘粒送下

治吹妳方田仲寬方 治吹妳及一切惡瘡初覺一二日立効

生薑一兩去皮 大黃 甘草以上各五錢 瓜蒌一箇去皮 右共搗作一塊以水半碗同煎至七分濾去粗入沒

藥乳香末共二錢半通作一服

治痔瘡

雄黃五分細研 五靈脂去石燒過去烟 五倍子炮過以上各一錢 沒藥二錢五分明淨者 白礬半飛 右為細末研令極細用紙

花子貼瘡口上

洗痔

防風 當歸 川芎以上各等分 右三味剉細煎水去粗令熱溫淋洗瘡用軟帛印乾傳前藥

寸金丹

返魂丹三名再生丸四名追命丹五名延壽丸六名來甦丸七名知命丸八名得道丸非人勿示此方若有人患瘡身未爛者與三丸服之嚥下便活如口噤但幹開牙關研下三丸灌下至喉中立生此方治發背腦疽癰腫遍身附骨腫痛先覺時飲水口中煩渴發熱四肢沉重身體壯熱

麝香一分南乳香

烏金石

輕粉

雄黃

狗寶

沒藥以上各一錢蟾酥二錢粉霜

黃蠟以上各三錢

硃砂五錢

鯉魚膽乾用

狗膽以上各一箇乾用

金頭蜈蚣七條全者

頭首兒孩兒乳一合

右

件為末除黃蠟乳汁二味熬成膏子同和丸如菘豆大小兒丸如芥子大每服一九病重者加三丸

白丁香七箇研爛新汲水調送下用衣服蓋之睡勿令透風汗出為度大段疼痛如無頭瘡腫不過

三服立効服藥後食白粥菘菜就服大妙

牙疳藥

此藥是京兆惠民局見行經驗方

治大人小兒

揀信

青黛

輕粉以上各一錢

麝香五分

右同為細末用小油調薄攤紙上用木錘鎚實收起

每用臨臥以漿水洗淨印乾可瘡口大小以藥紙封之至曉去藥紙嗽淨勿令嚥下大者不過三上

必効

迴瘡蟾酥錠子

陝西醫局提舉馬雲卿親傳經驗方

治丁瘡毒氣攻心欲死以針刺其瘡向心行處但覺痛有血處下錠

子若累刺至心側近皆不痛無血者急針百會穴痛有血者下錠子若無血以親人熱血代之猶活三

四况瘡初發無有不効大抵丁瘡生於四肢及胸背頭項骨節間惟胸背頭項最急初生痛痒不常中

陷如丁蓋撼之有根壯熱惡心是也

天南星 欵冬花 巴豆仁 黃丹 白信以上各一錢 獨活五分 斑貓去頭足 右為極細

末用新蟾酥和藥如黍米大揪作錠子每遇丁瘡先以針刺其瘡必不知痛有血出者下錠子如覺痛不須再用若更不知痛再隨瘡所行處迎奪刺之至有血知痛即止其元瘡亦覺疼痛以膏藥傅之膿出自差

用錠子法度以銀作細筒子一箇約長三寸許隨針下至瘡痛處復以細銀線子內藥於筒內推至

痛處

乳香托裏散同前所傳 治一切瘡腫疼痛不可忍如少壯氣實者先疎利後服之大効

御米殼去隔蒂莖 當歸 芍藥 川芎以上各五錢 乳香 沒藥以上各一錢 右為粗末每服五錢

水一盞半煎至七分去粗溫服病在上者食後服在下者食前服若未止即再服

四聖旋丁散各醫秘傳 治丁瘡生於四肢其勢微者先以好醋調藥塗上以紙封之次服內托裏之藥

其丁自旋出根

巴豆仁 五分 白殭蠶 輕粉 硃砂以上各二錢五分 右為細末醋調用之

天丁散同前秘傳 治一切丁瘡及諸惡瘡初生以藥塗之急服托裏內消

山丹花藥 香白芷以上各二錢 牛蒡子根春採去皮 天丁乃兒 蒼耳芽 大力子以上各五錢 雄黃 一兩

右五月五日受氣修合為細末每用好醋塗紙封之丁瘡上有黑甲者必須胡桃油浸次塗之自可

萬應膏同前 治一切瘡瘍初生腫焮甚者無問大小以膏向腫痕貼之煎葱白水熱淋兩焮時良久再

淋腫消為度如瘡老不能差者亦收斂聚膿決然早差

黃蘗 芍藥 白芷 黃芪 木鱉仁 杏仁 當歸 白芨 生地黃

官桂 玄參去皮切碎沒藥 乳香以上各五錢研白欬 黃蠟以上各一兩 黃芩 大黃以上各二兩 黃

丹 一斤 芝麻油八兩 右件十四味入油內浸一宿絕早入沙鍋慢火熬用生柳條攪至申時以焦

褐色出火去粗粗又以重綿濾過入丹再熬旋滴水中成珠子不散者出火毒絕烟入乳香沒藥黃

蠟攪勻用磁器收貯於土內埋七日取出攤用

治小兒面湮瘡 俗云鍊銀瘡者是母受胎之日食酸辣及邪味過度多生此瘡

百藥煎五錢 生白礬二錢 右為細末小油調旋搽之神効

治赤白口瘡 大人飢渴不時小兒失驚即生口瘡

生白礬一錢 右噙嗽之從瀝頑涎立効

治乾濕疥癬 此是肺受邪毒運於四肢久而不散以生肉盡

硫黃一兩 生白礬八錢 右為細末油調火灸抓破塗之立効

治湯火燒燙 無問新舊

青槐枝對兩 菜豆粉一兩炒黃色 輕粉一錢 右同為細末油調塗之止痛減毒

治破傷風 手足顫掉不已者

硃砂另研 南星去臍獨活各二錢 人手足指甲燒絕烟 右為細末分作三服酒調服之立効

治破傷 無問新舊

石灰 右用一味驗瘡口大小儘乾塗之不須封裹神効

治風狗咬破傷風 此病非為小可乃九死一生之病可急用之

好班猫

七箇去
翅足

右為細末酒調服之於小便盆內見夜沫似狗形者為効如無再服七次雖無狗形亦不再發也此方累試經驗今附於此

論炮製諸藥及單方主療瘡腫法

夫藥者治病之物蓋流變在乎病主治在乎藥製用在乎人三者不可闕一也凡用一味炮炙修製及單方主療該引方書出處不必隨方標寫

硃砂 須研細水飛濾乾若入膏中者待熬膏成稍凝冷即下急攪勿令沉聚大凡石類一一如此

雲母 即須用鍊成熟粉曾經婦人手拈者不効聖惠方治湯火瘡羊髓和膏塗之神良千金方如治金瘡及諸惡瘡依上塗傅大効

礬石

即白礬

凡用須木炭火上枯汁盡主陰蝕惡瘡去鼻中瘰肉生含嚙津治急喉閉肘後方治耳中卒腫痛或有膿水者以筒吹一字於耳中以綿塞之立効又治諸毒蟲獸咬傷傳之則差千金方以醋煮湯潰蝨螫立差王氏博濟治驢馬汁毒傷人瘡腫痛和黃丹傅之靈苑方治傷折瘡腫以沸湯投枯礬漬浴之御藥院方治陰汗以枯礬投沸湯中浴之

水銀 主疥癩痂傷白禿入膏令膏冷凝下之攪令勻散如星勿令沉聚

水銀粉即輕粉

主療癩殺疥癬蟲酒醴風以羊髓和如膏塗及貼臙瘡一上可

石灰 主疥癬骨疽金瘡風化者良外臺秘要方治風疹以漿水調熱掃之隨手差孫真人治疥淋石灰

水溫洗之千年者尤佳

白麥飯石

即粗理黃石

曾磨刀者佳凡用須用醞醋淬之令屑落醋中者良亦單用治發背神良本草曰大

凡石類多主癰疽

花藥石

主金瘡止血合硫黃木炭火炒良或只刮花藥石末効

黃芪 主癰疽久敗瘡排膿止痛兼五痔鼠瘻止渴聖惠千金外臺秘要方治發背腦疽托裏止渴用黃

芪六兩甘草一兩剉細水煎溫服無時大効

稟耳即蒼耳

千金翼方丁腫用根莖葉炒灰存性為末醋泔淀和如泥塗之一日三易之三日腫消根丁

自拔出亦治諸腫掃之尋差

麻黃 凡用根節者三沸掠去沫嗽乾剉

黃芩 凡用去腐蘆揀細實者佳梅師方治諸丹作末水調掃之亦治湯火瘡

烏頭附子 凡用須炮裂去皮臍

半夏 凡用湯洗七次去滑

羊蹄根 主乾癬疥頭禿取根嚙塗之効簡要濟眾方治癰瘡久不差取新者絞汁和膩粉為膏塗之千

金聖惠外臺等方皆治癰和醋或白礬或硫黃塗之愈

狼毒

主癰疽惡瘡鼠癩聖惠方治癬瘡積年搔之黃汁出痒痛以末傅之或猪膏和塗差

芭蕉根

主瘡腫搗根汁塗之良百一方治發背根汁塗之

土青木香

即馬兜
苓根

治頭風搔痒禿瘡

連翹

主寒熱鼠癩癰疽惡瘡癭瘤同甘草服食

蒲公英

主乳癰煮汁飲之自消梅師方傳之亦消

滑石

本草不言療瘡腫本體較治諸瘡久不愈消熱毒腫及金瘡血不止湯火炒瘡用之尤良

白石英

主肺癰吐膿咳嗽及膈上風熱痰肺癭消渴陰癭補五臟

赤石脂

治瘡疽痔瘻瀉痢加芎末等分粥飲調服一錢重神効寒者加乾薑服

白石脂

治癰疽排膿生肌新生兒臍濕

雄黃

主寒熱鼠癩惡瘡疽痔死肌疥癬

硫黃

主女人陰蝕疽痔惡瘡疥癬殺蟲

雌黃

主惡疔疥頭禿下部惡瘡殺蟲

磁石

消癰腫主鼠癩頸核喉痛

蜜陀僧

主金瘡止血口瘡疔癭面上癩點

伏龍肝

糝主惡瘡水調掃丹腫酒調封發背令內消

礬石

主寒熱鼠癩惡瘡蝕肌死

薑石 搗末雞子清調敷丁腫丹瘤乳癰

麤理黃石 堪作確碾者 即磨刀粗石 齊馬嗣明治楊遵彥發背取此石猛火煨赤投醋中因有屑落取為末醋熬

如糊厚塗立愈大凡石頭多主癰疽

爐甘石 主愈瘡止血治目赤瘡

燈心 主破傷血出每用貼破上封之立差

槐根皮 主痔及白皮煎湯薰浴良入荆芥尤妙

地骨皮 主疽瘡經年以粗皮煎湯洗之細沫白穰別碾糝之即差

黃蘗 主瘡腫神良每用去粗皮塗蜜炙剉諸方用作湯漬陰瘡良搗末蜜水調敷腫

枳殼 凡用須麩炒去穰剉枳實亦同

厚朴 凡用須去粗皮生薑塗製炙微焦剉

皂角 凡用須不蛀者去黑皮弦子酥炙黃色剉

木鱉子 凡用去殼主惡瘡毒腫孫用和方治痔用仁三五枚研如泥以沸湯浸用汗先薰但通手即浴

洗日三度

楸樹白皮 單用熬膏貼癰疽惡瘡疔癩痔疾用其白馬牙燒灰治發背初生用糝瘡頭上以膏封之

兔頭 連皮骨臘月細剉瓶中封之百日塗發腦疽發背惡瘡 出百一方

兔腹下白毛 治湯火瘡已破者先用膠水掃之後用兔白毛貼之毛落平復勝金方治痔用玩月砂即

兔糞也和乳香末酒調三錢溫服日三服即差

蜜 凡鍊須煎令沸掠去沫外臺治陰頭生瘡以蜜煎甘草末塗之神効肘後方單用塗湯火瘡

牡礪 凡用木炭灰炒通赤濕地上放經宿方用經驗方治瘰癧用牡礪四兩玄參三兩為末糊丸如梧

桐子大酒服三五丸食後服藥盡患亦除根集驗方治一切癰腫水調牡礪粉掃之乾即再掃即消

名拔毒散初虞世治瘰癧用和甘草末茶調三錢服之神効大驗

蛇退皮 諸方用治丁雜惡瘡十年不較者全用炒存性猪膏和塗之其驗神効

蜘蛛 聖惠治瘰癧不問新舊或成癭者晒乾為末酥和如糊貼之日三度大効千金治發背瘡亦治鼠

瘰癧神良譚氏治贅瘤癰目以網絲作線際根繫之一宿自落

蜈蚣 聖惠治一切惡瘡端午日收乾為末者油調傳之神効子母祕錄治忽得惡瘡未辨識者取新者

絞汁傳其上大効古今諸方治丁瘡欲死者取蜈蚣心腹下度取之稍白者是以針刺丁瘡當心及四

畔以心塗貼之百苦立已經宿其丁自拔出大忌食羊肉多不効

陳橘皮 凡用溫水浸去白青橘皮亦然

枇杷葉 主嘔逆下氣凡用先去毛刺甘草湯洗三葉重一兩者佳

桃杏仁 凡用須湯浸去皮尖雙仁炒剉或研

無心草 凡用去蘆苗煎洗甲瘰癧神効

防風 凡用去又蘆


藜蘆 凡用去苗

犀角 凡用生不曾見火者即鎊錯為末

茯苓 凡用去粗皮白者佳

芍藥 亦用白者佳

牽牛子 凡用黑成熟者微炒假如一斤取頭末四兩



Pa
TTT

L6932
1907
v. 5